

1713

27

Eremitarum Carmalulensium  
Montis Argenti prope  
Graecorum.

YUGUM GRAVE

*SUPER*

OMNES FILIOS

ADAM,

*E*

SS. PATRUM VER-  
BIS FORMATUM

*PER*

K. P. ADALBERTUM  
TYLKOWSKI,

Societatis JESU Theologum.

*Post Editionem secundam in Polonia.*

*Secunda in Germania.*

CUM FACULTATE SUPERIORUM.



AUGUSTÆ VINDELICORUM.

Sumptibus Matthiæ Wolff, Biblio-  
polæ. 1723.



WILLIAM GRAVE

1711

ADAM

ST. PATRICK

1711

1711

1711

1711

1711



REVERENDISSIMO  
PRÆNOBILI

<sup>AC</sup>  
AMPLISSIMO DOMINO  
DOMINO

JOANNI  
ADAMO

EPISCOPO DIOCLENSI,  
Ecclesiæ Cathed. Au-  
gust. Canonico Capitu-  
la-  
ri, Reverendissimi ac Celsissimi  
Principis ac Episcopi Eystadiensis  
Consil. Intimo, nec non in Ponti-  
ficalibus ac Spiritualibus Vicario  
Generali, Reverendiss. Dicasterii  
Præsidi ac Præposito ad S. Ni-  
colaum Spalthæ &c.

*Exemplar. (am. 1812. M. 112)*  
D<sup>O</sup> MINO SUO PA-  
TRONO PLURIMUM  
GRATIOSO.

REVERENDISSIME  
PRÆNOBILIS

<sup>A C</sup>  
AMPLISSIME DOMINE,

*Domine plurimum  
Gratiose.*

**Q**uemadmodum in-  
gens discrimen  
est primum inter  
& secundum Adamum, ita  
palpabilis est diversitas  
inter illius & hujus ju-  
gum. Primus Adam *de*  
*terra terrenus* uti vitam  
in omnem suam posteri-  
tatem

tatem invexit, ita mortalem suum pulverem eidem communicavit, in quem post perbrevevitalis auræ usum esset desitura, ut eodem planè jure morientium, quo viventium Pater appellaretur. Alter autem Adam *de cælo cælestis* ita mortem per peccatum in genus humanum sævientem devicit, ut mortuos ex profundissima iniquitatum abyssu suscitatos vita immortalis beaverit. Ex hac utriusque Adami diversitate ortum est jugum ex omni parte diversissi-



mum. Nempe *jugum grave* super omnes filios Adam imposuit Adam primus, jugum scilicet peccati, & ex peccato pullulantium affectionum sævissimam rebellionem, quam Gentium Apostolus deplorat Rom. c. 7. *Video autem aliam legem in membris meis, repugnantem legi mentis meæ &c.* ita ut major hoc jugum portantium pars gravissimo pondere ad usque infelicis æternitatis voraginem se deprimi patiatur. Contrà verò ait alter Adam, *jugum meum suave est, & onus meum leve.*

*leve.* Matth. c. ii. Onere  
enim peccatorum imma-  
nissimo in suos humeros  
suscepto, id, quod redem-  
ptis asseclis suis portan-  
dum relinquit, ita si æ  
gratiæ auxilio leve effe-  
cit, ut nemo jure queri  
possit, se supra vires gra-  
vari; quin imò ut jugum  
hoc tolerabilis foret, Vi-  
carios constituit, qui suc-  
collantibus humeris in  
partem laboris venirent.  
Hos inter demississimo af-  
fectu veneror Reveren-  
dissimam Prænobilem &  
Amplissimam Dominatio-  
nem Vestram, quæ Dio-

clensium Infulâ & Pêdo  
illuſtris, Vicariam Genera-  
lem in Diœceſi Euſtadiana  
potestatem habet, quod  
idem eſt ac omnium ſub-  
ditorum fidelium onus  
Paſtorali ſollicitudine ge-  
ſtat, & velut alter Adam  
quàm leviſſimum reddit.  
Felices Aurealenſes! qui  
Romanæ ſapientiæ robur  
in ſuam uſque patriam at-  
traxerunt, quo nixi omnis  
ſtatûs homines ad curren-  
dam Chriſtianæ vitæ ſe-  
mitam roborantur. Fe-  
lices Parœciarum Curio-  
nes! qui ad hoc conſilio-  
rum & inſtructionum Pal-  
ladi-



ladium in emergentibus  
ovicularum casibus refu-  
gere possunt & adjuvari.  
Felices etiam Augustanæ  
Ecclesiæ Cathedralis Pro-  
ceres ! quos inter à Sum-  
mo Christi Vicario adle-  
ctus, *columna facta es in*  
*Domo DEI mei* ad orna-  
mentum Nobilissimi Cle-  
ri & sacri oneris levamen.  
Sed & me, Clientum utut  
infimum, felicem ! qui ad  
hujusce Gratosi *Adami*  
consecratas manus litte-  
rarium hoc *fugum* meum  
possum deponere, spe fre-  
tus optima, Bibliopolium  
meum, quod modò in cu-  
nis

nis est, magna sumptu-  
rum incrementa, quam-  
primum ad hoc Scientia-  
rum omnium Emporium  
conatus mei litterarii na-  
cti fuerint accessum. Id  
quod submississimis pre-  
cibus efflagito.

Reverendissimæ  
Prænobili & Am-  
plissimæ Dominationi  
Vestræ

Augustæ die 20. Aug.  
1720.

devotissimus servus

Matthias Wolff, Bibliopola.



## PRÆFATIO.


**P**Ræclare ad nostrum propositum S. Gregorius M. in Cat. S. Thom. Asperum jugum & durum servitutis pondus est, subesse temporalibus, ambire terrena, retinere labentia, velle stare in non stantibus, appetere quidem transeuntia, sed cum transeuntibus nolle transire. Dum enim contra votum omnia fugiunt, quæ prius mentem ex desiderio adeptionis afflixerant, postea pavore amissionis premunt &c. Unde patet, jugum peccatoris esse quidem grave, nihilominus tamen à peccatore amari, sed amore prorsus detestabili & æternùm deplorando.

Quare



Quare operæ pretium duximus,  
omnium statuum & conditionum  
juga discutere, & simul rationem  
ostendere, quâ patienter tolerari  
& cum merito possint. Pleraque  
sunt sensa SS. Patrum, ad eum fi-  
nem adducta, & in certos paragra-  
phos congesta, ut legentibus tra-  
ctatum hunc pateat, quodnam  
sanctissimorum Virorum de jugo  
peccati, peccatorum miseriâ, &  
modo hoc jugum ferendi judi-  
cium sit. O peccatorem ex omni  
parte miserrimum! si jugum pec-  
cati gravissimum in hoc vitæ cur-  
riculo ferre, & in æternum conti-  
nuare debet, hîc & ibi infelix.  
Considera has veritates, Lector  
Christiane, & laborem in ferendo  
onere tibi patere sublevari.

Valc.



C A P U T I.

GRAVE JUGUM  
SUPER SECU-  
LARES.

*I. Quia salus illorum in lubrico.*



Agnovit hoc *Sanctus*  
*Cyprianus* cum dixit: Lu-  
brica spes est, quæ inter  
fomenta peccati salvari se  
sperat. Incerta est victo-  
ria inter hostilia arma pugnare, & im-  
possibilis liberatio est, flammis circum-  
dari, nec ardere. Atqui juxta Evange-  
lium, *quidquid in mundo est, concupi-*  
*scientia carnis, concupiscentia oculorum,*  
*superbia vite,* aut est vitæ, aut oculorum  
superbia, aut concupiscentia carnis, adeo-  
que totus est in maligno mundus.

A

*II. In*

## *II. In laqueos incidunt diaboli.*

Et cum in seculo, qui est verè in seculo, nemo sit, quin cupiat fieri dives, qui verò divites fieri volunt, incidunt in laqueos diaboli, juxta S. Paulum, similiterque cupientes fieri divites, non item sunt divites coram DEO, de illis currit illud Matth. 19. *Amen dico vobis, quia dives difficile intrabit in regnum cœlorum. Et iterum dico vobis, facilius est camelum per foramen acûs transire, quàm divitem intrare in regnum cœlorum.* Hinc S. Greg. 4. Moral. 3. dixit: Rarum valde est, ut qui aurum possident, ad requiem tendant. Et fortassè huc respexit Cosmas, quando Scriptori Prati Spiritualis dixit: Quid potest secularis homo virtutis adipisci?

## *III. In medio malorum vivunt.*

Quantum deinde periculum salutis æternæ subeant seculares ex occasione eorum, cum quibus vivunt, expressit S. Bernard. Serm. 3. de Circumcis. Nam in mundo alii venenatis persuasionibus, alii undique exemplis pejoribus ad peccatum



alliciunt, alii adulationibus in vanam gloriam, alii detractionibus in impatientiam dejiciunt. Jam verò dixit *S. Hieronymus*: Proclivis est imitatio malorum, & quorum virtutes assequi nequeas, citò imitaris vitia. *Osea 4.* de mundo dictum: *Non est veritas, non est misericordia, non est scientia Dei in terra, maledictum, & mendacium, & furtum & adulterium inundaverunt eam, & sanguis sanguinem tetigit.* Unde *S. August.* in *Psal. 141.* Scito quòd in medio laqueorum pertransis. *S. Paulinus Epist. 2.* Totà hujus mundi figura diabolicis prætentata est retibus. *S. Ambros.* in *Luc. 4.* Multi laquei, quacunque ingredimur. Actandem concludit *S. Aug. Hom. 38. in Ioan.* Si delectat te mundus, semper vis esse immundus; quem delectat habitare Sodomis, non evadet incendium; quem inter Ægyptios, non evadet servitutem. Ipsi Viri religiosi si multum secularibus immisceantur, in periculum salutis veniunt, quid verò ipsi seculares? Deplorat hoc *B. Laurent. Justin. de perfect. Monast. cap. 22.* O quot temporibus nostris fuerunt,

runt, qui tanquam ardentes lampades, & mundi luminaria lucebant coram hominibus, paulatim ex conversatione secularium tepesfacti, ad pristina opera secularis vitæ miserabiliter redierunt. Addit *ibid.* Qui cum discolis conversari voluerit, prout dubio fiet eorum similis. Quocirca arguit *S. Chrysoſt. Orat. 2. de Providentia*: Si pestilentem locum & contagionis plenum videris, consuetudinem illius loci fugis, quamvis sexcenties ad domicilium illud traharis, & corporis valetudinem cæteris omnibus rebus anteponis: ubi verò opinionibus pestilentibus quidam complentur, ac ægritudinibus, quæ non modò corpus corrumpunt, sed animam quoque perimunt, ac deteriorem viliorèmq; reddunt, non omninò refers te? Et tamen *teste S. Basilio Hom. 9.* sicut in pestilentibus locis sensim attractus aër latentem corporis morbum injicit: sic in prava consuetudine ac conversatione maxima nobis mala hauriuntur, etiamsi non statim incommodum sentiatur.

*IV. Aliquando pro suis meritis in hac vita recipiunt mercedem.*

Dictum id diviti : *Recepisti bona in vita tua, & quænam? Induebatur bysso & purpurâ, epulabatur splendide. Solutum tibi est per honores, famam & ejusmodi, in altera vita meræ manserunt poenæ.*

*V. A domesticis habent salutis periculum.*

*Inimici hominis domestici ejus*, ait Scriptura. Concedendum sæpè iis, ne offendas; deferenda ea quæ sunt DEI, imò ipse DEUS, ne te illi deserant; avaritiæ studendum, ut illi habeant lautè; salus negligenda, ut placeas. *S. Chryst. hom. 57. ad Pop.* Patrem discipulus se pelire voluit, nec id Christus permisit, quid ita? quoniam acer instat diabolus, ut se in animum insinuet.

*VI. Rarò habent animæ Directorem.*

Jam verò cùm *vita nostra sit militia*, in qua pugnandum cum infernali exer-



citu, Duce spirituali omninò egemus, ut expreffit *S. Joannes Climacus gr. 4.* Qui sine patris spiritualis auxilio contra spiritus nequam pugnare nititur, ab illis occiditur. At secularis homo quandonam & quotus illum Ducem habet! Militandum tamen est. Notandum quod de bonis etiam operibus docet *S. Bernard. Serm. 3. de S. Andrea*: Quod sine licentia patris spiriritualis fit, vanæ gloriæ deputabitur, non mercedi. Imò *S. Basilius Serm. de abdic. rerum* asserit: Quidquid eo insciente facis, id furtum & sacrilegium est, tibi que exitium, non utilitatem ullam apportat, esto, id tuum bonum judices.

*VII. Ex vanitate habent noxam,  
cui ferè coguntur servire.*

Jam quid de vestitu ipso, quid de cultura corporis, risu, & amoenitatibus mundi noxæ attrahant seculares, audiant, quid de Apostata Torquato, alloquendo judicem, dixerit *S. Tiburt. Mart.* Credisne, Vir Illustrissime, hunc esse Christianum, qui in suo lenocinio molien.

liendo capitis fimbrias admittit, qui tonforem diligit, qui scapulas molliter gestit, qui fluxum gressum improbo nixu distendit, qui fœminas curiosius intuetur? Nunquid tales pestes dignatus est Christus habere servos suos? Et licet communem vestitum Christiani cum Gentilibus deferant, ab illis tamen quâdam modestiâ distingui debent, ut olim *Minutius Felix in Octavio* dixit: Nos non notaculo corporis, sed innocentiae, ac modestiae signo facile distinguimur. *B. Antiochus Homil. 95.* Ridere solutiùs neutiquam illis permissum est, qui sunt germani Christiani.

*VIII. Et ipsi ad magnam sanctimoniam obligantur.*

*S. Chrysof. Hom. 24. in Acta.* Nescis, *Christiane*, quòd cum Angelis stas, cum illis cantas, cum illis hymnos dicis; & stas ridens? & non esset mirum, si fulmen demitteretur non solum in illos, sed etiam in nos. Digna enim fulmine sunt hæc. Adest Rex, & inspectat exercitus *Angelicus*, & tu in illorum conspectu stas

ac rides, vel ridentem negligis? Nonne ut damnosos, ut fures, ut corruptos, & perniciosos tales, & innumeris malis plenos ab Ecclesia exigi oportebat? Non sufficit nobis, quòd ipsâ mente sumus ignavi, nec quòd orantes aliò evagamur, sed etiam risum afferimus. Unde testificor vobis. qui sancti estis, quod iudicium vobis erit ac condemnatio, si quis videns inordinatè viventem, maximè illo tempore, (*Sacrificii scilicet*), non admonuerit, nec corripuerit. Hoc est plus quàm orâre. Dimitte preces, & illum corripe, ita & illi proderis, & tu lucrum habebis. Tanti facit hic Pater minimum Christiani secularis defectum. Sed neque aliter sensit *B. Petrus Damian. l. 5. Epist. 2.* Cùm Veritas dicat: Væ vobis qui ridetis, quoniam flebitis: quid in tremendo iudicio dicturi sunt, qui non solùm ipsi rident, sed insuper scurrilia proferentes, risum audientibus violenter extorquent. Omnibus dictum: *Estote perfecti, sicut Pater vester. S. Ambros. Serm. 20. in Psalm. 118.* Qui Evangelii præcepta audit & non facit, negat Christum; etsi verbo fateatur, mori-

moribus negat. *Bernard. Serm. in Cantic.*  
 Non erit unquam Spiritui DEI pars cum  
 mundi vanitate, cum veritatis sit spiri-  
 tus. *S. Macarius* dixit: Si quis seipsum  
 dedat curis, vel ambitionibus, aut digni-  
 tatibus, humanosque curet honores, &  
 hæc inquirat, animaque ejus cogitationi-  
 bus terrenis permisceatur & confunda-  
 tur, aut alicui rei ad hoc seculum perti-  
 nenti sit devinctus, desideretque ejusmo-  
 di anima transilire, vitare, atque expellere  
 affectionum turbas, in quibus tenentur à  
 potestatibus iniquis, minimè potest: pro-  
 ptereaque diligit & facit voluntatem te-  
 nebrarum, in seculo verò quotus est qui  
 non his, aut horum periculo existat? at  
 vero Eccl. 3. dicitur: *Qui amat peri-  
 culum, peribit in illo.*

### *IX. Obligantur ad mundum odio habendum.*

Difficulter homines in seculo consti-  
 tuti & illud præceptum implere possunt:  
*Nolite diligere mundum.* Et tamen ve-  
 rum est, quod dixit *S. Gregor. lib. 2. in*  
*1. Reg. cap. 1.* Nisi seculum amare de-



listimus, DEO per amorem vivere non valemus. Istis dictum est *Luc. 21. Attendite, ne corda vestra grauentur in crapula, aut curis hujus vite, ut legit idem S. Pastor. p. 1. cap. 7. ne forte superveniat in vos repentina dies illa; tanquam laqueus enim superveniet in omnes, qui sedent super faciem omnis terra. Et 2. Tim. 2. dictum: Nemo militans Deo implicat se secularibus negotiis. Itaque qui implicat se ejusmodi negotiis, Deo non militat. Nemo verò coronabitur, nisi qui legitimè ceraverit.*

*X. Discrimen habent tam à bono quam à malo successu.*

Jam non succedant negotia secularia, quanta afflictio spiritûs, & quanta ex tribulatione pericula? succedant verò, fortè occinetur tibi: *Recepisti bona in vita tua? S. Greg. Homil. 4. in Evang. Ista, fratres mei, sententia pavore potius indiget, quàm expositione. Ecce, dum dicitur Recepisti, indicatur & dives iste aliquid boni habuisse, ex quo in hac vita reciperet. Utrumque hoc Prov. 1.*

expressum : *Aversio populorum interficiet eos, & prosperitas stultorum perdet eos.*

### *XI. Mundus decipit.*

Sed utut mundus egerit nobiscum, semper est infidus. *S. Chrysost. Tom. 2. Hom. 13:* ita habet de illo : Multa nobis falsissimè pollicetur, non ut det, sed ut accipiat. Promittit plurima de rapinis, ut auferat regnum & justitiam ; thesauros pollicetur in terra, ut nobis cœlestium faciat jacturam ; vult nos in hoc seculo ditare, ne divites simus in futuro.

### *XII. Mundus multis afficit molestiis.*

*Tertullianus ad Martyres*, postquam eos ingressos carcerem solatus est, ita de mundo loquitur : Si cogitemus, ipsum mundum magis carcerem esse, exivisse vos è carcere magis quàm introisse in carcerem intelligemus. Majores tenebras habet mundus, quæ hominum præcordia extœcant ; graviores inducit catenas, quæ ipsas animas constringant ; peiores im-

munditias expirat. Etsi autem ille non sit ex Sanctis, maximæ tamen est auctoritatis, *Bernard. autem Serm. 1. de Altit. & Bass. cordis*: Quanto, inquit, pecuniæ desiderio afficitur avarus, quanto gloriæ appetitu ambitiosus exæstuat, quàm violenter denique quemque sua trahit voluptas, quis explicet? Videas certè eos, quidquid adepti sunt, parvi pendere, non attendere, quanto labore & desiderio ea vix tandem consequi potuère; quoniam vilescunt eis omnia præ desiderio minoris fortè rei, quam cœperint alteri invidere. Addit & *B. Laur. Justin. lib. de Obedient. cap. 1.* Sibi ipsis minimè parentes se exponunt periculis, se laboribus macerant, séque, quod est formidolosius, gehennæ faciunt filios; ut humanis attollantur honoribus, cæteros præcellant laudibus, momentaneis fruantur voluptatibus, atque terrenis ditescant opibus.

### *XIII. In seculo pauci Sancti.*

Paucitatem justorum in seculo ita adnotat *S. Macarius Hom. 12.* Ecce mundus

dus universus obambulabat in terra &  
 negotiatur, sed nihil cogitat quod Deo  
 sit gratum, tanquam si essent diversoria  
 & lupanaria, aut loca similia, in qui-  
 bus multa inordinatè & intemperanter  
 committi solent.

### *XIV. Pauci salvantur.*

Unde *S. Chrysostomus* è secularium plu-  
 rimis millibus vix aliquos salvari asseruit.  
 Sic enim suum populum Antiochenum  
*homil. 40.* alloquitur: Quot esse puta-  
 tis in civitate nostra, qui salvi fiant? in-  
 festum quidem est, quod dicturus sum,  
 dicam tamen. Non possum in tot mil-  
 libus centum inveniri qui salventur, quin  
 & de his dubito. Quanta enim in ju-  
 venibus, quæso, malitia? quantus in se-  
 nibus torpor? filii curam gerit nemo,  
 imò zelum habet nemo, ut senem respi-  
 ciens imitetur, exemplaria deleta sunt,  
 propterea neque juvenes laudabiles eva-  
 dunt. *S. Aug. à Guil. Pipin. Serm. 2. in*  
*Dom. Septuag.* in hæc verba adducitur:  
 Arbitror tres mundi partes fore damnan-  
 das, eò quòd in omnes regnet infidelitas,  
 de



de quarta autem quid dicam? nisi quod  
*1. Joan. 5. scribitur: Totus mundus in  
 maligno positus est. S. Antonius de Pa-  
 dua Dom. 3. Adv. in illud Isaia cap. 19.*  
 Mœrebunt piscatores, & lugebunt omnes  
 in flumen mittentes hamum, & expan-  
 dentes rête super faciem aquarum emar-  
 cescent, confundentur omnes, qui ope-  
 rantur linum, pectentes & texentes sub-  
 tilia. Ita Concionator. Piscatores sunt  
 hujus mundi amatores; mittentes ha-  
 mum, mercatores falsi; expandentes re-  
 te sunt maledicti usurarii; operantur li-  
 num Legistæ, Decretistæ, & Advocati.  
 Hi omnes in fine vitæ suæ, cum jam non  
 poterunt villicare, lugebunt, quia divi-  
 tiis, quas tam sollicitè acquisierunt, tam  
 ardentè amaverunt, ita miserrimè denu-  
 dantur; marcescent, quia eorum animæ  
 à corpore egressæ dæmonibus tradentur  
 æternaliter puniendæ.

Ingemiscit *Salvianns*, & Ecclesiam  
 in hunc modum liberè affatur: Nescio,  
 quomodo repugnante contra teipsam tuâ  
 felicitate, quantum tibi auctum est popu-  
 lorum, tantum penè vitiorum auctum sit.

Quan-

Quantum tibi copiae accessit, tantum disciplinae recessit, & prosperitas venit quæstum cum magno fœnore detrimetorum. Multiplicatis enim fidei populis fides imminuta est, & crescentibus filiis suis mater ægrotat. Diffidisti quidem, Ecclesia, per omnem mundum religiosi nominis membra, religionis vim non habentia, ac sic cœpisti turbis esse opulens, fide pauper; quanto ditior multitudine, tantò egentiores devotione; latior corpore, angustior mente, novoque penè & inaudito genere in te major es & minor, crescens simul & decrescens.

*XV. Et pueri subjacent his periculis.*

Quid de pueris sentiendum docet S. Greg. lib. 4. Dialog. cap. 18. Etsi omnes baptisatos infantes, atque in eadem infantia morientes regnum cœleste ingredi credendum est; omnes tamen parvulos, qui scilicet jam loqui possunt, regna cœlestia ingredi credendum non est; quia nonnullis parvulis ejusdem regni cœlestis

stis aditus à parentibus clauditur, si malè nutriantur. Et in exemplum adducit quinquennem puerum, quem demones ad supplicia rapuerunt.

*XVI. Quia qui sunt in conjugio sunt miseri.*

Describit hoc jugum, quatenus premit mulierem, *S. Chryst. Orat. de S. Thecla* in hunc modum: suspiciones falsas sustinere, procedendi sæpè utiliter in publicum potestate privari, de alimentis inquirere, ornatam zelotypiæ obnoxiam fieri, despiciatui duci, priusquam pepererit, quasi quæ nondum uxor facta sit, ubi pepererit, ob pignora in crimina incurrere. Partu edita est fœmina, quòd natus non sit malculus, tetricum maritus vultum gerit. Adjectus est masculus, & formosus non est. Eleganti formâ est, tanquam de pulchro acerbior cura incessit. Depulsus est à lacte, rursus anxietas educationis succedit. Cùm sanus fuerit, metus est ne ægrotet. Cùm ægro-taverit, formido est ne moriatur. Cùm mortuus fuerit, metus ne deinceps tan-  
quam

quam prole carens contemnatur. Cum mortuus non fuerit, ut de vivente gravior sollicitudo incumbit, unde ad institutionem sumptus suppeditabuntur? unde conjugalis fœderis apparatus? unde vestimentorum decor? unde famulorum distributio &c. *S. Basilii.* Quæ mortali connubio conjuncta est, ad suam ipsius curam, alterâ viri adjunctâ, geminam in una anima ex conjuncto sibi corpore sollicitudinem necessariò sustinet. Nec jam unius tantum corporis laborat gratiâ, sed in una anima, & ad suum, & ad viri corpus curandum jugiter intenta dividitur. Ubi verò filios parturire, atque in lucem edere cœperit, per unumquemque nascentem animo scinditur, & præsentibus tristibus nascituri cura semper adjicitur. Ac, siquidem bonum virum blandumque nacta fuerit, perpetuò, ne moriatur, metu viduitatis incommoda cruciatûsque jam sustinet, diram quandam & immitem curam, & præsentè illo & absente, propter insperatos casus animo indefinenter excipiens. Sin verò contrâ duro & im-

miti



miti fuerit conjuncta , tota quidem vita illi cruciatus est. Et cum pudicitiae ratione neutrum queat eligere , id est , nec viri mortem propter viduitatis angustias , nec vitam ob molestiam incommodumque convictus , ancipiti atque inevitabili malo acerrimisque doloribus semper atteritur. Inde ubi filios edidit , aut ad bonam illis rugem evaserunt , & majores ex illorum absentia dolores jugiter tolerat , quam parturiens tulerat , aut malos evasisse considerat , & majus ex ea procreatione liberorum , quam si permansisset sterilis , opprobrium sustinet. Quod si relicta vidua pupillos enutriet filios , percepto ex viri morte mœrore , semper in lacrymis , in gemitu , in sollicitudine educandorum degens , nullum præterito malo solatium invenit. Præterea & propinquis , & famulis , & filiorum curatoribus , ipsisque postremo etiam filiis , ubi virilitatis annos attigerint , cunctisque omnino se vexare volentibus ad prædam miserabiliter exposita , doloris luctusque tragoediam vitam suam omnium ingeret oculis. Et quid  
plura

plura persequi necesse est. Dominum sibi cum dote infelix coëmens virum, ancilla pro libera efficitur, brevissimæque voluptatis gratiâ naturali libertate se privans, januam sibi ineffabilium dolorum perpetuæque mœroris per hujusmodi connubium aperit. Hoc *S. Basilias lib. de Virginitate*. Sed de jugo mariti plurima disputat *Petrus Blesensis Epist. 19.* ex quo ista: Non est sine plurima incommoditate copula conjugalis, vixque posse obtineri creditur pax animi cum uxore. Perpetua inest sollicitudo, contextus querelarum, dotis exprobratio, affinium importunitas. Multa idem sunt, quæ usibus matronarum necessaria, pretiosæ vestes, aurum, gemmæ sumptus, ancillæ, supellex varia, lecticæ & effeda deaurata. Deinde per noctes totas garrulæ sunt conquestiones. Illa ornatior procedit in publicum, hæc honoratur ab omnibus, ego in contemptu foeminarum missella despicior. Cur aspiciebas vicinam? quid cum ancilla loquebaris? de foro veniens quid attulisti? Non amicum habere possumus, non sodalem. Alterius  
amo-

amorem suum odium suspicatur. Pauperem alere difficile est, divitem ferre tormentum. *S. Chrysoſt. Hom. 32.* Mulier bona difficile invenitur, protestante Salomone *Ecccl. 7.* Inter mille bonum virum invenies, in omnibus autem his mulierem non invenies. Quid autem est aliud mulier, nisi amicitiae inimica? ineffugibilis poena? malum necessarium? naturalis tentatio? desiderabilis calamitas? domesticum periculum? delectabile detrimentum? mali natura boni colore depicta? Dimittere illam poena est, tenere verò tormentum. Quid, quòd mulieri ita indissociabiliter conjungitur, sive bonae, sive malae, ut non nisi funere alterius dissolvi possit connexio? Adde sterilitatem alterutrius, praesertim cum bona sunt, nec sit qui succedat haeres, Si verò proles multa, nec suppetat educatio, quale tormentum! Quid si probrosa proles & parentibus acerba, cum aliquo familiae dedecore, quotidiani hinc parentibus cruciatus. Si & illud contingat, ut alteruter conjugum violet fidem maritalem, quàm id sit lexcentis motibus  
into-

intolerabilius ! Imò si etiam suspicio sola adulterii mentem occupat , acerba illi omnis vita & minimè vitalis redditur , indomita enim zelotypiæ flamma morbum intolerabilem in animum inducit , cui non aliter mederi quàm morte adulteri aut stupratoris possunt.

*XVII. Divites in assiduïs angustijs.*

Quod ita *Perrus Blesensis Epist. 91.* describit : In habitatione terrena nihil est nisi labor & dolor , & quædam imago miseriæ infernalis. In vita & operibus tuis tota ferè facies inferni depingitur. Nec enim deest tibi unda Tantalii , Tithi jecur , Ixionis rota , urna Danaïdum , saxum Syssiphi , dum inter divitias esuris , dum sollicitudinibus anxiaris , dum cupiditate torqueris , dum ad illicita raperis , dum in saccum pertusum congregas , dum congregando divitias labore continuo & supervacuo te affligis. In idem recidit quod habet *S. Greg. lib. 15. Moral. cap. 11.* Mens avari , quæ priùs ex abundantia requiem quæsierat , post ad custodiam



diam gravius laborabit. Prius namque dolorem habuit in ipsa suæ concupiscentiæ fatigatione, qualiter concupita raperet, quomodo alia blandimentis, alia terroribus auferret. At postquam acquisitis rebus pervenit ad desiderium, alius hunc dolor fatigat, ut cum sollicito timore custodiat, quod cum gravi labore meminit acquisitum. Hinc inde insidiatores metuit, atque se hoc perpeti, quod ipse fecit aliis, pertimescit, formidat potentiorum alterum, ne hunc sustineat violentum, pauperem verò, cum concupiscit, suspicatur furem. Ipsa quoque, quæ congesta sunt, curat magnoperè, ne ex naturæ propriæ defectu per negligentiam consumantur. In his itaque omnibus, quia timor ipse poena est, tanta infelix patitur, quanta pati timet. Post hoc quoque ad gehennam ducitur, & æternis cruciatibus mancipatur. *Et addit*: Immolat avarus hominum corpora, quos expilavit, quos in fame reliquit per rapinas; immolat animas, quia hanc rapinam maledicta, convitia, indignationes consecutæ. Atque ita tot  
ani-

animarum est reus. At verò quàm suo malo irrevocabiliter inhæreat, spemque reditûs ad bonum excludat, dicit *S. Aug. Serm. 50. de SS.* Avarus dicit in corde suo: Quis nos separabit à cupiditate auri? tribulatio, an fames, an angustia, an persecutio? &c. Tribulantur enim avari, angustias patiuntur, famem, nuditatem, frigora; in tempestatibus sunt, in procellis, dum spoliantur & occiduntur propter aurum, dum pericula maris sustinent.

## CAPUT II. GRAVE JUGUM SUPER ECCLE- SIASTICOS.

**E** Adem ferè habent pericula Ecclesiastici Viri, qui degunt extra claustra, quæ seculares; neque habent remedia concupiscentiæ, uti Laici in matrimonio, quod *S. Cypr. de singul. Cleric.* his deploravit: O quanti & quales Episcopi  
& Cle-

& Clerici, simul & Laici post confessionem, id est, post martyrii, victoriarumque calcata certamina, & signa, (id est miracula) vel mirabilia usquequaque monstrata noscuntur cum his omnibus naufragasse, cum volunt in navi fragili navigare; quia juxta Asceticos Religiosi cœlum petunt per pontem, Clerici seculares navi, Laici natatu. Sed detur, quod etiam superent pericula, à carne tamen non levia illis alia imminet.

### *1. Quia reditus habent onerosos.*

Testatur id *S. Bern. Serm. 23. in Cantico*. Timeant Clerici, timeant ministri Ecclesiæ, qui in terris Sanctorum, quas possident, tam iniqua gerunt, ut stipendiis, quæ sufficere debebant, minimè contenti sint, & superflua, quibus egeni alerentur, impiè sacrilegèque sibi retineant, atque in usus suæ superbix atque luxuriæ victum pauperum consumere minimè vereantur, duplici profectò iniquitate peccantes, quod & aliena diripiunt, & sacris in suis vanitatibus & turpitudinibus abutantur. Simillima ante *S. Bernardum*

nardum dixit *S. Gregorius Magnus*. Ex his credo duobus capitibus positis horribilem format sententiam, ubi de Curatis in dignitate constitutis loquitur. *S. Chrys. Hom. 3. in Acta.* Non arbitror inter Sacerdotes multos esse, qui salvi fiant, sed multò plures qui pereant non tam propriis peccatis, quàm alienis, quæ non curaverunt.

Quid ita? Audi *Bernardum Serm. ad Clerum Rem.* Quod sine miserabili gemitu dicendum non est, Christi opprobria, sputa, flagella, clavos & lanceam, hæc omnia in fornace avaritiæ conflant, & pretium universitatis suis marsupiiis includere festinant.

*II. Ad magnam sanctitatem obligantur.*

Quantæ verò sanctitatis rei sint, docet *Idem lib. 3. de Sacerd.* Necessè est sic Sacerdotem esse purum, ut si in coelis ipse collocatus inter coelestes illas Virtutes medius staret. Imò tenentur quodammodo B. Virginis, atque ipsius Christi Domini sanctitatem æmulari; cum & ipsi Christum quodammodo pariant, & in

B

per-

persona Christum operentur. Inde *S. Greg. Nazian. Orat. 1. n. 125.* dixit: Sacerdos est Deus, & alios efficit Deos. Quocirca monuit *B. Laur. Iust. Serm. de Corp. Christi*: Accedat Sacerdos ad altaris tribunal, ut Christus, assistat, ut Angelus, ministret, ut Sanctus, populorum offerat vota, ut Pontifex, interpellet pro pace, ut mediator, pro se autem exoret, ut homo. *S. Isid. Pelus. lib. 2. epist. 206.* Tantum interesse debet inter Sacerdotem & quemlibet probum virum, quantum inter cœlum & terram discriminis est. Ad hanc verò sanctitatem vix majora habent adjuvamenta quàm Laici, certè eadem pericula ex conversatione, ex administratione œconomix, ex vanitate & ambitu, & aliis, de quibus *S. Paulinus epist. de gazophylac.* Ubique prætenti laquei, ubique stricti sunt laquei; inter insidias & pugnas vita transigitur, & per ignes doloso cineri suppositos ambulamus. Ecce quàm facilis lapsus! sed & quàm gravis!

Habet etiam Sacerdos ex eo specialem obligationem, ut sanctè vivat, quia sicut *Aaron Num. 16.* debet se pro populo op-



opponere iræ Dei, quomodò verò opponet, si ipse illam provocaverit? Audi-  
ant *S. Gregor. lib. 4. epist. 32. in dist. 13. ad Mauritium Imp.* Quæ virtus hu-  
mana, quod carnei robur brachii contra  
vestri Christianissimi culmen Imperii ir-  
religiosas præsumeret manus erigere, si  
studeret concors Sacerdotum mens Re-  
demptorem suum linguâ pro vobis, at-  
que ut oportebat meritis exorare? Aut  
quis ferocissimæ gentis gladius in necem  
fidelium tantâ crudelitate grassaretur, nisi  
vita nostra, qui Sacerdotes nominamur,  
& non sumus, à pravissimis gravaretur  
operibus? *Et post pauca exclamat: Cul-*  
*pa nostra hostium gladios exacuit, quæ*  
*Reipubl. vires gravat. Sacerdoti, ait Chry-*  
*sost. de Sacerdot. lib. 6. cap. 3. concredi-*  
*tus est mundus, ut ille bella oratione ex-*  
*tinguat, pacem & felicem statum compa-*  
*ret. Obligatur Sacerdos ad magnas virtu-*  
*tes, quia est ordinatus, ut Deo nostro ma-*  
*gno sacrificium offerat. Quod officium*  
*quantum sit, explicat S. Bern. Serm. ad*  
*Pastor. in Synodo* dum Sacerdotes in hunc  
modum alloquitur: Prætulit vos Deus

Regibus & Imperatoribus, prætulit Ordinem vestrum omnibus Ordinibus, imò prætulit vos Angelis & Archangelis, Thronis & Dominationibus: sicut enim non Angelos, sed semen Abrahamæ apprehendit ad faciendam redemptionem; sic non Angelis, sed hominibus, idque solis Sacerdotibus Dominici corporis & sanguinis commisit dispensationem. Quod si ita est, sequitur certè illud, quod ex dignitate ista infert *S. Chryst. lib. 6. de sacerdot. cap. 3.* Quantum à Sacerdote exigemus integritatem, quantam religionem? Considera enim, quales manus hæc administrantes esse oporteat? qualem linguam, quæ verba illa effundat? quâ denique re non puriorem, sanctioremque conveniat esse animam, quæ tantum illum tamque dignum spiritum receperit? Per id tempus & Angeli Sacerdoti adstant, & cœlestium Potestatum universus ordo clamores excitat, & locus altari vicinus in illius honorem, qui immolatur, Angelorum choris plenus est. Sacrificium offerunt, quod cum primò in cruce oblatum est, sol obscuratus, monumenta aperta,

ta, scissæ sunt petrae, terra mugit, aer obte-  
nebratus, natura tota conturbata est: sa-  
crificium offerunt extemæ obedientiæ,  
humilitatis, charitatis, etiam inimicorum;  
an ipsi ambire opes, odisse quempiam,  
superbire, refragari possunt? Hostia est  
sine macula, immaculatos requirit. *Chry-*  
*sost. Hom. 3. in Epist. ad Eph.* Regem non  
auderes osculari, si os tuum gravè oleret,  
& Regem cœlorum impudens oscularis,  
animâ tuâ vitiis olente. In cæterorum  
administratione Sacramentorum Sacer-  
dos canalis est, per quem sanguis Christi  
in alios descendit.

### III. Peccata Sacerdotum graviora.

*S. Isidor. Pelus. lib. 2. epist. 121.* Non  
est idem Laicum peccare quod Sacerdo-  
tem; idque ex lege perspicuè constat  
*Levitic. 4* Tantum enim ea, *id est lex*,  
pro Sacerdote peccante sacrificium offer-  
ri præcipit, quantum pro universa plebe.  
Quod si par esset peccatum, idem utique  
sacrificium minime indixisset. Majus  
porro peccatum efficitur non ob natu-

ram, sed ob perpetrantis dignitatem. *Et lib. 2. Epist. 208.* Consentaneum est, ut qui honore ac dignitate superiores sunt, hi quoque, si peccent, gravioribus suppliciis mulcentur. *S. Salvian. lib. 4. de gubern.* Ex hoc ipso Sacerdotes deteriores sumus, si meliores non sumus, qui meliores esse deberemus. Criminosior enim culpa est, ubi honestior status, honoratior est persona peccantis, peccati quoque major invidia. Atrocitis sub sancti nominis professione peccamus; sublimior est prærogativa, major est culpa.

Jam si Sacerdos est quoddam vas D E O sacrum, persona sacra, videtur quodvis peccatum aliquomodo de sacrilegio participare. *S. Bernardi hic est sensus*: Nugæ in ore secularis nugæ, in ore Sacerdotis blasphemix sunt; consecrasti os tuum Evangelio, talibus aperire illicitum, assuescere sacrilegium est.

Itaque si ipsæ nugæ sunt sacrilegia, quid tandem erunt alia graviora peccata? Videat itaque Sacerdos, an se non poterit, si peccaverit, verbis *S. Ambros. Serm. ad laps.*

*laps.* increpare : Sacrilegium est, ubi vas Christo oblatum, dedicatum Domino dementi temeritate polluisti. Memineris, quid sit factum *Dan. 5.* Balthasari. Quid de te arbitraris pariter, perditore ac perditor, qui vas rationabile consecratum Christo, sanctificatum Spiritui S. impiè temerasti, polluisti sacrilegè? Melius fuerat omninò te natum non esse, quàm sic natum, ut te sibi gehenna proprium filium vendicaret.

*IV. Obligantur ad exemplaritatem.*

Exemplares adeo debent esse Sacerdotes, ut *S. Basil. Reg. 80. cap. 8.* dixerit: Simus tanquam lux in mundo, ut & ipsi puri simus ab omni vitio, & eos, qui ad nos accedunt, illuminemus ad agnitionem veritatis. *S. Cypr. de unit. Eccl.* Quasi templum DEI converse semur, ut Deum in nobis constet habitare. *S. Greg. Hom. 7. in Luc.* Debemus pensare, quod à Domino sanctis dicitur Apostolis, & per Apostolos nobis: *Vos estis sal terre.* Si igitur sal sumus, condire mentes fide-



lium debemus ; ut, quisquis Sacerdoti jungitur, quasi è salis tactu, æternæ vitæ sapore conditur.

In eos, qui defunt exemplo, vel prævum exhibent sic *Bernard. Serm. in Synodo ad Pastores* invehitur : Defuisti partibus tuis ; pars tibi erit cum hæreticis, pars cum Ecclesiæ tyrannis. *Et addit : Multi sunt Catholici prædicando, sed hæretici sunt operando. Quod hæretici faciebant per prava dogmata, hoc faciunt hodie plures per mala exempla, seducunt scilicet populum & inducunt in errorem ; tantò prævalent opera verbis. Et ingemiscit : Nolunt soli perire, qui præire fidelibus debuerunt.*

In idem recidit dolor *S. Greg. Hom. 17. in Evang.* Nullum ab aliis majus præjudicium quàm à Sacerdotibus tolerat DEUS, quando eos, quos ad aliorum correctionem posuit, dare de se exempla pravitatis cernit.

*V. Periculum imminet, ne indigne ad sacrificium accedant.*

Jam vero, quia Sacramentum Eucharistiæ

nistia non solum ut Laici percipiunt, sed etiam conficiunt, duplo majus habent vinculum, ut digne accedant: ad quod si indignè accesserint, plus quàm judicium sibi manducabunt & bibent. *S. Bonaventura apud S. Antonin. Tom. 1. sess. 50. a. 2. c. 5. monet: Cave, ne nimis tepidus, & inordinatus atque inconsideratus accedas, quia indignè sumis, nisi accedas reverenter, circumspèctè, & consideratè; & vide, ne propter tumorem, aut vanam gloriam, aut consuetudinem, aut alicujus mundanæ complacentiæ, aut temporalis favoris respectu accedas; sicut multi diebus istis abutuntur ad sui perditionem. Et in Brevisloqu. p. 6. c. 9. Qui tepidè, & indevotè, & inconsideratè accedit, judicium sibi manducat & bibit.*

Quod verò officium sacrificantis attinet, ait *S. Chrysost. Homil. 38. in Matth.* Quo non oportet esse puriorem fruentem tali sacrificio? quo solari radio non splendidiorum manum carnem hanc dividendem? os, quod igni spirituali repletur? linguam, quæ tremendo nimis sanguine rubescit?

Quid putatis, si aliquis, non dico obscœna, sed profana in sanctuarium veteris legis intulisset, quantoperè DEUM offendisset? Atqui, teste eodem *Chrysoſt.* *Homil. 30. in 2. Corinth.* os istud sacrificantis ipso quoque propitiatorio augustius, atque terribilius est.

Quid si aliquis vase, quod sordibus impletum fuit, & paulo ante nec satis repurgatum, vellet sacram Hostiam excipere? quid si manus sanguine manantes Domino pacis admoveere? Quis scit, an lugeat Samuel, quòd unxerit Saulem? Quis scit, an non feratur sententia tanquam contra proditorem intingentem manum in paropside? Uti hîc libet verbis *S. Hieronymi ad Sabinianum*, licet paululùm mutatis: Non times, ne Christus de Hostia contra te clamet? ne puerpera Virgo te increpet? ne Mater Domini te accuset?

Quid sit verò dignè ad hanc mensam accedere, innuit *S. Bern. Serm. 3. in Psal. 90.* Quid est manducare ejus carnem, & bibere ejus sanguinem, nisi communicare possessionibus ejus, & eam con-

vet,

versationem imitari, quàm gessit in carne? *S. Chrysostomus Homil. 24. in 1. Cor.* Qui ad hoc corpus accedit, nihil ei cum terra commune esse debet. *S. Cyrillus Alex. lib. 2. Glaphyrorum in Exod.* Oportet eum, qui semel communicavit Christo, quasi incitato, ardentique animo ad omnem virtutem contendere, & istam, quæ in mundo est, abominabilem voluptatem præterfugere. *S. Augustinus Serm. 1. de temp.* Mutet ergo vitam, qui vult accipere vitam, nam si non commutet vitam, ad iudicium accipiet vitam.

Et hæc quidem de Laicis isti Patres sancti dixerunt: at verò de Sacerdotibus *B. Laurentius Justin. de discipl. & perfect. c. 9.* Alia Sacerdotum, alia cæterorum debet esse consideratio, & mentis dispositio; excellentior quippe gradus perfectiorem exigit præparationem. Unde *S. Bernard Serm. de tripl. custodia* dicit de se aliisque Sacerdotibus: Nobis ad immunditiam minima quævis inobedientia (præcepti divini) sufficit; nec jam nævus est, sed gravis macula, si in actionibus

nibus nostris vel minimorum residet negligentia mandatorum.

Et unde hoc? Explicat *Idem Serm. 8. in Psal. Qui habitat.* DEO dicata membra nullâ tibi temeritate usurpes, sciens, quia pietati sanctificata non absque gravi sacrilegio in usum vanitatis, curiositatis, voluptatis, aut ejusmodi secularis operis, assumuntur.

Unde *Idem* lamentatur *de Conversione ad Clericos cap. 17.* Nemo magis iram meretur quàm inimicus simulans amicum, id est, *sacra persona posita in peccatis.* Væ ministris infidelibus, qui nondum reconciliati reconciliationis alienæ negotia, quasi homines qui justitiam fecerint, apprehendunt. Væ filiis iræ, qui se filios gerere profitentur. Væ filiis iræ, qui pacificatorum sibi usurpant gradus, & nomen non verentur. Væ filiis iræ, qui fideles sese mediatores pacis, ut peccata populi comedant, (id est *beneficia à benefactoribus pro peccatis erecta*) mentiuntur. Væ qui ambulantes in carne, DEO placere non possunt, & placere velle præsumunt.

Et



Et cap. 29. Curritur passim ad sacros Ordines, & reverenda quoque ipsis Angelicis spiritibus mysteria homines apprehendunt sine reverentia, sine consideratione. Neque enim signum regni occupare cœlestis, aut illius timent imperii gestare coronam, in quibus avaritia regnat, imperat ambitio, dominatur superbia, sedet iniquitas, luxuria etiam principatur. Ingrediuntur cum macula tabernaculum DEI viventis, inhabitant cum macula templum sanctum DEI polluentes, judicium multiplex accepturi. Tales non modò non placant Deum, sed etiam irritant, dum videntur in cordibus suis dicere: *Non requiret*. Irritant planè & insensum reddunt sibi, venerator ne & his, quibus illum propitium reddere debuerant. Effet sine dubio melius, salvari in humili gradu fidelis populi, quàm in Cleri sublimitate & deterius vivere, & districtius judicari.

*VI. Strictius judicabuntur.*

Districtius certè judicari; nam difficilius videntur misericordiam consequi.

Idem

*Idem sanctus Pater Bernardus ad illud  
Isaia 26. Misereamur impii &c. Sermone  
23. in Cantic. Non misereamur; in ter-  
ra, ait Propheta, Sanctorum iniqua ges-  
sit, & non videbit gloriam Domini. Ter-  
ra Sanctorum sunt Ecclesiastica beneficia.*

*In declamatione verò Idem ait: Cleri-  
cus, qui partem habet in terra, non ha-  
bebit in cælo partem. Clericus si ali-  
quid habuerit præter Dominum, pars  
ejus non erit Dominus; v. g. si aurum,  
si possessiones, si variam supellectilem,  
cum istis pars ejus fieri non dignatur Do-  
minus. Et tandem: Cum cœperint re-  
surgere homines, unusquisque in ordine  
suo, ubi putas ista generatio Clericorum  
locabitur? Si ad milites fortè diverterint,  
exsufflabunt eos, qui minimè secum la-  
bores aut pericula tolerârunt; sic agrico-  
læ, sic negotiatores, & singuli quique  
ordines hominum à suis eos similiter ar-  
cebunt finibus, utpotè qui in labore ho-  
minum non fuerint. Quid igitur restat,  
nisi ut, quos omnis ordo repellit & accu-  
sat, eum sortiantur locum, ubi nullus or-  
do, sed sempiternus horror inhabitat.*

*VII. Quia etiam alienorum peccatorum sunt rei.*

Rationem duri iudicii ex eodem *S. Patre ibid.* desumimus, ubi sic alloquitur Sacerdotem: Peccata populi comedis, ac si tua tibi non sufficere viderentur. Sollicitus esto, tanquam rationem redditurus pro eis, gemitus fundere, dignos agere pœnitentiæ fructus, alioquin tibi ea noveris imputanda, quæ modo inter delicias comedis, & parvipendis, & dissimulas tanquam nihil attinentia tibi! O iudiciorum DEI abyssus multa! ô terribilis DEUS in consiliis super filios hominum! Venient, venient ante tribunal Christi, audietur populorum querela gravis, accusat o dura, quorum vixere stipendiis, nec diluere peccata, quibus facti sunt duces cœci, fraudulentii mediatores. Quid tibi insipiens? &c. Similia dixit *S. Gregor. Hom. 17. in Evangel.*

*VIII. Non est, qui pro eis oret.*

Sed non minus est grave, quod *idem S. Gregor. l. 2. in 1. Reg. cap. 3.* scripsit:  
Cum

Cùm Sacerdos in culpam labitur, superior persona non est, cujus precibus expiatur. *Si sal evanuerit, in quo salietur?* Quis orabit pro eo? Quo profectò culpæ magnitudo monstratur; quia plerique eorum (*adverte, quid dicat*) à Domino in impenitentis cordis caliginem projiciuntur, & nullâ hominis adhortatione resipiscunt. Quare aptè subjungitur de filiis Heli: *Non audierunt vocem patris sui, quia voluit eos Dominus occidere.*

In idem tendunt quæ alicubi dixit *Hieronymus*: Si peccaverit populus, orabit pro eo Monachus; si autem Monachus lapsus fuerit, orabit pro eo Sacerdos; quod si & Sacerdos peccaverit, quis orabit pro eo?

*IX. Quia Sacerdotes male vitæ  
sunt specialiter maledicti à  
DEO.*

Rem hanc ipsius DEI verbis dabo, quæ ex *lib. 1. Revel. S. Brigitt. cap. 47.* desumo, ubi loquitur de Sacerdotibus peccatoribus: Ecce tales Sacerdotes non sunt

sunt mei Sacerdotes, sed viri proditores; ipsi enim & me vendunt quasi Judas, & produnt. Ego conspicio Paganos & Judæos, sed nullos video iis deteriores, quia ipsi Sacerdotes sunt in eodem peccato, quo cecidit Lucifer. Nunc etiam dico tibi iudicium eorum, & cui sunt similes. Horum iudicium est maledictio. Sicut maledixit David eis, qui non obedierunt: sic ego, qui melior sum quam David, maledico eis. Maledictum sit ergo omne, quod de terra utilitatem suam receperint. Maledictus sit cibus & potus eorum, qui intrat in os eorum, qui pavit corpus in cibum vermium & animam ad infernum. Maledictum sit corpus eorum, quod resurget in infernum sine fine arsurum. Maledicti sint anni eorum, quibus vixerunt inutiliter. Maledicta sit hora, quæ incipit eis in inferno, & nunquam finietur. Maledicti sint oculi eorum, quibus vident lumen cœli. Maledictæ sint aures eorum, quibus audiebant verba mea, & non curabant. Maledictus sit gustus eorum, quo gustaverunt dona mea. Maledictus sit tactus eorum,



eorum, quo tractaverunt me. Maledictus sit odoratus eorum, quo odoraverunt delectabilia, & me neglexerunt delectabiliorem super omnia.

Sed quæritur, quomodo maledicuntur? utique. Maledictus erit visus eorum, quia non videbunt visionem DEI in me, sed tenebras & poenas inferni. Maledictæ sunt aures eorum, quia non audient verba mea, sed clamorem & horrorem. Maledictus est gustus eorum, quia non gustabunt de bonis meis æternum gaudium, sed amaritudinem æternam. Maledictus est tactus eorum, quia non tractabunt me, sed ignem perpetuum. Maledictus est odoratus eorum, quia non odorabunt odorem illum suavissimum in regno meo, excedentem omnia aromata, sed foetorem in inferno habebunt amariorem felle, & pejorem sulfure. Maledicti sunt à cælo & terra, & ab omnibus creaturis insensatis, quia ipsi obediunt DEO, & laudant, & isti spreverunt. Propterea juro in veritate mea, quia sum veritas, quòd si sic moriuntur & in tali dispositione

tionem, quâ nunc constituti sunt, nunquam charitas mea, nec virtus concludet eos in se, sed sine fine damnabuntur.

*Et capite sequenti*, postquam Sacerdotes malos comparavit Sacerdotibus Beelzebub, subiungit: Sed quid dictum est Moyfi? Interfice eos. Sic nunc venient verba mea, quæ occident eos, alios ad corpus & animam per æternam damnationem, alios ad vitam, ut convertantur & vivant, alios ad celerem mortem, quia ipsi Sacerdotes sunt mihi omnino odiosi. *Et post pauca*:

Ideo iuro in Deitate mea & humanitate, Angelis omnibus audientibus, quod frangam ostium, quod clauferunt super voluntatem meam, & ipsa complebitur, & eorum voluntas annihilabitur, & claudetur sine fine in poena. Propterea, sicut antiquitus dictum est, incipiam iudicium meum in Clero, & ab altari meo.

Sed redeamus ad maledictiones mali Sacerdotis etiam in hac vita, ita enim *l. 5. Revel. cap. 9.* Christus Dominus loquitur: Cum accedit ille Presbyter ad altare meum,

meum, adstant ad latera ejus dæmones, cujus & animam inhabitant, quia ipsa est inortua à me. Cùm imponit sibi superhumerales, dæmones obumbrant animam ejus, ut non cogitet, & non intelligat, quàm terribile est accedere ad altare meum, & quàm mundus esse deberet, qui mihi mundissimo adstare debet. Cùm induit se albâ, duritiâ cordis & indevotione inducitur, quia cogitat, peccatum suum non esse grave, supplicium æternum futurum non magnum. Cùm sibi imponit statam, diabolus grave jugum imponit collo ejus, ita quòd delectat eum peccati dulcedo, & sic onerat animam ejus, quòd non finit eum ingemiscere, vel considerare peccatum suum. Cùm imponit sibi manipulum, omnia opera ad DEUM sunt sibi gravia, & onerosa, & erubescibilia, terrena autem levia. Cùm autem cingit se cingulo, tunc ligatur voluntas ejus cum diabolo, ita quòd velit & proponat morari in peccato, & tunc dissolvitur charitas mea cum eo, quia voluntas ejus est ad omne illud, quod diabo-

diabolus ei inspirat in mentem, nisi refrænaretur occulto iudicio meo. Cum induit se casulam, tunc perfidiâ induit eum diabolus. Quando autem legit Confiteor, dæmones respondent: mentitus es, nos sumus testes, quòd confessio ejus similis est Judæ, quia dicit aliud ore, aliud habet in corde. Cum accedit ad altare, tunc ego avertō faciem meam ab eo. De quocunque autem legit Missam, sive de Matre mea, sive de Sanctis, sic mihi carum est, ac si meretrix menstruum suum in vase positum offerret alicui Nobili ad bibendum; aut si aliquis diceret inimico suo: cave tibi, ego quæro damnum tuum. Quando verò consecrat corpus meum, & dicit: Hoc est corpus meum, tunc fugiunt dæmones ab eo, & corpus ejus remanet quasi truncus, quia anima ejus mortua est ante oculos meos. Cum autem corpus meum applicat ad os suum ex præsumptione illa, omnis turba dæmonum revertitur ad eum, quia charitatem nullam ad me habet, ipse stercus mundi habet in ore, in corde autem sunt

sunt vermes scaturientes. Pascet illum aquila illa abominabilis , cujus consuetudo est pullis suis post satietatem aliquo tempore subtrahere necessaria , ita quòd macies ex fame proveniens omni tempore apparet in eis : sic diabolus delectatione suâ ad tempus pascet eum , ut postea famem gaudii sentiat , & durabit sine fine in eo. Verumtamen cùm vivit , misericordia mea aperta est ei , si convertatur.

Neque illa DEI severitas nimia est , quia , ut ipse dicit *lib. 4. cap. 134.* Sacerdotes præ omnibus Angelis & hominibus elegi , & super omnes honoravi ; ipsi autem præ omnibus Judæis & Gentilibus , & præ omnibus dæmonibus me magis provocant.





CAPUT III.

GRAVE JUGUM  
SUPER PRÆLATOS  
IN ECCLESIA.

1. *Quia difficulter salvantur.*

**T**Erribile est effatum Prælati in Ec-  
clesia *S. Chrysoſt. Hom. 34. in Epist.  
ad Hebr.* Miror, ſi poteſt ſalvari  
aliquis Rectorum Eccleſiæ.

Idiſum repetit, ſimulque dicto cau-  
ſam adjicit *Hom. 3. in Acta*, idque cum  
quanta affirmatione! Non temerè dico,  
ſed ut affectus ſum, ac ſentio: Non arbi-  
tror, inter Sacerdotes multos eſſe, qui  
ſalvi ſiant, ſed multò plures, qui pereant.  
Quod alii peccant, Sacerdoti imputa-  
tur. *Et infert in Luc. 2.* Quis eſt, qui  
deſiderat Prælationem, niſi qui non ti-  
met judicium DEI!

Hinc tantoperè ſancti viri iſtas di-  
gnitates & fugiebant, & cenſebant fu-  
giendas. Scribitur in *Schola SS. Pa-*

*trum fol. 174.* Fuit sermo factus coram B. Jordane Ordin. Prædic. de quodam Patre, viro probo, ac virtutibus prædito, quòd Antistes jure optimo fieri debeat; at vir D E I respondit : Mallem eum feretro mortuum sociare , quàm in cathedra videre Antistitem sedentem.

Et quid ita? Plura illis commissa, pluribus reddenda sunt. Tot animas habent, quot oves. *S. Gregor. p. 1. past. c. 5.* Ex tantis procul dubiò rei sunt, quantis venientes in publicum prodesse potuerunt, nec profuerunt.

## *II. Magnâ sollicitudine subditos curare debent.*

Quantum verò amorem & sollicitudinem debeant subditis, patet ex mandato DEI ad Moysen Num. 11. *Porta eos in sinu tuo, sicut portare solet nutrix infantulum, & defer in terram.* Quid si fuerint discoli? porta. Quid si affecerint contumeliis? porta. Quomodo? *sicut nutrix infantulum*; ita ut non ille se tibi, sed tu illi debeas te aptare juxta 1. Thessal. 2. *Facti sumus par-*  
vuli

vuli in medio vestrum, tanquam si nutritrix foveat filios suos, non alienos.

### III. Quia hæc cura eget magnâ patientiâ.

Hanc curam explicat, & in S. Moyse ostendit *S. Ambros. lib. 2 de offic. cap. 7.* Quantas Moyses à populo DEI illatas absorbebat contumelias ? & cùm Dominus in insolentes vindicare vellet, se tamen pro populo offerebat frequenter, ut indignationi Divinæ plebem subduceret. Quàm miti sermone post injurias appellabat populum, solabatur in laboribus, deliniebat oraculis, fovebat operibus, & quamvis cum DEO constanter loqueretur, homines tamen humili & grata appellatione affari solebat. Discite (*alloquitur Prelatos S. Bernardus Sermone 23. in Cant.*) subditorum matres vos esse debere, non Dominos.

Sed ad Moysen redeamus. De illo *S. Hieronym. in epist. ad Theophilum adv. error:* Lapidabatur à populo, & pro lapida-

pidantibus orabat. Causam, quare Prælati debeant tam duram sollicitudinem subditis, reddit *S. Chrysoſt. in Epist. ad Galatas*: Non enim propterea te DEUS illis præfecit, ut majus acquiras obsequium ac famulatum, sed ut neglectis rebus tuis, quidquid illorum est, ritè dispensetur ac ædificetur.

#### IV. Magna charitate.

*B. Laurent. Justin. de instit. & regim. Prælat. cap. 4.* Prudentis Patrisfamilias (ita vocat Prælatum) hoc semper est proprium, uniuscujusque subditi curam gerere, singulorumque necessitatibus providere, nullum spernere, nulli commoda opportuna subtrahere, quin potius omnes corporali pabulo alere, universos salutari doctrinâ imbuere, cunctosque juxta singulorum necessitatem ac qualitatem, ut filios, charitatis brachiis adstrictos tenere.

Ex quibus Idem deducit potissimum Prælatos malos afflicturam illam horribilem sententiam: *Ita maledicti in ignem*  
*atque*

*eternum, esurivi enim & non dedisti  
mihi, &c.*

### *V. Magnâ sanctitate.*

*Idem B. Laurent. Justinianus ibid. c.*

16. Quamobrem Pastores animarum, tanquam cæteris perfectiores, nedum impudici amoris opera, verum etiam inordinatæ affectionis motus de cordis sui debent rescare habitaculo, ut impollutum sit & sanctum, dignumque ad suscipiendum DEI verbum, quoties in istud eadem reclinare libuerit.

*S. Gregor. lib. 1. Epist. 24.* Omni curâ vigilandum est, ut Rector Ecclesiæ cognitione sit mundus, operatione præcipuus, discretus in silentio, utilis in verbo, singulis compassione proximus, præ cunctis contemplatione suspensus; bene agentibus per humilitatem socius, contra delinquentium vitia per zelum erectus &c.

### *VI. Magnâ scientiâ.*

Sed & scientia Prælati opus. Ita  
*idem Greg. in Pastor. p. 1.* hos duos tex-



tus combinat: *Isaiæ 56. Ipsi pastores ignoraverunt intelligentiam. 1. Corinth. 14. Si autem quis ignorat, ignorabitur.* Tanta verò scientia debet esse, ut alii eam ex ore Prælati requirant, ut dicitur apud Prophetam. Debent enim quemvis verbo suo ad bonum ducere. *Malach 2. Sacerdos enim Angelus est Domini exercituum, id est, nuntius*, qui debet ejus voluntatem scire, à quo mittitur, & illam denunciare; ille enim dicitur *Isai 58. Clama, ne cesses, quasi tuba exalta vocem tuam, annuntia populo meo peccata eorum.* Inde Sacerdos ingrediens Sanctuarium in lege veteri ambiebatur tintinabulis, hoc est, ut *S. Greg. lib. 1. Regest. epist. 24.* exponit, ut voces prædicationis habeat Sacerdos: namque ingrediens, vel egrediens moritur, si de eo sonitus non audiatur, hoc verò non potest esse absque magna sui mortificatione. *1. Cor. 9. Castigo corpus meum, & in servitutem redigo, ne forte, dum aliis predicaverim, ipse reprobus efficiar.* Et tamen jam fuit in tertio cœlo, & ut *Tyrinus* docet, jam vi-

gia-

ginti & tres annos laborum explevit,  
in senioque profecit. Ad quod *S. Aug.*  
*Serm. de verbis Apostoli* : Quid faciat  
agnus, quando aries tremat ?

Oportet enim in hoc munere ita ad  
omnia paratum esse, sicut fuit *S. Chrysost.*  
*epist. 12. ad Cyriac.* Si Imperatrix serrâ me  
dissecare vult, dissecet, Isaiam pro ex-  
emplo habeo ; si me in mare præcipi-  
tem dare vult, Joannem in memoriam  
redigo ; si in fornacem conjicere, tres  
habeo pueros eodem supplicio affectos ;  
si feris objicere, Daniele mihi propo-  
no ; si lapidibus me vult obruere, Ste-  
phanum habeo Protomartyrem ; si ca-  
put meum accipere, accipiat, Joannem  
habeo.

Sed exclamat *Gregor. Hom. 17. in E-*  
*vangel.* Ecce mundus Sacerdotibus ple-  
nus est, sed tamen rarus invenitur ope-  
rator, quia officium quidem sacerdota-  
le suscipimus, sed opus officii non im-  
plemus. *Et rursus* : Ecce in maje-  
state terribili inter Angelorum atque  
Archangelorum choros Iudex videbitur.  
In illo tanto examine electorum omni-

nam ac reproborum multitudo deducetur, & unusquisque quid sit operatus, ostendetur. Ibi Petrus cum Judæa conversâ, quam post se traxit, apparebit: ibi Paulus conversum, ut ita dixerim, mundum ducens; ibi Andreas post se Achaïam, ibi Joannes Asiam, Thomas Indiam in conspectum sui Judicis conversam ducet; ibi omnes Dominici gregis arietes cum animarum lucris apparebunt. Cum igitur tot pastores cum gregibus suis ante æterni Pastoris oculos venerint, nos miseri quid dicturi sumus!

## VII. Magnâ lenitate.

Audiamus S. Chrysostomum de lenitate Hom. 3. ad popul. Vis fratrem corrigere? lacrymare, ora Deum ex corde, apprehensum admone, consule, exhortare, demonstra charitatem erga peccatorem, persuade ipsi, quod consulens & curans, non pervulgare volens, peccati ipsum commonefacis; comprehende pedes, osculare, ne erubescas, si modò verè

verè mederi velis. Hæc & Medici faciunt, sæpius difficiles ægrotos habentes, deosculantes, rogantes persuadent salutarem sumere medicinam.

### *VIII. Magno labore.*

Idem *Hom. 29. in Epist. ad Rom.* Perpendamus ovium pastores illos, qui in regione Cappadocum sunt, qualia & quanta pro pecorum suorum studiis patiantur. Illi sæpenumerò universum tri-duum nivibus obruti perseverant. Dicuntur autem & qui in Lydia non minora mala ferre, dum integros menses difficilem illam solitudinem, pessimarumque bestiarum plenam vagando circum-eunt. Si tantum erga pecora diligentiae impendunt pastores illi, quam, quæso, excusationem habebimus, quibus rationales animæ concreditæ sunt? &c. An ignoras gregis hujus dignitatem? an illius gratiâ Dominus tuus innumera non fecit? an non postremò & sanguinem suum fudit? tu verò requiem quæris?

De Pharifæis scriptum est Matth. 23. quod *circuirent mare & aridum*, ut *unum facerent profelytum*. Ita illi laborabant. Scriptum est rursus: *Nisi iustitia vestra abundaverit plûs quàm Scribarum & Phariseorum*, non *intra-bitis in regnum cœlorum*. Exclamat Greg. lib. 2. *Regest. indict. 10. Epist. 39.* Quid nos, ô pastores, agimus, qui & mercedem consequimur, non ut olim Pharifæi, qui cum suo profelyto in gehennam abibant, & tamen operarii nequaquam sumus.

### IX. Magnâ exemplaritate.

*S. Bern. Serm. de tribus Ordin. Eccles.* Qui docet & non facit, talis occasio plurima damnatio Prælati, plurima perditio subditorum est. Unde *Idem in Cant. Serm. 10.* Qui animas susceperunt regere, quod sine miserabili gemitu dicendum non est, Christi opprobria, sputa, flagella, clavos, lanceam, crucem, & mortem, hæc omnia in fornace avaritiæ conflant, & profligant in acquisitione-



tionem turpis quæstûs, & pretium universitatis suis marsupiis includere festinant; hoc sanè à Juda Iscariotis differentes, quod ille horum omne emolumentum denariorum numero compensavit, isti voraciori ingluvie lucrorum infinitas exigunt pecunias; animarum nec reputatur casus, nec salus.

Et quod est horribilius *Serm. 23. in Cant.* addit: Pauci qui utiliter, pauciores qui & humiliter præstint. Cernitur hinc DEUS justo sed occulto judicio suo, reproborum nec diluens mala, nec acceptans bona, insuper & corda inducans, ne fortè doleant, & convertantur, & resipiscant, & sanet eos; & hoc non absque certa, & æterna ratione, quod tantò formidolosius constat esse, quantò immobilius fixum extat in æternitate.

Hoc sanè expenso subjicit *Serm. 30.* Miror audaciam plurimorum, quos videmus de suis vineis, id est, de subditis non colligere nisi spinas & tribulos, id est, opes, vineis tamen Dominicis etiam se ingerere non vereri. Fures sunt & la-

trones, non cûstodes, neque cultores. *Et Serm. 77.* Diligunt munera, nec possunt pariter diligere Christum.

Talibus eveniet, quod scripsit S. Cyprianus *lib. de sing. Cleric.* Non invenient in die iudicii ullum omninò solatium, qui alienigenis & fratribus peccandi fomitem ministrârunt.

### X. *Etiâ pro aliis punientur.*

Vehementer enim subditi malâ vitâ superiorum scandalizantur, & in hoc sensu fortassè dixit *lib. 2. in 1. Reg. cap. 5. Magnus Gregorius*: Magnus nobis Prælati timor inculitur, quia Heli filiorum culpâ damnâtur, ejus propria peccata nulla referuntur. Nam bonis subditis ad salutem sufficit benè vivere; Prælati verò propria vita non sufficit. *Idem ibid.* Scriptum est, si peccaverit vir in virum, placari ei DEUS potest, si autem in DEUM peccaverit, quis orabit pro eo? Quicumque aut suam, aut alterius fidelis animam ad peccandum pertrahit, in DEUM peccare convincitur,

citur, quia ei sua propria auferre niti-  
tur.'

*XI. Ratio illis talentorum  
incumbit.*

Sed non solum pro culpis, verum  
etiam pro talentis malè administratis pu-  
nientur. Nam *idem S. Doctor eodem*  
*loco*; Pastorum culpæ subtiliùs judican-  
tur, & non solum peccata eis poenam  
ultionis aggravant, verum etiam mune-  
ra concessa, & singula ad tormentum  
veniunt, quæ malè fuisse servata com-  
probantur.

Unde *B. Laur. Justin. de Christi ago-*  
*ne cap. 26.* Audiant, qui inconsultè re-  
gunt, quid de ipsis Divinus sermo Sap.  
9. contineat; *Judicium*, inquit, *fiet du-*  
*rissimum iis, qui præsunt.*

*XII. Debent esse à Deo vocati  
ad suum munus.*

Jam si ad hoc munus à D E O non  
sunt electi, damnationi sunt obnoxii.  
Ex *S. Gregor. eodem loco* patet: Osee 8.

*Ipsi regnaverunt, & non ex me, Principes existerunt, & ego ignoravi.* Ex sena nque, & non ex electione supremæ dignitatis regnant, qui ad gloriam Ecclesiastici culminis non vocantur divinitus, sed per cupiditatem deducuntur: quos profectò Dominus ignorat, quia eos per internæ æquitatis judicium reprobatur. *Et paulo post:* Quia ad sacerdotium indignus accesserit, vel in eo indignè vixerit, condemnatur. Certè indignè accedet, qui non est vocatus.

Quem ergo DEUS vocavit? Respondet *idem S. Doctor:* Illum DEUS ad suum ministerium Sacerdotem deligit, qui juxta cor ejus & animam facit. *I. Reg. 2. Suscitabo mihi Sacerdotem fidelem juxta cor meum & animam meam.* Sed quis est juxta cor & animam? Cordis & animæ illud præceptum est Joan. 5. *Diligite invicem, sicut dilexi vos.* Luc. 6. *Diligite inimicos. Quæ vultis faciant vobis homines, facite illis.* Hæc & ejusmodi cordis & animæ præcepta sunt. Sacerdos ergo fidelis per hoc indicium noscitur,

si videlicet juxta cor & animam ejus operatur.

Sed aliquando improbus à DEO assumitur Prælatus, ut qui ei succedit, dum horret vitam Antecessoris, sectetur sanctitatem. Docet id prædictus *S. Pater lib. 4. in 1. Reg. cap. 8.* Fortasse idcirco reprobis Saul eligitur, ut electus ejus successor Rex David in eo cognosceret, quid cavere debuisset. Sic nimirum & de illa Angelorum curia legimus, quia de apostata Angelo Job. 40. dicitur: *Ipse est principium viarum Domini.* Sed qui ante omnia conditus est, per superbiam cecidit, & in ejus ruina sancti Angeli didicerunt, quâ virtute stare potuissent.

Signum etiam hoc vocatorum à DEO ponit *lib. 4. in 1. Reg. c. 5.* Qui à Domino ad regendum alios ordinantur, spiritualia charismatum dona, quibus eis prodesse possunt, accipiunt, & eis, quos ordine præcedunt, meritis etiam superiores sunt.

Aliud etiam signum Divinæ vocationis *ibidem* ponit: Signum suæ unctio-  
nis



nis electi cognoscere possunt ; quâ eos ungit vocando Spiritus S. quia nimirum tunc à DEO ad S. Ecclesiæ culmen perducuntur , cùm per verba & exempla idonei sunt ad salutem alienam , & per quietem studiosi ad suam. Quales certè nec sunt pueri , nec pseudo-politici , nec idiotæ.

### *XIII. Caveant, ne aliquem scandalizent.*

*S. Greg. Past. p. 3. c. 1.* Scire Prælati debent, quia si perversa unquam perpetrant, tot mortibus digni sunt, quot ad subditos suos perditionis exempla transmittunt. Unde necesse est, ut tantò se cautiùs à culpa custodiant, quantò per prava, quæ faciunt, non soli moriuntur. His dicitur Prov. 6. *Fili mi, si sponderis pro amico tuo, defixisti apud extraneum manum tuam, & illaqueatus es verbis oris tui, & captus propriis sermonibus.* Spondere namque pro amico est alienam animam in periculo suæ conversationis recipere : verbo oris sui  
illa-

illaqueatus est, quia dum commissis sibi cogitur bona dicere, ipsum prius necesse est, quæ dixerit, custodire.

Sed idem lamentatur *Homil. 17. in Evang.* Nullum puto ab aliis quàm à Sacerdotibus majus præjudicium tolerat DEUS, quando eos, quos ad aliorum correctionem posuit, dare de se exempla pravitatis cernit, &c. Ingrediuntur tamen electi Sacerdotum manibus expiati cœlestem patriam, & Sacerdotes ipsi per vitam reprobantur, & ad inferni supplicia festinant.

Quid ad hæc illi gregis pastores, quos *Tertullianus* olim amarissimè risit *lib. advers. Judæos c. 2.* Infantes in prælium (spirituale) erumpunt, credo ad solem victi prius, dehinc pannis armati, & butyro stipendiati, quî neque norint lanceare, neque lancinare.

Sed & *S. Bernard. Epist. 42.* Scholares pueri, & impuberes adolescentuli ob sanguinis dignitatem promoventur ad Ecclesiasticas dignitates, & de sub ferula transferuntur ad principandum Presbyteris, lætiores interim, quòd virgas  
eva-

evaferint, quàm quòd meruerint principatum.

Claudamus hoc caput ſententiâ *Magni Doctoris S. Aug. ad Valerium Epiſc. Epiſt. 147.* Ante omnia peto, ut cogitet religioſa prudentia tua, nihil eſſe in hac vita, & maximè hoc tempore, facilius & lætius, & hominibus acceptabilius, Epiſcopi aut Presbyteri, aut Diaconi officio, ſi perfunctoriè atque adulatoriè res agatur. ſed nihil apud DEUM & miſerius, & triſtius, & damnabilius.

Concludo verbis *S. Hieron. lib. 1. in Matth c. 5.* Sal appellantur Apoſtoli & Doctores, quia per illos univerſum hominum conditur genus. Quod ſi ſal evanuerit, in quo ſalietur? ſi Doctor erraverit, à quo alio Doctore emendabitur? ad nihilum valet ultra, niſi ut mittatur foras, & conculcetur ab hominibus. Caveant ergo Doctores & Epiſcopi, & videant, potentes potenter tormenta ſuſtinere, nihilque eſſe remedii, ſed majorem ruinam ad tartarum ducere.

CAPUT IV.

GRAVE JUGUM  
SUPER OMNES  
SERVOS DEI.

*I. Ignorantia statûs nostri in supernaturalibus.*

**N**escimus, an actus virtutum naturales, an verò supernaturales eliciamus; quod si naturales, per illos vitam æternam non meremur. Nescimus, an in gratia DEI, an vivamus in odio, ac proinde, an opera nostra placeant. Nescimus perseveraturos nos in bono, & cùm simus obnoxii semper peccato, omnia, quæ longo acquisivimus labore, in momento amittere possumus, neque in æternum reparare.

*II. Persecutio virtutem sequitur.*

Omnes, qui piè volunt vivere in Christo, persecutionem patientur, & hoc sem-

semper. *S. Leo Serm. 9. in Quadrag.*  
Nunquam deest tribulatio persecutionis,  
si nunquam desit observantia pietatis.

Jam verò quàm facilè est à tribulatio-  
ne vinci, ac virtutis moveri statione?  
Concitat verò tribulationes internas, ac  
sæpè externas hostis noster, quem pro-  
vocamus, dum viam ingredimur virtu-  
tis; ille autem est viribus, vafritie, victo-  
riis valentissimus, & tam certò nobis im-  
minens, ut monuerit Sacra Scriptura Eccl.  
2. *Fili, accedens ad servitutem DEI, sta  
in timore, & prepara animam tuam ad  
tentationem.*

Et *S. Aug. in Psal. 141.* Scito, quòd in  
medio laqueorum pertransis. Quid est  
in medio laqueorum? in via Christi, &  
hinc laquei, laquei à dextris, laquei à si-  
nistris.

Ita sumus constituti, quomodo si cir-  
cumeat nos leo, quærens, quem devo-  
ret, quomodo si hostis, ut jugulet, quem  
nos tamen minimè videamus. Et qui-  
dem si per tentationes & adversa non  
evadimus meliores, periculum est, ne si-  
mus sine DEO, uti advertit *S. Aug. in  
Psal.*



*Psal. 21.* In quibus habitat Deus, utique in tribulatione meliores fiunt, tanquam aurum probati.

Ulcus sese tangi non finit, caro sana manum sustinet; bonus stomachus cibos etiam duriores vertit in alimentum, malus optimos corrumpit. *S. Greg. prefat. in moral. cap. 2.* Sicut unguenta commota laticis redolent, & aromata cum incenduntur, fragrantiam suam expandunt: ita viri sancti, qui virtutibus redolent, in tribulatione innotescunt.

Imò si tribulatio nobis non prodest, teste *S. Gregor. Nysseno*, seculo nondum exoluti sumus. *Orat. 8. de beatitud.* Ubi vivus sermo & efficax penetravit in eum, qui verè fidem suscepit, tunc damno rerum terrenarum non tristatur, sed luctu coelestium lætatur: propterea omne genus suppliciorum, tanquam subsidium & auxilium propositi gaudii haud cunctanter excipit & admittit, ignem tanquam materiæ purificatorem, gladium tanquam direptorem conjunctionis, quæ mens cum materialibus & carnalibus coaluit, omnes labores & dolores, quicunque

cunque excogitari possunt, tanquam medicamentum noxio voluptatis veneno adversans cupidè atque parato animo suscipit: quia, ut *S. Chrysost. Hom. 25. in Genesin.* inquit, amor in Deum gravitatem molestiarum imminuit, neque sentire sin- nit, dum nos invaserint.

Hinc servi Dei metuunt, ne non ament Dominum, quando tribulationum in se horrorem persentiscunt, dum non judi- cant practicè, quod pati sit bonum, & valde magnum bonum. *S. Diadochus cap. 91.* Qui voluntate quâdam insatia- bili diligit DEUM, tametsi infinitis con- tumeliis & incommodis ab alio afficia- tur, tamen non irascitur ei, sed potius cum eo, qui contumelias & damna in- tulit, manet copulatus. Talis vere amat DEUM, at verò *qui non diligit, ma- net in morte.*

Audiamus, quàm *S. Chrysostomo Orat. 8. in Epist. ad Ephes.* placeant tribulatio- nes. Vincitum esse propter Christum est præclarius quàm esse Apostolum, quam esse Evangelistam, quàm habitare cœ- los, fortassè præclarius est quàm sedere à dextris,

à dextris, est magnificentius quàm sedere super duodecim sedes, quàm collocari cum Angelis, quàm unum esse ex Potestatibus, quæ sunt circa coelos, aut circa thronos.

Audiamus & *S. Joannem Climacum* quàm necessarias judicet afflictiones gr. 4. Is qui ad placidam animi quietem, & ad DEUM currit, omni die, quo maledicta non sustinet, ingens detrimentum se sustinuisse arbitretur.

### *III. Ob parvorum neglectum sæpè ventunt ad interitum.*

Parva sæpè mala graves traxerunt secum ruinas, & veniales culpæ lethalium permissione sunt punitæ. *S. Ambr. in Psal. 1.* Ut in stipulam ignis insiliens inhæret ac permanet, donec omne, quod corripuit, absumat, ita vel exigua scintilla peccati. *S. Isidorus Hispalensis lib. de summo bono cap. 1.* Diabolus est serpens lubricus, cujus si capiti, id est, primæ suggestioni non resistitur, totus in intima cordis, dum non sentitur, illabatur. *S. Hieron. Epist. 34.* Et Sancti corruunt, si fuerint

rint negligentes ; quare ? quia *maledictus , qui facit opus Dei negligenter.*

At verò ab eo Deus omnia sua tollit , quem maledicto subiectum videt. Opera verò nostra bona sunt verè res DEI. Sic enim habet *S. Ambr. lib. 1. de Cain & Abel cap. 10.* Quicquid sanctum cogitaveris , hoc DEI munus est , Dei inspiratio est , Dei gratia.

Præterea illud viris DEUM timentibus occurrere debet , quod inculcat *Nazianz. Orat. de fuoo* : Illud velim non ignores , rugam tibi turpiorem esse quàm maxima vulnera iis , qui in seculo vivunt : nec enim tam notabilem ac conspicuam in sordidis , quàm in puris unius coloris vestibus labes aliqua foeditatem habet , & *cui plùs datum , plùs ab eo requireretur.* Quò plura in servum suum contulit DEUS , eò magis offensa illi displicet. Aliquo suo modico nævo , modico vitio grande scandalum secularibus vir facit in opinione virtutis constitutus : & quæ in ore secularis veluti nugæ habentur , ex ore illius si processerint , velut blasphemia notatur.

Adde

Adde quod dixit *Salvianns lib. 3. de Provid.* Voluit Salvator, ut, quàm est pura pupilla, sit Christiani vita. Parva sæpè credimus, quæ non parum infirmiores afficiunt, parva, quæ non parum DEO displiceant, quæ Spiritum Sanctum à nobis avertunt. *S. Bernard. Serm. 3. de Ascens. Domini.* Ipsi Apostoli Spiritu S. repleti nequiverant, quia carni Dominicæ, etsi sanctæ inhærebant. Quàm parvum hoc vitium, si vitium! quàm exilis imperfectio, aliquo affectu non purè supernaturali, etsi honestissimo fuisse occupatum? & tamen hæc macula Spiritum Sanctum, tam necessarium non uni alicui personæ, sed totius mundi conversioni, Christi glorificationi, inhæbat.

S. Petrus, ut docet *S. Thom. 2. Secunde q. 43. à 2. ad 2.* ex quodam pietatis affectu in Christum, volebat passionem impedire, & dixit: *Absit à te, Domine, non erit hor;* & statim audivit: *Vade post me, Sathana, quia non sapis ea, quæ Dei sunt, sed ea, quæ hominum.* Ita idem Petrus non admittebat lavari sibi pedes, & di-

ctum



Etum est illi: *Si non lavero te, non habebis partem mecum.*

Affectum autem ejusmodi inter carnalem & foedum, & spiritualem notat esse medium *B. Laurent. Justin. fascic. amor. c. 3.* dicitque eum esse, qui se pariter cum dilecto DEO diligit, & non solum Deum, sed & delectationem propriam diligendo Deum diligit, & non nisi cum difficultate carentiam ejus, quem diligit, patitur. Et talis fortasse non in paucis DEI servis reperitur.

#### *IV. Et tamen parvis lapsibus sumus obnoxii.*

Et verum hoc est, quod *S. Diadochus cap. 77.* docet: Paucissimorum est, lapsus suos perfecte cognoscere. Et *S. Gregor. in Psal. poenit.* Sancti viri licet jam magnâ charitate luceant, aliquas tamen peccati nebulas, veluti quasdam noctis reliquias nolentes rrahunt. *S. Isid. Hispal. lib. 2. sent. c. 18.* Quamvis in hoc seculo magnâ justitiæ quisque charitate resplendeat, nunquam ta-

men

men ad purum peccatorum sordibus caret.

Imò cùm detractio sit ex suo genere grave ac mortiferum crimen, juxta *S. Thomam*, tamen juxta eundem 2. *secunda q. 73. a 2. ad 2.* pauci sunt vel nulli, qui non sint detractioibus dicendis obnoxii. *S. Chrysostomus, lib. 1. de compunct. cordis*: A vitio temerarii judicii nèque seculi homines, neque Monachorum ullum facile invenies liberum.

*V. Sæpe nec puras habent, nec veras virtutes.*

*S. Bernard. Serm. 72. in Cant.* In tempore & corpore isto nulla nostra virtus ad purum ita defæcata erit, nulla ita sua-vis & mera, ut sponso Christo habilis sit ad potandum. Et nimirum, si ipsæ quoque justitiæ nostræ omnes, ad lumen veritatis inspectæ, velut pannus menstruatæ inveniantur, injustitiæ deinceps quales reputabuntur? Si lumen quod in nobis est, tenebræ sunt, ipsæ tenebræ quantæ erunt? *Cassianus coll. 14. cap. 6.*

D Im-

Impossibile est unum eundemque hominem simul universis fulgere virtutibus, quas si quis voluerit pariter affectare, id in eum incidere necesse est, ut dum omnes sequitur, nullam integram assequatur.

Quamquam hic locus explicari debet de prima acquisitione virtutum, quas omnes simul quærere impossibile est; tamen quantum hoc sit jugum servorum DEI, quàm pauci inveniuntur, qui sint in possessione, & non potius in acquisitione. Sed illud non levius, quod ostendit *S. Climacum. gr. 8. coll. 4.* Quandoque dæmones, cùm saturitate fuerimus distenti, compungunt nos, rursus cùm jejunaverimus, obdurant, ut seducti lacrymis, patenti vitiorum gulæ, ac deliciis nos ipsos exponamus.

En quantum periculum, & quàm fallax! Sed & illud non minus, de quo *Richard. in 6. Cant.* Dulcis in DEUM affectus quodammodo carnalis est & fallax, & humanitatis interdum potius quàm gratiæ, cordis quàm spiritûs, sensualitatis quàm rationis, ita ut magis accedat

cedat aliquando ad minus bonum, & minus ad majus.

Sed licet etiam signa in nobis appareant virtutum, nondum absque metu relinquimur. *S. Bernard. lib. 2. consid. 6.* Quam multæ, quas putaveras fruges, diligenter inspectæ, vepres potius apparebunt! imò ne vepres quidem; annosæ & veterinosæ arbores sunt, sed non fructiferæ, nisi fortè glandium, aut siliquarum, quas porci manducant.

Audiamus etiam *S. Basil. reg. 17. Brev.* de verbis ipsis quid sentiat bonis: Licet verbum ipsum, quod dicitur, genere ipso de numero sit bonorum, tamen nisi ad ædificationem fidei dirigatur, nequaquam propterea, quòd bonum sit, liber sit à periculo ejus, qui illud locutus est, quippe qui videlicet ex eo, quòd ad ædificationem illud non accommodaverit, contristare noscitur Spiritum Sanctum Dei.

## VI. Multa pericula à seipsis patiuntur.

Jam verò corpus, quod corrumpitur, aggravat animam, & sensus nostri no-

bis insidiantur. De gustu circa ipsam aquam monuit *S. Antonius S. Paulum Simplicem*, non minùs per aquæ abundantiam phantasias animæ fieri, quam per vinum calorem corporis incrementum. Oculos vocat *S. Gregor. 21. Moral. 2.* raptos ad culpam; quisquis enim per has corporis fenestras incautè exterius respicit, plerumque in delectationem peccati etiam nolens cadit, atque obligatus desiderii incipit velle, quod noluit. *S. Hieronym. ad Eustochium* scribens, monet, nullum adspectum esse tutum. *Eccl. 3. Nequius oculo quid creatum est?* De lingua *Idem cap. 28. Multi ceciderunt in ore gladii, sed non sic quasi qui interierunt per linguam suam.* Et universim *S. Jacob. cap. 2. In multis offendimus omnes.* Et *Eccl. 2. Non est homo justus in terra, qui non peccet.*

Nostra mens quàm fluxa, quàm facile dilabitur, cùm oramus. Et de hoc malo scripsit *S. Ambr. lib. 1. de Cain & Abel cap. 9.* An nescis, quàm grave sit in oratione contrahere peccatum, ubi speras remedium? Certè Dominus per Proph-



phetam docuit, hoc grave esse maledictum, dicens : *Et oratio ejus fiat in peccatum.* Et *Julius Papa Epist. ad Episcopos Aegypti* de distractionibus mentis, aliisque negligentis, quæ inter sacrificandum accidunt, ita scripsit : Cùm omne crimen atque peccatum oblati DEO sacrificiis deleatur; quid de cætero pro delictorum expiatione dabitur, quando in ipsa sacrificii oblatione peccatur? Nam, ut docuit *Tertull. lib. de Orat. c. 10.* sit de tali spiritu emissa oratio, qualis est spiritus ad quem mittitur; nequit enim agnoscì à Spiritu S. spiritus inquinatus, aut tristis à læto, aut impeditus à libero. Nam adversarium recipit nemo, nemo nisi comparem suum admittit.

Debet itaque conari, qui orat, ut sit quodammodo tam purus, tam expeditus ab omni nœvo, atqui ipse Spiritus DEI. *S. Ephrem* etsi minus, multum tamen ab orante requirit *Serm. de virginit.* Esto totus orationis tempore velut cœlestis Angelus, sicque contende, ut oratio tua sit sancta & pura, immaculata & irreprehensibilis, ut cùm illam

sursum ascendere viderint portæ coelestes, gaudentes ultrò confestim aperiant ei; ut ipsam cernentes Angeli & Archangeli cuncti, latantes illi occurrant, & coram sancto atque excelso throno immaculati Domini ipsam offerant. Sic ergo semper orationis horâ esto D E O conjunctus, ut Cherubim atque Seraphim.

Et tamen, advertit *S. Hieron. advers. Lucif.* conveniat unusquisque cor suum, & in omni vita inveniet, quàm rarum sit, fidelem animam inveniri, ut nihil ob gloriæ cupiditatem, nihil ob rumusculos hominum faciat. Neque enim statim qui jejunat, D E O jejunat, aut extendens pauperi manum D E O foenorat: vicina sunt vitia virtutibus, difficile est D E O judice esse contentum. *B. Laurent. Justin. comp. & compl. perf. Christ. col. 19.* Rarus profectò reperitur, qui solo testimonio contentus sit divino. *B. Damian. lib. 5. Epist. 3.* his subjungendus: Quid prodest, quidquid homo faciat, si hoc non placet Deo?

*VII. Si non ferventer Deo servi-  
unt, in magno sunt discrimine.*

In Apoc. dicitur: *Utinam calidus aut frigidus esses, sed quia tepidus es, incipiam te vomere ex ore meo.* Quæ verba *Salvianus lib. 4. de gubern.* ita exponit: Utinam aut calorem & fidem haberes bonorum Christianorum, aut certè frigus & ignorantiam Paganorum. Aut enim fides calida te DEO insinualet, aut certè ad præsens adhuc legis ignorantia aliquatenus excusaret.

Quod etiam *B. Petrus Apostolus* evidenter exposuit, dicens de vitiosis & tepidis, id est, de malè viventibus Christianis 2. Epist. c. 2. *Meliùs erat illis non cognoscere viam justitiæ, quàm post agnitionem retrorsum converti ab eo, quod illis traditum est, sancto mandato: contingit enim eis illud verè proverbium: Canis reversus ad suum vomitum; & sus lota in volutabro luti.* Quod ut evidenter de his dictum intelligamus, audi, quid eisdem eodem loco dicat: *Si enim, inquit, refugientes coinquinationes mun-*

*di per cognitionem Domini nostri, & Salvatoris Jesu Christi his rursus impli-  
ti superantur; facta sunt illis posterosiora  
deteriora prioribus.*

Accusant tepidum Martyres, accusant Doctores, Confessores, Apostoli, imò ipse Christus. Ita enim *S. Antonius Magnus Epist. 3.* Nunquid Patriarchæ non passi sunt pro nobis? aut Sacerdotes docuerunt nos? nunquid Prophetæ pro nobis mortui non sunt? aut Apostoli non sustinuerunt persecutionem pro nobis? *ut scilicet exemplum darent nobis, quod tepidi non imitantur.* Nunquid filius DEI dilectus non pro nobis omnibus mortuus est?

Et de his ipsis loquens *Epist. 5.* addit: Verè etenim filioli, quia nostra incommoditas & inutilitas dolorem eis omnibus præbet, utuntur lacrymis atque gemitibus pro nobis in conspectu Conditoris, & ob hoc cunctorum DEUS etiam irascitur super opera nostra maligna propter gemitum Sanctorum, sicuti iterum profectus & emendatio nostrorum animorum alacritatem præbet cho-

ro Sanctorum. *Et S. Pachomius in Vitiis PP. quasi ex dictis S. Antonii infert:* Nimis anima illa probabitur infelix, & omni lacrymarum fonte plangenda, quæ seculo renunciâs iterum secularibus negotiis implicatur, & inutilibus curis dudum exuta rursus redit ad duræ servitutis obsequia.

Sed horribilius, quod scripsit *S. Hieronym. in vita S. Paula*: Vidit Jacob scalam usque ad cœlum tendentem, in qua Dominus desuper nitebatur, ascendentibus porrigens manum, & negligentes de sublimi præcipitans.

In idem ferè recidit dictum *Abbatis Motois*: Nos quidem quasi in tranquillo mari navigare videmur, (*Monachi,* & *servi DEI*) seculares verò quasi in periculosis locis. Sed nos quasi in die navigamus sole justitiæ illustrati, illi verò in ignorantia quasi per noctem. Sed frequenter contingit, ut secularis (*peccator*) in tenebrôsâ nocte navigans, vigilans autem & clamans propriam navim salvet; nos verò, dum in tranquillo na-



vigamus , sæpius ex ipsa tranquillitate  
navim negligimus & perimus.

Quid quòd *S. Bern. Serm. 1. de Convers.*  
*S. Paul.* tepidè viventes , neque sanctita-  
tis exemplum præbentes , inter persecu-  
tores Christi numerat; Vereor, dilectis-  
simi , ne quis fortè in nobis sit persecu-  
tor Domini , quoniam manifesta docuit  
ratio , impedire salutem esse persequi Sal-  
vatorem. Quas ego de salute animæ  
meæ fratri illi gratias agere possum , qui  
mibi propinat detractiōis fraternæ vene-  
num? Quid & is , qui exemplo suo ad  
remissiùs agendum cæteros provocat, aut  
singularitate turbat, aut inquietat curiosi-  
tate , aut impatientiâ suâ & murmuratio-  
ne molestat , en nonne & hic manifestè  
persequitur Christum ?

*S. Greg. Pastor. parte 3.* postquam ad-  
duxit illa Apoc. 3. *Esto vigilans , &*  
*confirma cætera , qua moritura erant ,*  
*non enim invenio opera tua plena coram*  
*DEO meo ,* subjungit: Quia plena ejus  
coram DEO opera inventa non fuerant,  
moritura etiam reliqua , quæ gesta erant,  
prædicabat.

Rursus dum illud *Apoc. 3.* considerat. *Utinam calidus esses*, ita discurret: Calidus est, qui bona studia arripit & consummat, frigidus verò, qui consummanda nec inchoat &c. *Infert*: Sicut antequam teporem frigus in spe est, ita post frigus tepor in desperatione; qui enim adhuc in peccatis est, conversionis fiduciam non amittit; qui verò post conversionem tepuit, & spem, quæ potuit esse de peccatore, subtrahit.

*Et Moral. in Job. lib. 32. cap. 10.* dicit, tepidum esse cibum Diaboli. Quasi ante os Behemoth mundum fœnum in terra atque infimis jacet, cum & vita quasi innocens per mandatorum custodiam agitur, & tamen inter actionem, quâ bona ostenditur, cor ad appetenda sublimia non elevatur.

### VIII. Debent omnia perfectissime operari.

Ad perfectionem verò illamque maximam quomodo obligamur non in sola duntaxat oratione, sed etiam in alijs

actionibus, docet *S. Thomas Opusc. 62.* Diligentiam apponere debemus, ut singula opera nostra, quantum unquam melius possumus, faciamus ex omni virtute Domini nostri JESU Christi, & cum omni desiderio triumphantis & militantis Ecclesiæ, & sub nomine Creatoris; quasi tota salus nostra, & omnis laus DEI, & universitatis utilitatis ex uno opere dependeat; quasi nunquam ad id opus reversuri, neque aliud postmodum facturi.

Passiones verò nostræ servo DEI juxta *S. Ambr. lib. de Arca Noe cap. 25.* ita debent menti, (id est rationi) ut olea rustico esse subjectæ. Postquam verò hæc omnia feceritis, dicite, servi inutiles sumus.

*IX. In fervore saepe superantur  
in suo genere a filiis hujus  
mundi.*

Clamabat olim *S. Bernard. Serm. 1. de altit. & bassit. cordis:* Magna confusio, magna valde, quòd ardentius illi (id est filii

fili mundi) pernicioſa deſiderant, quàm nos utilia; citius illi ad mortem properant, quàm nos ad vitam, &c. vileſcunt eis omnia pro deſiderio minoris fortè rei, quam alteri cœperunt invidere.

Ideò juxta mentem *B. Laur. Juſtin. lib. de Obedient. cap. 21.* ſurgent in judicio cum ſervis DEI, & ex ſua cordis ambitione redargutione illos dignos eſſe oſtendent, tanquam ſollicitudine & affectione inferiores. *Et paulò poſt* : Filii mundi ſe faciunt gehennæ filios, ut attollantur honoribus, cæteros præcellant laudibus, atque terrenis diteſcant opibus : ſervi DEI verò cœleſte vocantur ad regnum, & adire penè reſuſant, &c. Melius illis fuerat viam veritatis non agnoviſſe, ac virtutum arduum iter non initiaviſſe, quàm poſt agnitum & inchoatum retrorſum ire.

*S. Theodorus Studita Serm. 17. in aſſat.*  
Scelus eſt operarios carnales promptius opificia tractare, nō ſpiritualia ſtudia ſegnes & diſſolutos adire; illos ſudore fluentes à laboribus non abſtinere, nos contentionis Monastiæ ſaſtidio duci.

Itaque.

Itaque scelus est, si opifex aut mercator ob lucrum, miles ob stipendium plura sustineat, quam ego propter coelum. *S. Chrysoſt. Hom. 79. ad pop.* Si DEUS nostrum in orationibus torporem & negligentiam exquirat, & quod in ejus conspectu positi & orantes neque tantum ei præbeamus honorem, quantum Dominis servi, quantum Ducibus milites, quantum amicis amici, nunquam veniam habebimus: nunquid excusationem assequi poterimus? non arbitror ego. Ubi videtur innuere, ejusmodi torporem esse irremissibilem.

*X. Nec satis est mala cavere,  
nisi bona fecerimus.*

Sed licet nulla mala admiserimus, si tamen bona nulla egerimus, minimè salvabimur. Audi *S. Basilium Orat. Quod mandata præterimus.* Arborem plantavit quidam in vinea sua *Luc. 13.* & venit quærens fructum ejus, & non invenit; & ait vinitori: jam tres anni sunt, quibus venio quærens in ea fructum, nec inve-

nio,



nio, excide illam, ne terram occupet. Alibi verò claritùs hoc ostendere iudicium videtur, cùm dicit: Discedite à me maledicti, esurivi enim &c. Hoc enim non aliquid eorum, quæ prohibentur, sed eorum, quæ sunt imperata, negligentiam atque omissionem infert. Multa quoque similia invenimus, quibus facile ostenditur, quòd non solum, qui male faciunt, digni sunt morte, ac igne inextinguibili cruciabuntur, sed etiam, qui officium deserunt, ac benefacere minimè curant, cum eis unà damnabuntur.

Nec solum ii, sed etiam qui, quod boni agunt, negligenter agunt, pœnas omninò dabunt. Scriptum est enim: *Maledictus homo, qui facit opus Dei negligenter.* Atqui bonum ex integra causa fiat, necesse est. Itaque solum illud est bonum, in quo nullus est defectus. Quàm verò paucula ejusmodi in nobis! Ideò humiliemur sub potenti manu Dei, & salutem nostram in timore & tremore operemur, satagentes certam facere vocationem nostram per bona opera. Al-

tus nobis præfixus est scopus. *Effote perfecti, sicut & Pater vester, qui est in cælis, perfectus est.*

### *XI. Debent practice cognoscere Deum.*

*Hac est vita nostra*, ait Evangelium, *cognoscere Patrem DEUM, & quem misit, Filium.* Quid verò sit cognoscere, docet *Clemens Alex. lib. 3. pedag. cap. 1.* Qui Deum cognoscet, ei assimilabitur, & quàm paucissimis fieri poterit, indigens fiet, solus autem DEUS re nullâ indiget.

### *XII. Magnam debent quærere humilitatem.*

*S. Diadochus* dixit & verè *c. 95.* Res est difficilis ad comparandum humilitas. At verò *S. Cypr. de Christi Nativ.* Fundamentum sanctitatis semper fuit humilitas. *S. Chrysost. in Acta Hom. 30.* Mater, radix, altrix, & fulcimentum, & vinculum bonorum est humilitas.

Sed quàm sit difficilis, cognoscitur ex suis effectibus, quos enumerat *B. Laurent.*

*rent. Justin. de compunct.* Stat subiectus, humilis, prostratus omnibus, Deo devotus, benevolus fratribus, non contradicit, non murmurat, non irascitur, non reddit malum pro malo, neque maledictum pro maledicto, accusatus tacet, injuriis laceffitus orat, tentationibus probatus sustinet, laboribus gravatus ministeria perficit.

### *XIII. Vitia excisa repullulant.*

Sed licet vitia exciderimus magno labore, & virtutes inseruerimus, facillimè & vitia redeunt, & virtutes intereunt. In quo infeliciores sumus Latomis, qui licet grandi labore lapidem quadrent, nunquam tamen ille ad priorem figuram redit. *S. Bernard. Serm. 58. in Cant.* Credite mihi & vitia putata repullulant, & effugata redeunt, & reaccenduntur extincta, & sopita denuò excitantur.

Et hoc quidem, licet aliquis omnia penitus vitia sustulerit; nam si partem reliquerit, etiam minimam, ait *S. Chrysof.* *Hom. 19. ad pop.* Ne mihi dicas, majorem

rem partem expedivi , sed nisi totum emendasti, nondum te quidquam fecisse puta. Hoc enim exiguum neglectum, & omne reliquum destruit. Sæpius namque domos ædificantes homines & tetrum imponentes, unius tegulæ excussæ curam non gerentes, totam domum perdidērunt.

#### *XIV. Judicia DEI admiranda, & occulta.*

Plorabat olim , ut in *Schola SS. Patrum fol. 180.* scribitur , B. Bertrandus Ord. S. Dominici, idque plorabat continuo, rogatus causam , dedit hanc : Cur non amarissimè fleam, cùm non certò sciam, an æternæ salutis compos sim futurus ?

Idem deplorabat *S. August. Soliloq. cap. 29.* Magna sunt judicia tua, Domine Deus, Judex iuste, & fortis, qui iudicas secundùm æquitatem, & inscrutabilia facis & profunda, quæ cùm considero, contremiscunt omnia ossa mea, quoniam non securatur homo super terram ; ut serviamus tibi piè & castè cunctis diebus vitæ

vitæ nostræ in timore, & exulemus tibi cum tremore; ut non sit servitium sine timore, neque gaudium sine tremore, & non gloriatur accinctus æquè & discinctus, neque gloriatur ante te omnis caro, sed paveſcat & contremiſcat à facie tua, cùm ignoret homo, utrum amore, an odio dignus ſit, ſed in futurum omnia reſervantur incerta.

Vidimus enim multos, Domine, & audivimus, quod utique ſine magno tremore non reſcolo, ſine multo timore non conſiteor, aſcendiſſe primitus quodammodò uſque ad cœlos, & inter ſidera nidum ſuum collocaſſe, poſtmodum cecidiſſe uſque ad abyſſos, & animas eorum in malis obſtupuiſſe. Vidi-  
mus ſtellas de cœlo cecidiſſe ob impetum ferientis cautæ Diaconis, & eos, qui jacebant in pulvere terræ, à facie ſublevantis manus tuæ, Domine, mirabiliter aſcendiſſe. Vidimus vivos, morientes, & mortuos à morte ſurgentes, & eos, qui inter filios DEI ambulabant, in medio lapidum ignitorum quaſi lutum ad nihilum fluxiſſe. Vidimus lucem  
obte-



obtinebrâsse, & de tenebris lucem processisse, quia publicani & meretrices præcedunt incolas in regno cœlorum, filii autem regni ejiciuntur in tenebras exteriores.

*XV. Quia nesciunt, an illis sint peccata dimissa.*

*Hoc valdè affligebat S. Ephrem Ecclesiæ Edessena Diaconum. Ideo seipsum reprehendit, & in hunc modum gemit: Resipui, & egi pœnitentiam, sed nescio, utrum mihi DEUS placatus sit. Precor & Sanctos, ut intercedant pro me, sed ignoro, an eorum preces suscipiantur. Igo enim apud Ezech. 14. Neque Noe, neque Job, neque Daniele, si oraverint, exorabo. Obsecro Prophetas omnes, sed metuo ne rejiciar, quemadmodum impius Israel. Sic enim loquitur DEUS ad Jeremiam: Noli orare pro populo isto. Quid igitur? donis placabo Dominum? at vereor, ne idem mihi quod Pharisæis dicat, me utilitatis meæ causâ id efficere. Si jejuno, hoc*

non est, fortasse inquiet, jejunium quod elegi, Si pauperum miserebor, oleum, forsan dicet, peccatoris non impinguet caput meum. Si Sacerdotes ejus amplector, fortassè dicet mihi: Quia Nazaræis meis vinum præbuiſti, detestabilis eris. At offeram illi munera, timeo, ne mihi dicat: Si obtuleris similaginem, sacrificium tuum invisum est mihi. Quid quòd & in Ecclesiis sedere vereor, ne me item ejiciat, aulam, inquiens, meam calcare ne audeas.

Undique igitur premor, fratres, & ad conscientiam meam redeo; si impiè rursum egero, væ mihi. Multum interest inter peccata, quæ scienter fiunt, utrum ea quis sensu, an cogitatione committat, quamvis utrobique consensum admittit. Et gravior aliquando unus cognitione peccat, quàm alius opere, cum hic pœnitentiæ locum inveniat, ille minime.

Exemplis sunt ea, quæ diximus, confirmanda, ne commentitia & inania videantur. *Cham* visis pudendis patris sui damnatus est: *David* autem, qui re ipsâ


ipsâ peccatum explevit, absolutus. Qui *Core*, *Dathan*, *Abiron* consenserunt, cum nihil omnino dixissent, aut fecissent, à terra devorati, & vivi in infernum descenderunt *Num. 16*. Idem ferè contingit utrique *Quinquagenario 4. Reg. 1.* cum quinquagenis eorum militibus, qui ad accersendum Eliam accesserunt. At totam Synagogam *Exod. 32.* quæ conflatum vitulum adoraverat, post disciplinam D E U S liberavit. Et *Saul 1. Reg. 13.* contra præceptum Domini obtulit holocaustum, & rejectus est: *Mannasses* autem *2. Paral. 33.* qui idololatriæ peccatum admiserat, postquam poenituit, gratiam invenit.

Peccavit *Achab 3. Reg. 21.* consuetudine, & susceptus est; peccavit *Achitophel* consilio tantum, & in peccato mortuus est. Suppetunt item alia exempla, quæ his poteritis adjungere. *Ruben* se patrem offendere non ignorabat, & cum esset rejectus, post mortem ejus à peccato liberatus est. *Exod. 32.* *Simeon* & *Levi* graviter & scienter peccaverant, damnatique ad tempus denique veniam impe-

impetraverunt. *Aaron* etiam ipse conflato vitulo sacrificavit, & tamen ab ea macula ablutus est. *Ophni & Phinees* 1. Reg. 2. in despectione permanentes perierunt.

Item in Evangelio *Petrus* perjurio se obstringit, & Christum abnegat, & tamen resipiscens veniam impetrat. *Elymas* Act. 13. adversatur prædicationi, & ad tempus cœcitate affectus liberatur. *Ananias & Sapphira* Act. 7. Sacerdotibus similes, quippe qui nullum quoque ipsi locum defensionis invenerunt, quoniam in occulta quâdam despectione versabantur. Qui *Sathanæ* fuit traditus à Paulo, *Ruben* similis est, quia castigatus veniam obtinuit. at *Judas* &c.

In eundem sensum *Bernard.* in Ps. *Qui habitat* Sermon. 2. Homines cadere necesse est aliquando, dum in hoc seculo detinentur, sed alii colliduntur, alii non, quia DEUS supponit manum suam.



# GRAVE JUGUM SUPER PECCAN- TES.

## *I. Miseria peccantis quoad animam.*

**D**Um peccas mortaliter, amittis  
DEUM, qui erat tuus; amittis  
æternæ hæreditatis jura, quod est  
multò plùs quàm totius mundi regna  
amittere. Fœditatem in oculis DEI at-  
que Curiaë cœlestis immanem contrahis.  
*S. Ambr. de offic. c. 2.* Conscientia pec-  
catoris gravitùs fœtet omnibus sepulchris.  
Traditur peccator, ait *Tertull. lib. de  
fuga*, Diabolo tanquam carnifici in pœ-  
nam. Teste *S. Chrysost. Hom. 30. ad pop.*  
pejus est peccare quàm à dæmone ob-  
sessum esse. Teste *S. August. in Expos.  
Epist. ad Rom.* unus peccando animam  
suam diabolo vendit, accepto tanquam  
pretio dulcedine voluptatis.

Pec-



Peccans suam voluntatem pluris facit quam DEUM, atque ita bono infinito præponit; imò bono infinito præfert dæmonis voluntatem. Bestiâ efficitur ingrator, quæ suos genitores, & benefactores amat. *Cognoscit enim bos possessorem, & asinus præsepe Domini sui.* Insuper devenit eò impietatis peccator, ut Christum sibi rursus crucifigat. Complexus aliqua horum *S. Chrysof. Hom. 23. ad pop.* dixit: Hominem malum peiorem esse bestiis & dæmone lentio.

Imò non quocunque dæmone, sed ipso Lucifero. Nam Lucifer se tantum voluit DEO similem esse, non verò se prætulit: sed peccator millies viliorē creaturam, scilicet voluptatem propriam præfert DEO, & hanc præ Creatore eligit. Contrahit denique quendam in anima lethargum, quod in Jona cap. 3. exprimitur, ita ut nihil curet, etsi illum barathrum & mille pericula circummugiant. Omnia opera inficit, ut fœda & enormia DEO compareant. Sed verius id est mors quam lethargus, siquidem excitari non potest viribus naturæ.

E

*Ezech.*

*Ezech. 18. Anima, quæ peccaverit, ipsa morietur. S. Augustin. in Psal. 70.*  
 Duæ vitæ sunt, una corporis, altera animæ; sicut vita corporis est anima, ita vita animæ DEUS est: quomodo si anima deferat, moritur corpus, ita si Deus deferat, moritur anima; atque ita putidissimum cadaver efficitur.

Amplius dixit *S. Bernard. Serm. de S. Benedicto*: Sicut caro porcina, cum comeditur, nostræ adhæret carni, ut jam sit una caro; sic transgressor præcepti Dominici spurcos sibi sociat spiritus, & adhærendo eis unus cum eis efficitur dæmon.

## *II. Quia per peccatum homo fit mancipium Diaboli.*

*1. Pet. 2. A quo quis superatus est, huius & servus est.* Pugnamus cum dæmone tentante, si superat, efficiamur servi & mancipia. *Can. de pœnit. cap. Convertimini.* Peccato Diaboli servi sumus. In illos, ut est in *Can. 24. Greg. 9. 1. c.* *Miramur.* exercet potestatem tanquam

in pecore suo. Vidit hoc *apud Ros. lib. 7. cap. 23.* Paulus Abbas, vidit enim peccatorem in nares inserto circulo velut bestiam circumduci. Heu quomodo pessimus Dominus insultat huic suo mancipio! Specialiter autem luxuriæ adscribit *S. Greg. M. lib. 6. cap. 2. Moral.* quòd hominem in servitutem diaboli redigat, & quidem irreparabiliter: ita enim dicit, ubi adducit illud *Gen. 6. No Æ permanebit Spiritus meus in homine in æternum, eo quòd caro sit*; additque: Caro quippe homo efficitur, quando sensui carnis ratio subjugatur.

### III. Si alios scandalizent, gravi subjacent iudicio Dei.

Agnovit hoc *S. Melania, ut in Vitis PP. lib. 3. ait Dydimus*, quæ dixit: Elegi magis memetipsam sepulchro includere, quàm scandalizare animam ad imaginem DEI factam.

*S. verò Bernard. Epist. 6.* Non ignoras certè, quid dixerit, (nam mihi hinc fortasse non crederes) expedire scandala

E 2 facien-

facientibus demergi potius in profundum maris. Cur hoc dixit? nisi quia significare voluit, tam gravia illos in posterum manere tormenta, ut eis comparata mors temporalis nec poenalis videatur, sed commoda.

Majus quid est, quod pro scandalizante nemo orat, *1. Reg. 2. Si peccaverit vir in virum, placari ei Deus potest, si autem in Deum peccaverit, quis orabit pro eo?* In quem locum *S. Gregor. lib. 2. in 1. Reg. cap. 3.* Quicumque aut suam, aut alterius hominis fidelis animam ad peccandum pertrahit, in Deum peccare convincitur, quia ei sua propria auferre nititur.

Ad idem refert *lib. 6. Epist. 4.* dictum *Matth 5. Si offers munus tuum &c.* Qua in re pensandum est, cum omnis culpa oblato sacrificio deleatur, tantum est malum scandali in alieno corde generati, ut ab eo, qui peccaverit, nec ipsum sacrificium Deus accipiat, quod peccatum delere solet.

De scandalo, quod oritur ex detractione, ita habet *Bernard. Serm. de triplici*

*plici custodia*: Nunquid non vipera est lingua ista? ferocissima planè, nimirum quæ tam lethaliter tres inficit flatu uno. Nunquid non lancea est lingua ista? profectò & acutissima, quæ tres penetrat ictu uno. Psal. 56. *Lingua eorum gladius acutus*. Gladius equidem anceps, imò triceps est lingua detractoris. Neque verò ejusmodi linguam ipso etiam mucrone, quo Dominicum latus confossum est, crudeliorem dicere verearis. Fodit enim hæc quoque Christi corpus & membrum de membro, nec jam exanime fodit, sed exanime facit fodiendo. Ipsis quoque nocentior est spinis, quas illi tam sublimi capiti furor militaris imposuit, seu etiam clavis ferreis, quos sanctissimis manibus & pedibus illis consummatio Judaicæ impietatis infligit. Nisi enim hujus, quod nunc patitur & transfoditur, corporis sui vitam illius corporis vitæ suæ prætulisset, nunquam illud pro isto mortis injuriæ, crucis ignominie tradidisset.



*IV. Per peccatum homo sacrificium offert demoni.*

De ebrietate sic locutus est *S. Auguſt.* *Serm. 231.* Tolerabilius est in carne mori, quàm in anima per ebrietatem interfici. Neque enim mentitur Spiritus Sanctus per Apostolum dicens: *Nec ebriof regnum Dei possidebunt.* Quicumque me contempserit, & ad bibendum pronus fuerit, vel in convivio suo alios adjuvare, vel cogere voluerit, & pro se, & pro illis in die judicii reus erit. Et quia, quod pejus est, aliqui etiam Clerici, qui hoc deberent prohibere, ipsi cogunt bibere aliquos plus quam expedit, amodò incipiant & seipsos corrigere, & alios castigare, ut, cum ante tribunal Christi venerint, nec de sua, nec de aliorum ebrietate incurrant supplicium. Qui enim hoc in suo, vel alieno convivio fieri acquieverit, diabolo se sacrificasse non dubitaverit.

Sed ante illum hæc eadem docuit *Tertullianus*: Avaritiam vocat Apostolus *idolorum servitutem, calicem demonio-*

*rum, in quo illi sacrificatur.* Alia peccata vocat *Bernard. Epist. 2.* Calix dæmoniorum est superbia, calix dæmoniorum detractio & invidia, calix dæmoniorum est crapula & ebrietas.

*Tertullianus lib. de Monogamia* luxuriam damnabiliorem esse censet, quàm si quis adactus sacrificetur diabolo. *Et sic ait de illis, qui in tormentis lapsi sunt in sacrilegam immolationem:* Utique tunc carnem excusari magis decet, quæ in prælio cecidit, quàm quæ in cubiculo, quæ in equuleo succubuit, quàm quæ in lectulo, quæ crudelitati cessit, quàm quæ libidini, quæ gemens devicta est, quàm quæ sudans. *Et paulò post:* Propone, quòd utraque non sustinuerit in finem, & inuenies ejus causam honestiorem, quæ sævitiam, quàm quæ pudicitiam sustinere non potuit.

Quàm dolenter alloquitur lapsam in peccata animam quandam *Ambros. ad Virg. lapsam cap. 2.* Eras virgo in paradiso DEI, utique inter flores Ecclesiæ, eras sponsa Christi, eras templum DEI, eras habitaculum Spiritus Sancti, & cum

dico toties *Eras*, necesse est, ut ingemiscas, quia non es, quod fuisti. Incedebas in Ecclesia tanquam columba illa, de qua scriptum Psal. 67. *Pennæ columbæ deargentata &c.* Splendebas ut argentum, fulgebas ut aurum, quando cum sincera conscientia procedebas. Quæ est ista subitanea conversio? Eras tanquam stella in manu Domini, nullum ventum, nullius belli nebulas pertimescens. De DEI virgine facta es corruptio Sathanæ, de habitaculo Spiritûs S. tugurium Diaboli, &c. Aspice, quis Sanctorum aut quæ Sanctorum approximare tibi non horreat? &c. O miserum Sathanæ mancipium! O naturæ humanæ opprobrium! O inferni ludibrium!

*Sed etiam Epist. 36.* luxuriam cum idololatria conjungit, cùm dicit: Nemo se luxui committit, nisi qui recedit è præceptis veri DEI; ubi autem quis luxuriari inceperit, incipit deviare à fide vera &c. Ergo qui non sequitur Dominum DEUM suum, ingurgitat se luxuriæ ac libidini, pestiferis corporis passionibus. Qui autem se ingurgitaverit, atque

atque immerferit hujusmodi volut bris, perfidiae laqueos incurrit. Sedit enim populus manducare & bibere *Exod. 32.* & fieri sibi Deos poposcit.

Et *Serm. 17.* Idoli portio est inebriare vino mentem, ventrem cibo distendere, salutationibus membra torquere, & ita pravis actibus occupari, ut cogaris ignorare quid est Deus.

Sed *S. Cyprianus* ebrietatem etiam idolatriæ præfert *Libro de Bono pudicitia:* Christianum à Christiano cogi ad ebrietatem, an hoc levius crimen esse dicimus, quàm immolare Baccho? Mihi videtur multò gravius, si rem rectà ratione volumus expendere. Cùm Tyrannus dicit: Abnega Christum, & immola Jovi, & esto amicus noster, aut morere; sæpè lingua negat corde reclamante, & manus adolet thus, cùm animus intus adoret Christum. At Sathanas dicit: Offer sacrificium Mammonæ, & Christo nuncium remittito, nec dicit morere, sed oblecta oculos tuos &c. & tamen hinc spontè submittis genua Sathanæ, & abnegato Christo te totum illi mancipas. O fœ-

dam defectionem ! ô turpem idololat-  
triam ! ô iniquam permutationem !

Quocirca minatur Deus 1. Reg. 8. *Et  
clamabitis in die illa à facie vestri Regis,  
(idoli,) quem elegistis vobis, & non  
exaudiet vos Dominus in die illa.*

De peccato detractionis, quod verè  
sit dæmonis sacrificium, audi *Bernard.*  
*Serm. 24. in Cant.* Convenientibus vo-  
bis in unum non est Dominicam coenam  
manducare, sed magis propinare & bi-  
bere calicem dæmoniorum, dum im-  
portantibus linguis aliorum perditionis  
virus, aliorum aures intrantem mortem  
libenter excipiunt.

*V. Est certa mensura peccato-  
rum, etsi ignota nobis.*

Qui operatus est omnia in pondere &  
mensura, etiam statuit peccatorum nu-  
merum, quem ubi miser attigeris, non  
apponet misereri DEUS. Sed hoc ter-  
ribile negotium explicet nobis *S. Gregor.*  
*25. Moral. 9.* Justo Dei judicio augeti  
culpa permittitur, ut ad feriendum al-



tius quandoque cumuletur. Hinc 1. Theff. 2. *ut impleant peccata sua semper.* Psal. 69. *Appone iniquitatem super iniquitatem eorum, ut non intrent in justitiam tuam.* Hinc de Domino dicitur: *Immissiones per Angelos malos viam fecit semita iræ suæ.* Cor prioribus peccatis aggravatum justè perimitit etiam subsequenter malignorum spirituum persuasionibus falli, quòd cum dignè culpa trahitur, reatus ejus in pœna cumulat. Unde & iræ suæ Dominus viam fecit de semita; latior enim est via quàm semita. *Genes. 15.* Nondum completa sunt peccata Amorrhæorum. *Deut. 32.* Ex vinea Sodomorum vitis eorum, & propago eorum ex Gomorra, uva eorum uva fellis, & botrus amaritudinis in ipsis, furor draconum vinum eorum, & furor aspidum insanabilis. Nonne hæc omnia congregata sunt apud me, & signata in thesauris meis? in die ultionis reddam eis. Quàm multa eorum mala enarravit? & tamen illicò adjungit: In tempore quo lapsus fuerit pes eorum. Ecce atrocissima il-

lorum facinora describuntur, & tamen ad ultionis diem adhuc sequens lapsus aspicitur; ad diem nempe ultionis, quem sibi justitia D E I præfixit post certum numerum & pondus peccatorum, quorum culpæ cumulentur. De quo ipso monuerat *S. Ephrem Paranes. 47.* Vide, ne præscriptum tempus impleatur, aliudque tempus non inveniamus.

*VI. Peccatum multa mala affert in corpore & temporalibus.*

Certè judice *S. Chrysost. Hom. 5. de poenit.* ex peccato bella, morbi, atque omnes, quotquot nos premunt passionnes oriuntur. *S. Hieronym. Epist. 2. ad Heliod.* Nostris peccatis Barbari sunt fortes, nostris vitiis Romanus superatur exercitus.

Quia lex apud Deum insuperabilis, quam *S. Gregor. 9. Moral. 17.* his verbis exponit: Delinquenti Dominus non parcat, quia delictum sine ultione non deleat: aut enim ipse hoc homo in se poeni-

pœnitens punit, aut hoc Deus cum homine vindicans punit.

DEUS enim summa est sanctitas, itaque peccato summè adversatur, & si hoc verum de omni peccato, multò magis de nostro. Peccavit Lucifer, sed pro illo Christus non fuit passus, nunquam illi fuit remissum, nunquam vidit aliquem ob peccatum punitum, quod in nobis evenit, & aggravat: quocirca necesse est, ut vel nos puniamus in nobis ipsis, & ita juxta condignum puniamus, ut nihil supersit pœnæ, vel Deus puniet; sed terribile est incidere in manus Dei viventis.

Et quidem juxta *S. Chrysost. Hom. 46. ad pop.* maximè oportet timere peccantes, cùm grave patimur nihil. Cùm enim particulares exigit pœnas DEUS, levem nobis fecit ex his retributionem: cùm autem in singulis peccatorum longanimiter agit, ad magnam in talibus permanentes ultionem servat.

Nam peccatum non tantùm postulat, sed etiam extorquet vindictam. Audiamus de hac re *S. Massiliensium Episcopum*

*pum Salviandum lib. 1. de gubern. Genes. 8.* clamor Sodomorum multiplicatus est nimis. Pulchrè clamorem in se habere dixit peccata. Grandis absque dubio peccantium clamor est, qui à terra ascendit ad cœlum. Quare autem peccata hominum quasi clamare testatur? scilicet quia cœdi aures suas Deus dixit clamoribus peccatorum, ne differatur pœna peccantium. Et verè clamor & quasi grandis clamor est, quando pietas Dei peccatorum clamoribus vincitur, ut peccantes punire cogatur.

Hoc ipsum *idem S. Pater* prosequitur *ibid. lib. 4.* Vim facimus pietati DEI, ac manus quodammodò afferimus misericordiæ suæ; ac sicuti illi solent, qui munitissimas urbes obsidere, aut firmissimas arces urbium capere, ac subruere conantur, omnibus absque dubio eas & telorum, & machinarum generibus oppugnant: ita nos ad expugnandum misericordiam DEI omni peccatorum immanium scelere quasi omni telorum genere pugnamus. *Isaia 59. Ecce omnes ignem accenditis, & vires præ-*  
be.

*betis flamma; ingrediemini in lucem ignis vestri, & flamma, quam accendistis.*

*VII. Hec ipsa mala etiam peccatum veniale ex parte inducit.*

Universim de quocunque peccatore dixit *S. Cyprianus de cardin. oper. Christ.* Non pertinet ad te, Domine, nec ex tuis est, qui te non diligit, nec diligit, qui te scienter offendit. Et *S. Basil. proëm. in reg. fus.* ita argumentatur: Quis est filius, qui propositâ ipsi parentis gratiâ, cùm in rebus maioribus ipsi oblequatur, in iis, quæ levioris momenti sunt, prudens (hoc est, sciens, volens) ipsum velit offendere, ac non multò magis illorum Apostoli verborum meminerit: *Nolite contristare Spiritum Sanctum, in quo obsignati estis.*

Itaque, qui scienter etiam in parvis peccat, ad Christum non pertinet, & Spiritum Sanctum contristat. Unde meritò *Cassianus coll. 14. cap. 11.* Omnis

co-



cogitatio non solum turpis , sed etiam otiosa , & à DEO quantumcunque discedens à perfecto viro immundissima fornicatio deputatur. Et *S. Dorotheum Serm. 20.* Longè melius est corpus tuum & omnia perire simul , quàm lædi animam , etiam in re minima.

Imò *S. Hieronym. Epist. 14. ad Celant.* ait : Nescio , an possimus leve aliquod peccatum dicere , quod in Dei contemptum admittitur ; estque ille prudentissimus , qui non tam desiderat , quod iustum est , quàm quis iusserit , nec quantitatem imperii , sed imperantis cogitat dignitatem , quæ infinita est.

Ipsa boni dilatio , non sub gravi peccato impetrati , certè valdè venialis est culpa. Audi tamen de ea *S. Bern. Epist. 108.* Adverte hanc dilationem , quam tu tibi indulxisti , esse injuriam DEI ; non esse annum placabilem DEO , sed discordiæ cum DEO seminarium , iræ fomitem , nutrimentum apostasiæ , qui spiritum extinguat , gratiam intercludat , teporem afferat , qui DEO solet vomitum provocare.

Si tantum malum est differre bonum, quantum putas malum est ipsum patrare malum, & malum contra infinitum Bonum? & licet illa verba S. Bernardi directe impetant eum, qui differebat ingredi statum religiosum, ad quamcumque tamen boni dilationem optimo jure extenduntur. De venialibus certe loquitur S. *Augustin. Hamil. ult. ex so.* quod sint velut scabies, quò plura sunt, necant, (scilicet dispositivè sicut morbi) & nostram decus exterminant.

S. *Cesar Arelatensis* asserit, quòd sint pustulæ, & quasi horrendâ scabie repletia animam, & horrendam facientia, & ita mentis nostræ oculos infuscant, ut lumen Divinum non percipiant. Ita S. *Bernard. de convers. ad Cler. cap. 25.* sentit: Odibilis macula, quæ beatam adimit nobis visionem, & execrabilis negligentia, quâ dissimulamus interim illius oculi (scilicet interni) mundationem.

*VIII. Alii effectus peccatorum venialium.*

Ne venialia contemnamus , attendamus , quid dixerit *S. Bernard. Serm. 1. de Convers. S. Pauli*: Cavete deinceps , ne quis parva reputet , quamlibet parva , si scienter delinquere vincatur. Nemo dicat in corde suo , levia sunt ista , non curo corrigere , non est magnum , si in his maneam venialibus minimisque peccatis. Hæc enim , dilectissimi , impoenitentia , hæc blasphemia irremissibilis est.

Et qui negligent venialia , ruere in mortalia permittuntur. Ita *S. Gregor. p. 3. pastor. cap. 14.* Qui peccata minima flere , ac devitare negligit , à statu justitiæ , non quidem repente , sed partibus totus cadit. *S. Isid. Hispal. lib. 2. sentent. cap. 9.* Judicio divino in reatum nequius labuntur , qui distringere peccata sua minora contemnunt.

Et terribile est , quod *S. Gregor. p. 3. pastor.* reliquit : Nonnunquam deterius in parva quàm in magna culpa peccatur :

tur: major enim quò citius agnoscitur, eò etiam celerius emendatur, minor vero dùm quasi nulla creditur, eò pejùs quò & securius in usu retinetur.

Certè leve est in oratione mente distrahi, dùm oratio non ex præcepto. At illud quanti fecit *Cassianus coll. 13. cap. 27.* Non injustè non solùm levi peccato, sed etiam gravissimo impietatis crimine adstringitur, qui precem Domino fundens, subito à conspectu ejus quasi ab oculis non videntis, nec audientis, cogitationis improbæ vanitatem secatus, abscefferit.

Leve est mendacium, quod in nullius damnum vergit. At *S. Dorotheus Serm. 9.* dixit: Nullus mendax adhære-  
re unquam Deo, aut uniri potest; quia ut ait *S. Bernard. Serm. 59. in Cant.* non potest virtus pariter cum vitiis crescere. Imò *S. Hieronym.* cùm numerando alia vitia etiam mendacium recensuisset, asseruit: Quoties vitiis vincimur, DEUM negamus.

Veniale peccatum etiam quodammo-  
do ad fœdus cum dæmone disponit. Ita  
enim

enim *S. Macarius Homil. 27.* universim de peccatis loquitur: Ex proposito (id est, deliberatè) vitiosi sunt hi, qui suam ipsorum voluntatem vitio tradiderunt, delectantur cum illo, amicitiamque contrahunt; hujusmodi cum Sathana pacem habent.

Venialia peccata etiam aliquomodo irremissibilia sunt, si voluntarie fiant. *S. Chrysost. Serm. de Cant. David.* Qui volens delinquit, vel spontè furit, damnus est, neque veniam ab hominibus, neque misericordiam promeretur.

### *IX. Venialia peccata præparant ad mortale.*

Quomodo à venialibus ad mortalia peccata fit descensus, explicat *S. Joan. Chrysost. Hom. 19. ad pop.* Exiguum neglectum & omne reliquum destruit. Sæpiùs namque domos ædificantes homines, & tectum imponentes, unius tegulæ excussæ curam non gerentes, totam domum perdidierunt. Et in vestimentis idem evenire, quis cernere non possit? etenim parva in illis facta scissura non



refarcita magnam facit disruptionem. Hoc & in torrentibus multoties evenit : etenim si illi vel minimum cœperint ingressum , totum introducunt fluentem.

Et *Cassianus lib. 5. instit. cap. 20.* de venialibus gulæ peccatis ita loquitur , ut ad reliqua extendi possit : Qui gulæ superfluos inhibere appetitus non potuit , quomodo æstus carnalis concupiscentiæ extinguere valebit ? & qui non quivit passionem in propatulo sitas perfectasque compescere , quomodo occultas , nulloque teste prurientes poterit debellare ? *S. Isidor. Hispalens. lib. 2. sentent. cap. 19.* Experimento , vel contemptu minorum peccatorum majora committuntur.

X. *Mortale peccatum trahit in aliud mortale.*

Hoc in peccato , maximè mortali , pessimum est , quia non diu solum est. *S. Gregor. Homil. 11. in Ezech.* Omne quòd prius committitur , peccatum est , sed si citius poenitendo non tergitur , justo

dicio omnipotens Deus obligatam peccatis mentem etiam in culpam alteram permittit cadere, ut qui flendo & corrigendo noluit mundare, quod fecit peccatum incipiat peccato cumulare,

*Idem in Ezech. Hom. 9.* Districta sunt omnipotentis DEI judicia, & qui peccatorem expectat diu, ut redeat, non redeunti atque contemnenti ponit adhuc, ubi gravius impingat. Peccatum quippe, quod per poenitentiam citius non deletur, est & causa peccati, aut peccatum simul, & causa, & poena peccati. Hoc autem nobis cum tremore considerandum est, quomodo justus & omnipotens DEUS, cum præcedentibus peccatis irascitur, permittit, ut cæcata mens etiam in aliis labatur. Unde Moyles ait Genes. 15. *Nondum completa sunt peccata Amorrhæorum.* Et Psal. 68. *Appone iniquitatem super iniquitatem, ut non intrent in justitiam tuam.* Et Osee 5. *Maledictum, & mendacium, & furtum, & adulterium inundaverunt, & sanguis tetigit sanguinem.* Sanguis enim sanguinem tangit, quando peccatum

tum peccato additur. Apocal. 22. *Qui nocet, noceat adhuc, & qui sordidus est, sordescat adhuc.*

*XI. Facit, ut Deus nesciat peccatorem.*

Dum verò in hac miseria versatur peccator, incurrit quandam oblivionem apud DEUM. *S. Gregor. in 1. Reg. cap. 4.* Unusquisque ibi per peccatum projicitur, ubi occultatur, & quasi perditus ubi sit nescitur, quando justitiæ lucem, in qua DEUS posuit eum, dereliquit. Hinc est, quòd in paradiso post peccatum primum hominem quærit: Adam ubi es? hinc de mortuo Lazaro requirit: ubi posuistis eum?

*XII. Merita destruit, mortificat, mala revocat.*

Quidquid antecederet boni fuisti operatus, ubi hoc, in peccatum incidisti, amisti. Ita *Basil. Epist. ad Chilonem*: Qualem te invenio, talem judico. Ubi Moyses  
tot

tot pro DEO sumpti labores ? nonne momento ad aquam contradictionis, quæ illi ingressum in terram promissionis prohibuit, periêrunt ?

Quæ opera existens in mortali peccato operatur, non sunt ad vitam æternam. Hoc ostendit *S. Arsenio* ipse Dominus per visum hominis, qui haurit aquam de lacu, & mittit in collectaculum, ex quo alia parte effluat aqua. Sic qui aliqua bona operatur, sed quia mala etiam per peccata operatur, ideò pereunt, & delentur etiam bona opera, quæ facit. *In sacculum* nimirum *pertusum*, ut hoc ipsum aliâ phrasi eloquitur Sacra Scriptura, *mittit pecuniam suam*, Aggæi I.

### *XIII. Unius peccatum tota sæpe regna evertit.*

Peccati malum non in solo peccante sistit, sed sæpe in totam communitatem, cujus ille pars, refunditur quoad pœnas temporales, sicut & meritum quoad beneficia hujus temporis. Ita *Genes. 20.* propter Pharaonis adulterium in Saram desti-

destinatum non tantum Pharaonem flagellavit Deus plagis magnis, sed & domum ejus. Ob peccatum Giezi lepra ad posteros manavit 4. Reg. 5. Hinc S. Basil. Hom. 8. in divites avaros: Per paucos mala ærumnæque ad universum populum sæpius perveniunt, & unius obnoxam tota gens aliquando evertitur.

Et hoc non raro accidit. S. Aug. lib. 9. contra Julian. cap. 2. Quam multa sunt Divinarum testimonia scripturarum, quæ parentum peccatis obligant filios, numerare quis possit? Cur enim peccavit Cham, & in ejus filio Chanaan vindicta prolata est? cur pro peccato Salomonis filius ejus diminutione regni punitus est? cur peccatorum Achab Regis Israel in ejus posteros poena dilata est? DEUS dixit Exod 20. *Ego sum Dominus DEUS tuus, fortis zelotes, visitans iniquitatem patrum in filios, in tertiam & quartam generationem.*

Et hoc ipsum non solum propter mortale, sed etiam ob veniale peccatum accidit. Ita 4. Reg. 24. dat DEUS in direptionem regnum Israëliticum propter vanam glo-

F riam



riam Ezechiae, ex qua thesauros suos Legatis Babyloñis ostentavit, qui tamen alias Rex fuit sanctissimus. Vide ergo, ô peccator, quis contra te rugitus populorum, quæ accusatio consurget in die judicii, cum palam fiet plurimis, quod propter tua peccata vapularint; & quam poenam de te postulabunt?

Verum ob unius peccatum non solum in corporalibus bonis, sed etiam in bonis æternis multi (quod est longè horribilius) plectuntur, dum illis gratia subtrahitur efficax. Prædixit hoc fore Nathan ob peccatum Davidis, nam non tantum dixit, quod *non esset recessurus gladius de domo ejus*; sed hoc addidit: *Itaque hæc dicit Dominus: Ecce ego suscitabo super te malum de domo tua, & tollam uxores tuas in oculis tuis, & dabo proximo tuo, & dormiet cum uxori-  
bus tuis in oculis solis hujus.* Quæ

erant peccata Absolonis &  
aliorum futura.

# *XIV. Beneficia promissa avertit peccatum.*

Hinc etiã oritur, ut beneficia, quæ Deus destinaverat, imò promiserat, non sequantur. Patet hoc *Josue* 7 ubi post peccatum Achani Deus cladem in populum suum immisit, & addit: *Non ero vobiscum*; & tamen *Josue* promiserat, sicut *fui cum Moyse*, ita *ero tecum*. S. *Chrysost. Hom. 80. ad pop.* Deus cum aliqua dare bona pollicetur, indignos autem videt effectos, tunc sua revocat promissa.

Et hoc contingit etiã propter peccatum veniale. Nam Deus promiserat *David* 2. Reg. 7. *Requiem tibi dabo ab omnibus inimicis tuis*; & tamen, postquam numeravit populum, in quo juxta DD. non excessit venialem culpam, etsi millia septuaginta virorum fuerint illi peste sublata in pœnam hujus peccati, etiã bella sunt promissa.

# *XV. Reliquæ peccati immunitates.*

Sed si placet intueri statum animæ Diabolo per peccatum subjectæ, præ

oculis habeamus verba *B. Isaie Abb. Orat. 25.* Sicut quando ab hoste capitur civitas, imagines prioris Regis evertit, leges condit, portas veteres claudit, novas aperit &c. sic etiam anima post susceptum Baptisma (in aqua, vel remissione peccatorum; nam latissimè sumit nomen baptismatis hinc Sanctus pro absolutione sacramentali) à diabolo expugnata, qui eam pro libidine sua evertit, atque vastavit, exturbata veri Regis imagine, suam erexit, fecitque, ut misera anima seculi istius curis & sollicitudinibus vacaret.

Destruit itaque hostis per peccatum in anima gratiam DEI, quæ est veri Regis insigne, virtutes infusas, dona Spiritus S. imò ipsum Regem verum in patibulum agit. Ita enim *B. Petrus Damian. Serm. 48.* fieri ex *S. Paulo* docet, atque mōnet, ne fiat: Vide ne rursus tibi metipsi crucifigas Filium DEI, & hostem tui habeas, rursus fabricans crucem, in qua crucifigatur ille, qui resurgens ex mortuis jam non moritur &c. Cum enim elevas te, & ambulas collo  
ex-

extento, caput Altissimi spinarum multiplicatè contorques; cùm ponis oculos tuos, ut non respicias cœlum, & voluptuosis carnis tuæ motibus moveris & traheris, durioribus clavis pedes Omnipotentis transverberas; ab inferiori inferis supplicium, dum momentaneâ voluptate voluntatem Domini excludis. Cùm prosperaris in iniquitate, felici cursu rerum peccata peccatis cumulans, clavum ponis in illius dextra, quem de suis bonis persequi non desistis. Cùm verò abundantiori tristitiâ absorberis, & tuam impietatem pietati DEI præponderas, sinistram ejus transfigis, & conceptum furorem furore tuæ desperationis amplificas. Denique cùm præsumis defendere, quod fecisti, lancearum ictum lateri Salvatoris intorques.

Hoc verò posito subjungo decretum *S. Gregor. lib. 2. in 1. Reg. cap. 1.* Rationis lex exigit, ut qui Conditorem persequitur, veniâ defraudetur. Cujus prece illud peccatum indulgetur, quod in ipsum indultorem committitur? Quis pro eo omnipotentem patrem obsecrat,

qui coæternum Unigenitum in mortem damnat? Et *lib. 2. in cap. 3.* Peccare & de DEI misericordia præsumere, pelago ejus justitiæ est exponi.

Imaginem hîc peccatoris, quam Deus *S. Brigittæ* ostendit *lib. 4. Rev. cap. 57.* apponamus. Ita hæc Sancta inquit: Videbatur mihi unus homo, cujus oculi eruti erant, sed tamen dependebant ad maxillas cum duobis nervis, hic habebat aures sicut carnis, nares sicut equus, os sicut ferocissimus lupus, manus ad modum bovis maximi, pedes sicut vulturis. Una quoque mulier videbatur juxta eum stare, cujus crines erant sicut vepres, oculi erant in occipite, aures abscissæ, nares plenæ sanie & & putredine, labia sicut dentes serpentis, in lingua erat aculeus venenosus, manus erant sicut duæ caudæ vulpinæ, pedes sicut duo scorpiones.

Dum Sancta dubitaret, an essent isti dæmones, respondit Christus, homines esse, sed coram D E O apparent à diabolo in animabus suis taliter deformes facti.

Et



Et exponit : Isti duo oculi sunt eruti, quia non fecit opera bona. Habet aures caninas, quia sicut canis non tantum nomen Domini neque alterius curat, quantum nomen suum proprium, quando nominari auditur; ita etiam iste non tantum curavit de honore nominis D E I, quantum de honore nominis proprii. Habet etiam equinas nares, nam sicut equus, qui solutus est, ejecto stercore suo delectatur nares apponere illi; similiter iste facit, cum perpetrato peccato de ipsius foetore dulce sibi videtur cogitare oblectamentum.

Et reliqua sic explicat : Os lupi instar est ob avaritiam insatiabilem; manus instar pedum bovis, quia in ira omnia conculcat; pedes vulturis, quia, quod rapuit, non intendit restituere : mulieris verò capilli sunt spinæ, quia cogitationes illius sunt, quomodo placeat mundo, non autem DEO; oculi in occipite sunt, quia ad transitoria sunt conversi; aures abscissæ sunt, quia Dei verbum non audit; nares plenæ putredine sunt, quia sicut odorem bonum alii ad fortifi-

candum cerebrum attrahunt, ita iste spurtias ; os serpentinum est , ex quo prodit aculeus venenosus ; manus vulpium caudæ ob levitatem actionum sunt.

## CAPUT VI.

# GRAVE JUGUM SUPER POENITENTES.

## *1. Quia sæpè fit pœnitentia ludicra.*

**H**Oc punctum è parabola quapiam facile percipiemus. Fingamus: Occidit quispiam nefariè & crudelissimè Regi potentissimo , ac suo maximo benefactori optimum , ac dilectum unicè , unicùmque filium. Deprecatur : pœnitet me vehementer hujus facinoris , ô Rex optime , & ut videas , quàm pœniteat me vehementer , in satisfactionem unam tibi stipulam , vel paleam offero. O indignitas ! illudit of-  
fen-

senso qui taliter satisfacit. Sed annon etiam nos occidimus Christum Domini? & illum optimum, dilectum unicè, unicumque Christum? quid verò damus? quâ satisfactione dolorem testamur? unius scilicet oratiunculæ, idque tepidissimâ prolatione.

M Dicat rursus ille sicarius: Amo te, mi Rex, & summè amo. Vis scire quantum? minùs certè quàm hoc lutum, hanc bilem à me vomitu rejectam. Nam mallem te mori & occidi ab aliquo, quàm ut mihi aliquis tollat hoc lutum. Scilicet citiùs peccabo mortaliter, quàm auri, argenti, mæque voluptatis jacturam patiar, iram & bilem meam deferam: & licet aliter hoc oretenùs dicam, experire, annon ita reipsâ faciam. Nemo mihi tollat meam bilem, quam collegi contra inimicum; nemo persuadeat, ut petenti propter te condonem; & tamen te summè amo. Audite hæc cœli, & obstupescite vehementer.

## *II. Sape inefficax propositum.*

Jam verò ad omnem dolorem, qui peccata aboleat, requiritur propositum

F 5 effi-

efficax de cætero non peccandi. Iratus est quispiam alteri, & proponit irâ eum prosequi, en prodit se in effectu inefficacem propositi: deprecatur alter, hic non cedit; blanditur alter, hic durescit; satisfactionem ille spondet, hic abnuuit; agit ille per amicos, respuit; memorat antiqua merita, ecce iste contemnit. At verò proposuit vitare peccatum, nemo ita urget, nemo æquè sollicitat, nemo lucra, nemo vetera merita, damna futura, & pœnas proponit, sed occasio se minima offert, & ecce ab illo efficaci proposito abit.

Magis ergo sumus fidi in obsequio dæmonis cum præmio gehennæ, quàm in Christi famulatu cum mercede cœli. Miseros nos! si dæmon Christo improperabit, ut est apud *S Cyprianum*: O Christe, non solum dum peccabant, te mihi postponebant, sed etiam dum reconciliabantur, tibi nolebant attingere mensuram, ut eadem probarent se tibi efficaciter statuisse, quâ mihi probârunt sua proposita.

Proponit alter consequi dignitatem, quia efficaciter proponit; patitur repulsam

lam, non cessat; elargitur suas opes in munuscula ob spem dubiam, comparat amicos, sustinet omnia. En quanta in illo firmum atque efficax propositum operatur!

At hinc oppones, naturam esse pronam in malum, & parem naturæ consuetudinem. Oppono etiam, quod dixit *S. Ioan. Clim. gr. 4. coll. 11.* Consuetudo plurimum valet, & cuncta ex eâ pendent, eamque sequuntur; omnino longè amplius valebit in bonis, cum potentissimum habet adiutorem Deum. An gratia inferior est viribus, quæ ad bonum datur?

### *III. Pœnitentia debet esse digna.*

Non dictum est, *Facite fructus*, sed *Facite fructus dignos pœnitentia*. Legem scripsit S. Apostolus Rom. 6. *Sicut exhibuistis membra vestra servire immunditiæ, ita nunc exhibete membra vestra servire iustitiæ in sanctificationem.* S. Greg. Hom. 10. in Evang. Sciendum est, quia quisquis illicita nulla commisit,



huic jure conceditur, ut licitis utatur, sicque pietatis opera faciat, ut tamen, si voluerit, ea, quæ sunt mundi, non relinquat: at si quis in fornicationis culpam, vel fortasse, quod est gravius, in adulterium lapsus est, tantò à se licita debet abscindere, quantò se meminit & illicita perpetrâsse.

Certè ille innocentissimus pœnitens Sanctus Franciscus, ut de eo *S. Bonavent. vita c. 50.* ait, nemora replebat gemitibus, loca spargebat lacrymis, pectora manu tundebat &c. nec malè, quia, ut *S. Greg. ad S. Augustinum Episcopum Anglorum,* scripsit *resp. ad interrogat. 10.* bonarum mentium est ibi etiam aliquomodò culpam agnoscere, ubi culpa non est. Et *S. Basil. docet in Psal. 29.* Non cuilibet animæ gaudium à DEO ingignitur, sed ei, quæ peccatum suum vehementi luctu, & assiduâ lamentatione ploraverit, veluti si seipsum mortuum lugeat, qui sanè fletus postremò in gaudium vertitur.

Idcirco *S. Bernard. Serm. in festo SS. Petri & Pauli.* Multi pœnitentiâ ducti sunt, sed infructuosâ, quoniam pœnitentia eorum reprobata est, sicut & prior culpa.

Con-

Conjicio causam, dum lego *Tertull.*  
*lib. de pœnit.* Num in coccino & tyro  
 (hoc est, in purpura) pro delictis suppli-  
 care decet? Cedò acum crinibus distin-  
 guendis, & pulverem dentibus eliminandis,  
 & bisfulcum aliquid ferri vel æris ungui-  
 bus repastinandis. Si quid ficti nitoris,  
 si quid cocti ruboris est, in labia aut ge-  
 nas urgeat. Præterea exquirito balneas  
 lætiores hortulani maritimæve secessûs,  
 adjicito ad sumptum, conquirito altili-  
 um enormem saginam, defecatam sene-  
 stutem quamque vini. Quis interrogâ-  
 rit, cur animæ largiaris? Deliqui dicito  
 in Deum, & periclitor in æternum pe-  
 rire, itaque nunc pendeo, & maceror,  
 & excrucior, ut DEUM reconciliem  
 mihi, quem delinquendo læsi. Ita-  
 que &c.

#### IV. *Modus pœnitendi durus.*

Sic instituendam docet pœnitentiam  
*S. Ambr.* scribens *ad lapsam cap. 8.* Er-  
 go tu hæc mecum cogitans, & mente  
 retractans, proprii facti tui ipsa esto ju-  
 dex crudelior. Inprimis omnis cura vi-  
 ta

ta hujus interimenda tibi est , & quasi mortuam te existimans, sicut es, quomodo possis reviviscere cogita. Deinde lugubris tibi accipienda est vestis, & mens ac membra singula dignâ castigatione punienda. Amputentur crines, qui per vanam gloriam occasionem luxuriæ præstiterunt. Defluant oculi lacrymas, qui masculum non simpliciter aspexerunt. Palle scat facies, quæ quondam viruit impudicæ. Denique totum corpus incuriâ maceretur, cinere aspersum, & operum cilicio perhorretcat &c.

Talem poenitentiam ab una delicatula persona exigit hic Sanctus. *Tum addit:* Talis vita, talis actio poenitentia, si fuerit perseverans, audebit sperare etsi non gloriam, certè poenæ evacuationem.

O mi DEUS, post tantam poenitentiam nondum promittit gloriam hic S. Doctor. Sed & *S. Cyprianus Serm. de lapsis*: Lamentari eum putamus toto ex corde, jejniis, fletibus, & planctibus Dominum deprecari, qui epulis affluentibus pastus postridie cupiditates suas eructat? Qui hilaris ac lætus incedit, quo-

quomodo mortem suam defleat? Anima, in quacunque hora peccaverit, morte morietur. Si quem de tuis charis mortalitatis exitu perdidisses, ingemisceres dolenter ac fleres, facie incultâ, veste mutatâ, ore dejecto indicia mœroris ostenderes. Animam tuam miser perdidisti, & non acriter plangis, non jugiter ingemiscis?

Qualia verò bona pro peccatis debeamus præstare, docet *S. Gregor. in 1. Reg. lib. 2. cap. 5.* A peccatorum nostrorum tunc obligatione solvimur, cum bona, quæ pro eorum impendimus absolutio-  
ne, malis admixta non sunt. *1. Reg. c. 7.*  
*Si in toto corde vestro convertimini ad Dominum Deum, auferete Deos alienos, liberabit vos de manu Philistiim.* Audiant ergo, audiant, qui de manu Philistiim liberari desiderant. *Ibid. lib. 5. c. 4.*  
Quid prodest confiteri flagitia, si vocem confessionis non sequitur pœnitentia? Signum veræ confessionis non est in oris confessione, sed in afflictione pœnitentiæ. Facite dignos fructus pœnitentiæ. Confessionis ornatum non recipit DEUS  
fine

sine fructu afflictionis. *Marc. 11. arborem sine fructu maledixit.*

*V. Quos male pœnitet, augent  
pœnam.*

Non leguntur filii Heli patri monenti obstitisse, non objurgationes risisse, humiliati sunt, sed non verè. Quid inde secutum, dicat *S. Gregor. lib. 1. in 2. Reg. cap. 1.* Tanta fuit magnitudo culpæ illorum, ut & conversionis momenta non haberent, & à mortis suæ fovea nequam surgere possent; & qui iræ DEI pelagus biberant, in damnationis suæ cumulum haberent non solum pœnam commissi sceleris, sed etiam vindictam contemptæ prædicationis.

Monuit *S. Ephrem Paranesi 22.* Demus operam, ut digna pœnitentiæ opera agamus, ne duplicatum in his supplicium inveniamus, tanquam divinam gratiam aspernantes, & beneficiorum ipsius non recordantes, quod scilicet nobis præstet auxilia & tempus ad pœnitendum.

*S. Hieronym. in Epist. ad Rom. cap. 12.*  
Sicut qui paulatim arcum intendit, tempus



pus dat alteri, ut fugiat, qui si fugere nolit, tantò fortius sagittâ configitur, quantò majori tempore arcûs intensio fuerat facta: ita planè DEUS, quò diutius poenitentiam dignam expectat, eò severius punit.

### *VI. Raros verè poenitet.*

Ex allatis facilè intelligitur illud S. *Ambr.* dictum *lib. 2. de poenit.* quamvis & ipse se explicat. Sic autem inquit: Facilius inveni, qui innocentiam servaverunt, quàm qui congruè egerint poenitentiam. An quisquam poenitentiam putat, ubi acquirendæ ambitio dignitatis, ubi vini affusio, ubi ipsius culpæ conjugalis usus est? Renunciandum seculo est, ipsi somno minis indulgendum, quàm natura postulat, interpellandus gemitibus, interrumpendus suspiriis, sequestrandus orationibus, vivendum ita, ut vitali huic moriamur usui, seipsum homo abneget, & totus immutetur.

### *VII. Quos poenitet, debent vitam emendare.*

Et in tantum ista vitæ mutatio requiritur,

ritur, ut etiam si peccata essent dimissa, parum prodesset. *S. Bernard. Serm. 3. in Cant.* Si dixerit mihi JESUS, dimittuntur tibi peccata tua, nisi ego peccare desiero, quid proderit? Exui tunicam meam, si reinduero eam, quantum profeci? si rursus pedes meos, quos laveram, coinquinavero, nunquid aliquid lavisse valebit? Sordens omni vitiorum genere diu jacui in luto fæcis, sed erit sine dubio recidenti deterius quam jacenti. Denique qui me sanum fecit, ipsum mihi dixisse recordor: *Ecce sanus factus es, jam amplius noli peccare, ne quid deterius contingat tibi.*

#### *VIII. Post pœnitentiam peccare est gravius.*

Et certè quid deterius contingit. Ita enim *Tertullianus de pœnit.* Non leviter in Dominum peccat, qui cùm æmulo ejus diabolo pœnitendo renuntiasset, & hoc nomine illum Domino subjecisset, rursus eundem regressu suo erigit, ut denuò malus dæmon recuperatâ præ-

dâ

dâ suâ adversus Dominum gaudeat. Nonne , quod dicere quoque periculosum est , sed ad ædificationem dicendum, diabolum Domino præponit? Comparationem enim videtur egisse, qui utrumque cognoverit, & consideratè pronuntiâsse eum meliorem, cujus se rursus esse maluerit. Ita qui per delictorum pœnitentiam instituerat Domino satisfacere, diabolo verò per aliam pœnitentiæ pœnitentiam satisfacit, erit tantò magis perosus DEO, quantò æmulo ejus acceptus.

### *IX. Pœnitentia ad mortem dilata dubia.*

Jam etiam de illis , qui ad mortem pœnitentiam differunt , & confidunt se liberalibus testamentis , & assignatione Eleemosynarum consecuturos veniam , audiamus *S. Salvianum lib. 1. ad Ecclesiam* : Qui à malis actibus tantum morte discedit, non relinquit scelera, sed relinquitur à sceleribus, ac per hoc necessitate exclusus est à vitiis, & tunc puto peccat

cat, quando peccaverit, (id est, quando cessat peccare, quia non potest) quia quantum ad animum nec dum desit, qui adhuc velit peccare, si possit. Non bonis itaque spebus innititur, qui ad hoc tantum peccat in vita, ut peccatorum molem redimat in morte, & ideo se evasurum putat, non quia bonus, sed quia dives sit; quasi verò Deus non vitam hominum quærat, sed pecuniam, atque à cunctis malorum redimendorum spe agentibus accipere solos pro criminibus numeros velit, & corruptorum more Judicum argentum exigat, ut peccata vendat.

*Et post pauca*: Quodsi tanta fuerit ægrotorum incuria, ut valetudinis labem (id est poenitentiam) usque ad ultimos dies trahant, quid dicam, nescio, quid promittam, penitus ignoro. Revocare ab inquisitione ultimi remedii periclitantes durum & impium est, spondere autem aliquid in tam fera cautione temerarium.

*S. Greg. Hom. 12. in Evang.* Qui poenitenti veniam spondit, diem peccanti

ti crastinum non promisit. Ecce hunc ipsum diem, in quo loquimur, ad inducias conversionis accedimus. *Orate, ne fuga vestra fiat hyeme, aut in Sabbato;* ac si aperte dicat: Videte, ne tunc quæeratis peccata vestra fugere, quando jam non licet ambulare.

*X. Peccatorum deliberatè admissorum difficilis venia.*

Illud verò est admodum terribile, quod idem *S. Pater lib. 4. in Reg. cap. 2.* reliquit: Quibus peccata dominantur, per se ab eorum jugo liberari nequeunt: nam sæpè ad Dominum cum precibus veniunt, sed exaudiri non possunt. Divino siquidem judicio cum iis agitur, ut qui noluerunt mala vitare, cum possent, non possent vitare, cum volunt, & qui spontè incurrunt mala præcognita, fugere non possint experta.

*Idem Pastoral. p. 1.* Hoc à præcipatione lapsis per consilium pereuntes differunt, quòd cum à statu justitiæ peccando concidunt, plerumque simul & in



in laqueum desperationis cadunt. In quam rem servit illud *Tertull. lib. de pœnit.* Quidam autem sic opinantur, quasi Deus necesse habeat etiam præstare indignis, quod sponndit, & liberalitatem ejus faciunt servitium. Quodsi necessitate indulget, ergo invitatus facit? quod dici non potest.

Itaque in spem pœnitentiæ non peccandum. Exempla suggerit non acceptæ à DEO pœnitentiæ S. Scriptura in Esau & Antiocho, & de hoc quidem 2. Mach. 9. *Orabat autem hic scelestus Dominum, à quo non esset misericordiam consecuturus.* De Esau verò Hebr. 12. *Non invenit pœnitentiæ locum, quamquam cum lacrymis inquisivisset eam.*

## CAPUT VII.

GRAVE JUGUM  
SUPER OMNES.

## 1. Quia ad miseras nascimur.

**S** *Sanctus Cyprianus lib. 1. de Bono patient. in proëm.* Omnes nos sumus

mus destinati ad gemitus totâ vitâ. *S. August. Soliloq. cap. 2.* Vita mea vita fragilis, vita caduca, vita quæ quantò magis crescit, tantò magis decrescit, quantò magis procedit, tantò magis ad mortem accedit, vita fallax & umbratica, plena laqueis mortis. Nunc gaudeo, statim tristor, nunc vigeo, jam infirmor, nunc vivo, statim morior, nunc felix appareo, statim miser; nunc rideo, jam fleo; sicque omnia mutabilitati subjacent, ut nihil unâ horâ in uno statu permaneat. Hinc timor, hinc tremor, hinc fames, hinc sitis, hinc calor, hinc frigus, hinc languor, inde dolor exuberat. Subsequitur his importuna mors, quæ mille modis miseros homines inopinatè rapit. Hunc necat febribus, illum opprimit doloribus; hunc consumit fames, illum sitis extinguit; hunc suffocat aquis, illum interimit laqueo; illum perimit flammis, alium dentibus bestiarum ferocium vorat; hunc trucidat ferro, illum veneno corrumpit, alterum tantùm repentino terrore vitam finire compellit. Et nunc super omnia magna miseria est, quia

quia cum nihil sit certius morte, ignorat tamen homo finem suum, & cum se stare putat, colliditur, & perit spes ejus. Et hæc mala ipsi peccatis nostris cumulamur.

*II. Si non affligimur, malè agitur nobiscum.*

*S. Gregor. 9. Epist. 39.* Ego Abel esse non suspicor, qui Cain non habuerit. *Et 6. Epist. 27.* Ego fidenter dico, quia minus piè vivis, si minus persecutionem pertuleris. *S. Ambr. in Psal. 118.* Fortassè cum persecutionem non patimur, tanquam condemnati habemur. *S. Chrysost. Hom. 29. in Epist. ad Hebr.* Si flagellat Deus omnem filium quem recipit, qui non flagellatur, sine dubio non est in numero filiorum.

*Idem in Psal. 125.* Quemadmodum semina opus habent imbribus, ita nos lacrymis; & quemadmodum terra opus habet, ut aretur & proscindatur, ita anima fidelis pro ligone indiget tentationibus & afflictionibus, ne producat malas herbas, ut ejus molliatur durities, nè nimium effe-  
ratur

ratur & exiliat : nam terra quoque , nisi diligenter colatur , nihil boni producit. *S. Gregor. 23. Moral. 15.* Electis suis ad se pergentibus Dominus hujus mundi iter asperum facit.

### *III. Omnibus inimicus insidiatur.*

*S. Bernard. Serm. 1. de S. Andr.* Habet nequissimus ille laqueos , habet & jacula , utpotè callidissimus venator hominum , solum sitiens sanguinem animarum. Alios telis appetit malitiosæ cujuslibet suggestionis , & in eis vulnerat multos , quibus tenuis est patientia ; alios voluptatibus irretire laborat , & in his includit multitudinem copiosam illorum , qui in terra repunt , aut volitant juxta eam. His commovetur appetitus , qui velut effrenos equos emittit passiones , illis autem misera anima passim in præceps vehitur ac rapitur. *S. Ambr. lib. de Isaac & anima cap. 8.* Mali equi sunt iracundia , concupiscentia , timor , iniquitas , interdum ipsi equi inter se diffident , & se invicem impediunt , & viam salutis nobis difficillimam reddunt.

G Hinc

Hinc *S. August. lib. 2. contra Julian. c. 10.* ait: Sine peccato semper effemus, si sanaretur hoc malum concupiscentiæ repugnantis legi mentis nostræ.

*V. Omnes se debent abnegare.*

*Lucæ 9. Dicebat autem ad omnes: Si quis vult venire post me, abneget semetipsum S. Thom. opusc. 18. de perfect. asserit, abnegationem sui ipsius esse de necessitate salutis. Et Guilelm. Estius c. 8. Non consilii sunt verba hæc, sed præcepti, omnes enim, qui volunt venire post Christum, semetipsos abnegare, crucem suam tollere, & ita Christum sequi tenentur: in quantum autem hoc non facimus, peccamus.*

*VI. Prædestinatio Dei occulta.*

*S. Bernard. Serm. 37. in Cant. Consilium hoc posuit tenebras latibulum suum, & sermo absconditus est à nobis, ita ut nemo sciat, si dignus sit amore vel odio.*

*S. Aug. Soliloq. cap. 28. Omnes nōs quasi pannus menstruatus, de massa corrupta*



rupta & immunda venientes, maculam immunditiæ nostræ in frontibus portamus. Quare mundi esse non possumus, nisi tu, Domine, mundaveris, qui solus es mundus. Mundas autem de nobis filiis hominum eos, in quibus tibi complacuit habitare, quos ab inaccessibilibus profundis secretis judiciorum incomprehensibilium sapientiæ tuæ, semper justorum, licet occultorum, sine eorum meritis prædestinasti ante mundum, vocasti de mundo, justificasti in mundo, & magnificas eos post mundum.

Non omnibus autem hoc facis, quod admirantur tabescentes omnes sapientes terræ. Et ego, Domine, hoc considerans expavesco & obstupesco de altitudine divitiarum sapientiæ & scientiæ tuæ, ad quam ego non pertingo, incomprehensibilia judicia justitiæ tuæ, quoniam ex eodem luto alia quidem vasa facis in honorem, alia verò in contumeliam sempiternam. Quos igitur tibi elegisti de multis in templum sanctum tuum, ipsos mundas, effundens super eos aquam mundam, quorum nomina

numerumque tu nosti, qui solus numeras multitudinem stellarum, & omnibus eis nomina vocas; qui etiam scripti sunt in libro vitæ, qui nequaquam perire possunt, quibus omnia cooperantur in bonum, etiam ipsa peccata, quia post illa ferventiores evadunt. Cum enim cadunt, non colliduntur, quia tu supponis manum tuam, custodiens omnia ossa eorum, ut unum ex eis non conteratur.

Attamen mors peccatorum pessima, illorum inquam, quos, antequam faceres coelum & terram, secundum abyssum multam judiciorum tuorum occulitorum, semper autem justorum, præscivisti ad mortem æternam, quorum dinumeratio nominum, & meritorum pravorum apud te est, qui numerum arenæ maris dinumerasti, & dimensus es profundum abyssi, quos reliquisti in immunditiis suis, quibus omnia cooperantur in malum, & ipsa etiam oratio vertitur in peccatum, (quia scilicet cum peccatis peragunt) ut si etiam ad coelos usque ascenderint, & caput eorum nubes tetigerit, & inter sidera coeli collocave-

caverint nidum suum, quasi sterquilinum  
in fine perdentur.

*VII. Signa prædestinationis non  
in omnibus reperiuntur.*

*Si vis ad vitam ingredi, serva man-  
data.* Mandata verò omnia colligit in  
duo, amorem scilicet Dei & proximi :  
prior in eo consistit, ut non peccemus,  
& bene faciamus, & de hoc jam egimus  
non uno loco superius; posterior, ut di-  
ligamus omnes, etiam inimicos, idque  
purè propter DEUM, qui amor non  
adeò frequens est. *S. Gregor. Hom. 38. in  
Evang.* Si quis quemlibet amat, sed  
propter DEUM non amat, charitatem  
non habet, sed habere se putat.

At quomodo amici & inimici pro-  
pter Deum acquirendi sunt? interrogat  
*S. Chrysost. Orat. in Kalend.* & respondet,  
si non amicitias illas colligamus, unde  
pecunias corripere, convivia agitare, im-  
peria consequi poterimus, sed illos pro-  
sequamur, qui mentem nostram mode-  
rari, præcipere honesta, peccantes in-

crepare, delinquentes arguere, supplantatos erigere, consilio ac precibus opem ferre, & ad DEUM adducere possunt.

Unde si inimicus tibi prosit ad salutem, imò prodest, quia saltem tibi mundum amarum reddit, ama illum. Inquam rem facit monitum *B. Laurent Justin. de casto connub. cap. 6.* Nunquam sine patientiæ exercitio charitas esse solet. *Et de contemptu mundi cap. 19.* Flagelli eruditio cum patientia indubium prædestinationis agnoscitur esse præsagium; siquidem per multas tribulationes oportet intrare in regnum cœlorum. Oportet crucem tollere.

Sed quid sit ferre crucem, respondet *S. Basil. instit. Mon. cap. 3.* Paratum esse ad mortem pro Christo, & mortificare membra quæ sunt super terram, & pro nomine Christi libenter ferre omne discrimen, hoc est tollere crucem suam.

Et hoc quidem ad dilectionem  
Dei spectabat.

VIII. *Et si habuerimus signa præ-  
destinationis, sumus incerti de  
perseverantia.*

Multos in via salutis præcesserunt pu-  
blicani & meretrices. Sed hoc verbis S.  
*Chrysostom. Hom. 40. ad pop.* eloquamur:  
Quid Manasse deterius? Deum tamen  
propitium habere potuit. Quid Mat-  
thæo deterius? & constitutus est Apo-  
stolus. Quid Paulo miserius? sed con-  
stitutus est Evangelii præco. Quot ta-  
les alias vis videre mutationes & quon-  
dam gestas & quotidie occurrentes?

S. *Gregor. in Job. lib. 25. cap. 7.* Oc-  
cultum est iudicium, quod piè super nos  
justèque disponitur, quomodo alii per-  
dunt, quod tenere videbantur, & alii  
accipiunt, quod alii ex meritis perdunt;  
ut & qui stare videntur humano iudicio,  
jam in conspectu Iudicis non stent. Quis  
enim hominum æstimare potuisset, Ju-  
dam vivendi sortem, etiam post mini-  
sterium Apostolatûs, amittere? & quis  
contra crederet, latronem causam vitæ  
in ipso articulo mortis invenire?



IX. *Judicium Dei rigidum.*

*S. Chrysostom. in illa verba Apost. Salutate Priscam.* In illo die magno non solum de his, quæ nos peccavimus, sed & de his, ob quæ in alios sententiam tulimus, omninò judicabit nos DEUS, & quod sæpè naturâ leve peccatum est, hoc grave & incondonabile fit, dum peccans alium judicat. Fortè non satis claret, quod diximus, igitur clariùs dicemus. Peccavit aliquis, & alium idem committentem peccatum condemnavit, is in die illo valdè amaro non illam poenam luet, quam peccati natura exposcit, sed majorem quàm duplicem vel triplicem.

Atqui teste eodem *S. Patre lib. 1. de compunct. cordis*, ab hoc vitio neque Monachorum ullum facile invenies liberum.

X. *Omnes oportet ante tribunal Dei Judicis comparere.*

O quàm tribunal horribile! Audiamus, quid de illo dicat *S. Ephrem Serm. de SS. Cruce*: Cælum & terra tunc fuge-

re tentabunt, & quis poterit subsistere? sed quotus etiam in illo absolvetur? *Idem Sanctus in testamento* sic ipsum Judicem alloquitur: Ac licet iudicium universæ terræ feceris, sicut gratia tua declarat ac postulat, non salvabitur unus ex millibus, & ex decem millibus non redimentur duo.

Sed nemo melius *S. Prophetâ Sophoniâ* diem illam nobis describet. Ita ille cap. I. nomine Dei loquitur: *Et erit in tempore illo, scrutabor Jerusalem in lucernis, & visitabo super viros defixos in facibus suis.* Et paulo post: *Juxta est dies Domini magnus, juxta est, & velox nimis, vox diei Domini amara, tribulabitur ibi fortis. Dies ira dies illa, dies tribulationis & angustia, dies calamitatis & miseria, dies tenebrarum & caliginis, dies nebula & turbinis, dies tubæ & clangoris super civitates munitas, & super angulos excelsos, & tribulabo homines, & ambulabunt ut cæci.* Quis hic status rerum ô Judex severe!

Similia *Ezechiel* capite 7. inclamat: *Finis venit, venit finis super te, & im-*

G 5 mit-

*mittam furorem meum in te , & judicabo te juxta vias tuas , & ponam contra te omnes abominationes tuas , & non parceret oculus meus super te ? & non miserebor , sed vias tuas ponam super te , & abominationes tue in medio tui erunt , & scietis quia ego Dominus. Hac dicit Dominus Deus : Afflictio una , afflictio ecce venit , venit contritio super te , qui habitas in terra , venit tempus , propè est dies occisionis & non glorie montium. Nunc de propinquo effundam iram meam super te , & judicabo te juxta vias tuas , & imponam tibi omnia scelera tua , & non parceret oculus meus , nec miserebor , sed vias imponam tibi , & abominationes tue in medio tui erunt.*

*Quæ ibi hominum conditio enarrat Amos 5. Dies Domini ista tenebræ & non lux , quomodo si fugiat vir à facie leonis , & occurrat ei ursus , & ingreditur domum , & innitatur manu suâ super parietem , & mordeat eum coluber. Nunquid non tenebræ dies Domini & non lux , & caligo & non splendor in ea ?*

Isaïæ 24. Qui fugerit à voce formidinis, cadet in foveam, & qui se explicaverit de fovea, tenebitur laqueo, quia cataraëta de excelsis apertæ sunt, & concutientur fundamenta terra. Confractione confringetur terra, contritione conteretur terra, commotione commovebitur terra, agitatione agitabitur terra, sicut ebrius. Et capite 13. Omnes manus dissolventur, & omne cor hominis contabescet & conteretur. Torsiones & dolores tenebunt, quasi parturientes dolebunt, unusquisque ad proximum suum stupebit, facies combustæ vultus eorum. Quid ibi miser agam, quò me vertam?

Job. 4. Nunquid homo Dei comparatione justificabitur. Et statim: Ecce qui serviunt ei, non sunt stabiles, & in Angelis suis reperit pravitatem, quantò magis hi, qui habitant domos luteas, qui terrenum habent fundamentum, consumuntur velut à tineas? De mane usque ad vesperam succidentur, & quia nullus intelligit, in aeternum peribunt.

Et postea: Si iustificare me voluero, os meum condemnabit me, si me innocentem

tem ostendero, pravam me comprobabit.

Cap. 12. Apud ipsum est fortitudo & sapientia, ipse novit & decipientem, & qui decipitur. Cap. 14. Quis est homo, ut immaculatus sit, & ut justus appareat natus de muliere. Ecce inter Sanctos ejus nemo immutabilis, & cœli non sunt mundi in conspectu ejus, quanto magis abominabilis & inutilis homo, qui bibit quasi aquam iniquitatem. Cap. 25. Ecce luna etiam non splendet, & stella non sunt munda in conspectu ejus, quanto magis homo putredo, & filius hominis vermis.

Sed quale ipsum sit judicium Ezech. 28. audiemus de se loquentem Judicem: *Judicabo cum peste & sanguine, & imbre vehementi, & lapidibus immensis, ignem & sulfur pluam super eum.*

Qualis Judex? Isai 59. *Indutus est justitiâ ut loricâ, & galea salutis in capite ejus, indutus est vestimentis ultionis, & opertus est quasi pallio zeli sicut ad vindictam, quasi ad retributionem indignationis hostibus suis, & vicissitudinem inimicis suis.*

Quam



Quàm meritò ille senex, de quo in *Vit. PP. lib. 4.* cùm ridentem quempiam vidisset, dixit: Coram cœlo & terra rationem reddituri sumus, & tu rides?

Quàm meritò *S. Ephrem cap. 1.* deflet peccata sua, cùm semel respexisset cœlum, dixit: Repentè cùm mihi terribilis illius adventus venisset in mentem, animo & corpore totus exhorruì, & contremuerunt omnia ossa mea, atque ita fractus ac perturbatus magno cum dolore cordis vim lacrymarum effudi, & cum gemitu dixi: Quomodo ego peccator in illa formidanda hora consistam? quomodo miser hœdus cum ovibus Christi? cùm sua Martyres ostendent tormenta, virtutes suas Confessores, quid ego ostendam, nisi pigritiam & negligentiam meam?

Jam verò quid *Bernard. lib. 2. de confid.* Leva oculos tuos, & vide regiones, si non magis sunt siccæ ad ignem, quàm albæ ad messem. Quàm multæ, quas putaveras fruges, diligenter inspectæ vepres potiùs apparebunt, imò ne vepres quidem, sed annosæ & veterinosæ arbores.

Quid

Quid amplius fiet contra miseros peccatores ? Audi *Tertull. lib. de Monogamia* : Exurget Regina Carhaginis, & decernet in Christianos. Assidebit & illi Matrona Romana quæ &c. Sunt &, quæ totâ continentîâ judicent nos, Virgines Vestæ, & Junonis Achaicæ, & Dianæ Scythicæ, & Apollinis Pythici, etiam bovis illius Ægyptii Antistites de continentia infirmitatem Christianorum judicabunt.

Quid de aliis virtutibus justitiâ, contemptu opum, abstinentiâ &c. iam aliquis possit sibi victoriæ promittere, discat ex *Salviano lib. 3. de gubern. Dei* : Præter paucissimos quosdam, qui mala fugiunt, quid est aliud penè omnis coetus Christianorum quàm sentina vitiorum ? *Et rursus* : Facilius invenias reos malorum omnium, quàm non omnium; facilius majorum criminum quàm minorum, id est, facilius qui & majora crimina cum minoribus, quàm qui minora tantum sine majoribus perpetrâint. In hanc enim morum probrositatem omnis redacta est plebs Ecclesiastica, ut in

cun-

cuncto populo Christiano genus quoddam sanctitatis sit minus esse vitiosum. *Et postea* : De Christiano nobis nomine blandimur, cum utique hoc ipso magis per nomen sacratissimum rei simus, qui à sancto nomine discrepamus.

Jam de pœnitentibus *Idem citati operis lib. 5.* sic ait : Pœnitentes taliter omnia ferme agunt, ut eos non tam putes antea pœnitentiam criminum egisse, quam postea ipsius pœnitentiæ pœnitere, nec tum prius pœnituisse, quod malè vixerint, quam postea, quod se promiserint bene victuros. Sciunt me verum loqui, & testimonium mihi etiam suâ conscientia dicunt.

Ingemiscit *Bernard. Serm. 1. de Conversione S. Pauli.* Amici tui, Deus, & proximi adversum te appropinquaverunt & steterunt. Conjurasse videtur contra te universitas populi Christiani à minimo usque ad maximum, à planta pedis usque ad verticem non est sanitas in illa. Heu, heu Domine Deus? quia ipsi sunt in persecutione tua primi, qui videntur in Ecclesia tua primatum diligere, qui videntur gerere principatum. *Id-*

Idcirco *Gregor. M. in Job. lib. 33. c. 6.* adducto ex *Job. 40.* *Absorbebit fluvium, & non mirabitur, & habebit fiduciam, quod influat Jordanis in os ejus:* Quid hoc loco, *inquit*, fluvii nomine nisi humani generis decursio designatur? sed quasi ad ima descendendo pertransit. Quid autem appellatione Jordanis signatur, nisi qui jam imbuti sunt Sacramento Baptismatis? Behemoth iste à mundi origine exortum, vix paucis electis evadentibus, humanum genus ad ista defluens usque ad redemptionis tempora quasi quendam in se fluvium traxit. Alios sub Christianitatis nomine devorat.

### *Xl. Pauci salvantur.*

Quòd si attendamus paucitatem salvandorum, quis non percelletur? *Esdrae lib. 4. cap. 18.* qui licet non oraculum sonet divinum, magnam tamen habet auctoritatem, & à non paucis SS. Patrum ad firmanda dicta adducitur: Quomodo interrogabis terram, & dicet tibi, quoniam dabit terram multam magis, unde fiat siccile, parvum autem pulverem,

rem, unde fiat aurum. Sic & actus præs-  
sentis seculi: multi quidem creati sunt,  
pauci autem salvabuntur.

Et *cap. 9.* Respondi, & dixi, olim  
locutus sum, & nunc dico, & postea  
dicam: Quoniam plures sunt, qui per-  
eunt, quàm qui salvabuntur, sicut mul-  
tiplicatur fluctus super guttam.

Ad priorem locum videtur respexisse  
*S. Macarius Hom. 15.* Quemadmodum  
aurum à copiosa arena dilutum inveni-  
tur, suntque grana exigua instar milii, sic  
quoque ex multis pauci sunt probati. Ad  
posteriorem *S. August. Serm. 32. de ver-  
bis Domini*: Aream video, & grana  
quæro, & vix videntur grana, quando  
area trituratur; sed venturum est, ut ven-  
tiletur. Pauci ergo sunt, qui salvantur in  
compararatione multorum periturorum.

Sed utrumque confirmabit *apud Ba-  
ron. ad ann. 976. S. Nilus Abbas*, ubi as-  
serit ex decem millibus vix unum salva-  
ri, & hanc fuisse doctrinam SS. Basilii,  
Chrysostomi, Ephremi, Theodori Stu-  
ditæ, imò & Apostoli ipsius, nec non  
*S. Evangelii*: quia sicut nunc miseri-  
cor-



cordia DEI ultra modum apparet, ita se ostendet ſeveritas in judicio. *S. Bernard. in Epiph. Serm. 1.* Sicut benignitas, (in Nativitate Chriſti) apparuit ultra omnem ſpem, ultra omnem æſtimationem; ſimilem ita expectare poſſumus judicii diſtrictionem.

Et *Dom. 1. poſt Octav. Epiph. Serm. 1.* Veniet non expectantibus tanquam revertens à nuptiis, tanquam potens crapulatus à vino, verè ebrius & immemor miſerationum ſuarum, tunc enim quantum ad illos oblivifcetur miſeri. DEUS, veniet in ira & indignatione tanquam furibundus.

Et de verbis, *Vidi Dominum Serm. 2.* Non diſcernet inter glebas, qui diſcrevit inter ſtellas. Examinabit certè argentum, qui ipſum quoque aurum probavit. Et de hac re omnes præmoniti videmur; cùm nobis dictum: *Niſi abundaverit juſtitia veſtra plus quàm Scribarum & Pharifeorum, non intrabitis in regnum cælorum.*

Atque ita paucos ſalvari ſuo illo tempore SS. Patres credebant, quos *S. Nilus* ad-

adduxit, quando inter Christianos maxima fervebat sanctimonia, quotus ergo demum his corruptissimis temporibus evadat gehennam? Ausus est illis seculis *Tertullianus* Scapulæ viro Gentili ita Christianorum producere sanctitatem: Nos, quos sacrilegos existimatis, nec in furto unquamprehendistis, nedum in sacrilegio; aliundene sum<sup>9</sup> nescibiles quàm de emendatione vitiorum pristinatorum, in quibus jacebamus, quando eramus Ethnici? Quis hoc nostro seculo possit Judæos aut hæreticos objicere, quòd sicuti Christianus aliud negotium (id est crimen) non habeat nisi suæ sectæ, quem incestum, quem crudelem tanto tempore nemo probavit? Pro tanta innocentia, pro tanta probitate, pro justitia, pro pudicitia, pro fide, pro Deo vivi cremamur. *Et Apologet. cap. 39.* ita Ethnicos alloquitur: Dilectionis operatio notam nobis meruit penes quosdam; vide, inquit, quàm se diligunt, & pro alterutro mori sunt parati. *Et rursus:* Non prius (apud Christianos) discumbitur, quàm oratio ad DEUM prægustetur.

stetur ; editur, quantum esurientes capiunt ; bibitur, quantum pudicis est utile ; ita saturantur , ut qui meminerint, etiam per noctem adorandum sibi Deum ; ita fabulantur, ut quæ sciverint DEUM audire &c.

At nos *S. Bernardus* si videret, fortè in illa erumperet , in quæ suo prorupit ævo : Non est nisi amor turpis in hoc seculo , neque fides secura, quia omnia, quæ ejus sunt, contaminantur superbiâ, avaritiâ, cupiditate, & luxuriâ. Recessit enim lex à Sacerdotibus , justitia à Principibus, consilium à senioribus, religio à Clericis , reverentia à subditis , amor castitatis à virginibus , pudicitia à conjugatis.

Neque hæc de Gentilibus dixit, ut illa blandientium sibi explicatio suffocetur, paucos scilicet salvari , quia licet Christiani plurimi evadant, multò tamen plures Gentilium pereant ; certè & *S. Bernardus* de Christianis dixit, & *Salvianus lib. 3. de gubern.* Quid aliud cunctorum negotiantium vita , quàm perjurium ? quid aliud curialium, quam iniqui-

quitas ? quid aliud officialium , quàm calumnia ? quid aliud militantium , quàm rapina ? De Christiano nobis nomine blandimur , cum utique hoc ipso magis per nomen sacratissimum rei simus , quàm à sancto nomine discrepamus. Nam & ideò plus sub religionis titulo DEUM ludimus , quia positi in religione Christiana peccamus.

*XII. Demùm sequitur æternitas.*

Jam finita sunt omnia , transiit mundus , transiit vitæ nostræ via , æternos annos qui nos manent aut *semper* felices , aut *semper* maledictos expendamus. Nam hic tandem omnibus consistendum , & ubi constiterimus , ibi *semper* erimus. Erimus *semper*. Quidnam hoc *semper* ? tamdiu , quamdiu DEUS erit DEUS. Et hoc pro uno mortali crimine ! & in omni suppliciorum genere ! in omni ! Eheu miseri ! in perpetuum miseri ! sine fine ! Mille , & mille , & mille transeunt anni , de suppliciis , de sensu doloris decessit nihil.

O æternitas ! Cogito mille annos , cogito

gito mille millies annos, tot annorum  
 millions cogito, quot arenulæ in uni-  
 versa terra, guttæ in mari, quot puncta  
 in firmamento inscribi possunt, nihil co-  
 gitavi. Finiti ad infinitum nulla est pro-  
 portio. O æternitas! ô æternitas! Quis  
 par est ferendis æternis ignibus? *Fumus  
 tormentorum eorum ascendet in secula  
 seculorum.* Quis est hîc, qui dicet:  
 quid hoc? *in secula seculorum?* quàm  
 diu DEUS existet, quàm diu anima im-  
 mortalis vivet. O finis sine fine! O  
 mors omni morte gravior! semper pa-  
 ti tantos cruciatus, qui necare possint,  
 nec mori posse. Præclusa omnis via,  
 omnis spes, si in orcum decidisti. Apo-  
 cal. 9. *In diebus illis quærent homines  
 mortem, & non invenient eam; deside-  
 rabunt mori, & mors fugiet ab eis.*

Quia, ut S. Gregor. 4. *Moral.* 44. ait,  
 justum est, ut qui in suo æterno peccavit  
 contra Deum, in DEI æterno puniatur.  
 & s. *Moral.* Cujus vita mortua fuit in  
 culpa, ejus mors semper vivit in poena.  
 Cruciatur & non extinguatur; moritur  
 & vivit; deficit & subsistit; finit sem-  
 per & sine caret. Æter-



Æternitas est duratio semper præfens, & stabilis immutabilitas successione carens. Est unum perpetuum hodie. Est ævum ævorum, quod non interit, sed eodem modo semper se habet. Est status, cujus totum est esse simul. Est axis immobilis, circa quem volvitur rota hujus temporis. Est circulus, cujus centrum ubique, circumferentia nusquam. Hic ergo mihi, si peccavi, & non egi condignam poenitentiam, in poenis decurrendus, si egi benè, in gaudio tenendus. In hoc axe consistendum, & vel quidem in lætitia inenarrabili, vel in tormentis, quæ intellectus non capit. Quàm diu? *semper.* Quando finietur? *nunquam.* Ignibus uretur miser, & semper tolerabit, & semper futura tormenta metuet, & finem nunquam sperabit. O vitam mortiferam! O mortem immortalem! Isai. 66. *Vermis eorum non morietur, & ignis non extinguetur.*

*S. August. lib. de Spiritu & litera c. 56. cit. à Granat. in Duce pecc.* Peccata deteguntur, rei punientur, & hoc totum est perenne: quisquis enim ad tormenta ibit,  
am-

amplius non exhibit , dolor combustio-  
nis eos foris cruciabit , poena cœcitatis  
intus obscurabit.

Quid ageres nunc pro salute tua , Ju-  
da Ischarioth , si tot annorum tibi dare-  
tur spatium ad poenitendum , quot tu , ô  
peccator , annis peccas ? Vereor , ne ti-  
bi occinat ex Isai. 14. *Infernum subter  
te conturbatus est , in occursum adven-  
tûs tui suscitabit tibi gygantes. Om-  
nes Principes terræ ( illius scilicet male-  
dictæ , ) surrexerunt de solis suis , om-  
nes Principes nationum. Universi re-  
spondebunt , & dicent tibi : Et tu vul-  
neratus es , sicut & nos , nostri similis ef-  
fectus es. Detracta est ad inferos su-  
perbia tua , concidit cadaver tuum.  
Subter te sternetur tinea , & operimen-  
tum tuum erunt vermes.*

Et tu Cain , qui antiquissim<sup>9</sup> es peccator ,  
& in suppliciis quotam æternitatis partem  
absolvisti ? Nullam , nullam ; nulla hîc pri-  
ma , nulla ultima , infinita est. Lamen-  
tariis illis verbis Job. 16. *Collegit furo-  
rem suum in me , & comminans mihi in-  
fremuit contra me , hostis me terribi-*  
libus

*libus oculis intuitus est. Aperuerunt super me ora sua, & exprobrantes percuss-  
runt maxillam meam, satiati sunt pe-  
nis meis. Concluserunt me Deus apud ini-  
quum, & manibus impiorum iradidit  
me. Ego ille quondam opulentus repen-  
tè contritus sum, tenuit cervicem meam,  
confregit me, posuit me quasi in signum,  
circumdedit me lanceis suis, convulne-  
ravit lumbos meos, non pepercit & effu-  
dit viscera mea. Concidit me vulnere su-  
per vulnus, irruit in me quasi gigas.*

Et tu, formose Absolon, & tu, con-  
sultissime Achitophel, & tu, voluptuo-  
se Epulo, quando finietis vestra suppli-  
cia? Job. 19. ejulat quisque vestrum:  
*Destruxit me undique, & perco, & quasi  
evulsa arbori abstulit spem meam. Ira-  
tus est contra me furor meus, & sic me  
Deus habuit quasi hostem suum. Simul  
venerunt latrones ejus, (dæmones) &  
viam sibi fecerunt per me, & obsederunt  
in gyro tabernaculum meum. Fratres  
meos longè fecit à me, & noti mei quasi  
alieni recesserunt à me; dereliquerunt me  
propinqui mei, & qui noverant me, obliti  
sunt mei.*

H

Sed

Sed jam oculos levemus in cœlum; audiamus, quid inde ad nos veniat: *Nec oculus vidit, nec auris audivit, nec in cor hominis ascendit, qua Deus pręparavit diligentibus se.*

Sed quid si oranti pro nobis alicui Sancto ibidem dicatur: Jerem. 10. *Tu ergo noli orare pro populo hoc, & ne assumes pro eis laudem & orationem, quia non exaudiam in tempore clamoris eorum ad me, in tempore afflictionis eorum. Quid est quod dilectus meus in domo mea fecit scelera multa?* Et c. 14. *Noli orare pro populo isto in bonum, cūm jejunaverini, non exaudiam preces eorum, & si obtulerint holocaustomata, non suscipiam ea.* Et cap. 15. *Hec dicit Dominus; Qui ad mortem, ad mortem; & qui ad gladium, ad gladium; & qui ad famem, ad famem; & qui ad captivitatem, ad captivitatem.*

Misericordiam, misericordiam Domine? Verūm convertamur quā primum ad Dominum nostrum, scindamus corda nostra in fletu & planctu, induamur sacco & cilicio, emendemus

in

in melius , quæ malè egimus ; multæ est misericordiæ Dominus ; sed non differamus. Apoc. 10. *Et Angelus quem vidi stantem super mare & terram , levavit manum suam ad cælum , & iuravit per Viventem in secula seculorum , qui creavit cælum & ea , quæ in eo sunt , & terram , & ea quæ in ea sunt , quia tempus non erit ampliùs. Sed quid ? Contingit , quod scripsit S. Ephrem. Serm. de vita ac morte uniuscujusque :* Et ista omnia novimus ac scimus , quodque gravius est , sponte interim peccamus ; & propterea nullam à DEO veniam consequimur , quia non ex ignorantia sed scientes erramus. Scripturas quidem Sacras audimus , & collaudamus , sed quæ dicuntur non facimus. Quare hortor & obsecro , ut non solum auditores simus , sed & factores.

Saltem subinde in nos redeamus , & nos aliquando recolligamus , pro quo serviet sequens Methodus.



# METHODUS

## SESE

MENSIBUS SINGULIS  
RECOLLIGENDI

PATRIBUS - FAMILIAS  
præsertim in Republica  
occupatis accommodata.

*Recollectionis mensuræ mo-  
tivum.*

**R**erum suarum admodum incurius;  
& damnorum temporalium pe-  
riculis expositus censeretur ille Pa-  
terfamilias, qui non semel, saltem in  
mense quolibet, rationes accepti & ex-  
positi diligenter recognosceret, & mo-  
dum statueret lucra neglecta, damnâque  
incutsa refarciendi, aut saltem exinde  
evitandi. Multò autem periculosius  
ageret, & animæ suæ incurius magis  
censeretur homo ille, qui non saltem pa-  
ri diligentia singulis mensibus semel con-  
sider-

fideraret, quæ in negotio æternæ suæ salutis damna fecerit, lucrâque neglexerit, statuer tque exinde cautius utiliusque operari; ut tandem fiat arbor digna paradiso, adferens fructus duodecim, *per menses singulos reddens fructum suum*, (Apoc. cap. 22.) id est, statui, in quo DEUS ipsum collocavit, correspondentem.

*Quædam pro recollectione utiliter faciendâ notanda.*

I.

CUM homo in aliquo Reipubl. officio constitutus duplicem gerat personam, privatam scilicet, quâ sibi, & publicam, quâ aliis, vivit; consequenter talis in qualibet recollectione menstrua, se reflectere debet, an omnes utriusque personæ numeros (quorum rationem DEUS suo tempore ab ipso exiget) impleverit. Siquidem scire debet, se licet domi vir bonus sit, non tamen eo ipso bonum Principis vel Reipublicæ esse ministrum, & è converso.

2. Perfectio utriusque istius personæ

H 3 con.

consistere videtur in tribus hisce punctis:

1. Ut homo nihil committat sibi prohibitum, aut omittat sibi undecunque præceptum.
2. Ut ea omnia, quæ ei agenda vel omittenda incumbunt, obeat eâ perfectione, quâ ab ipso fieri possunt.
3. Ut illa peragat vel omittat præcisè vel saltem primariò, quia DEUS illa mandat, vel saltem taliter ab ipso fieri desiderat.

*Facienda recollectionis tempus.*

**S**I sub finem mensis elapsi vel initium secuturi facturus est Sacramentalem Confessionem v. g. primâ Dominicâ mensis ad lucrandum Indulgentias plenarias, quæ tali die semper obtineri possunt in quovis templo Societatis JESU, vel Confraternitate S. Rosarii, &c. utiliter & compendiosè menstruam recollectionem faciet unâ cum examine conscientiæ, quod istâ ratione domi accuratius faciet, ad confessionem majori cum integritate & fructu peragendam, alioquin recollectio hæc est peragenda  
ulti

ultimo die mensis , vel si in illum incidat aliquod impedimentum, die immediate illum præcedente vel subsequente. Si enim non servetur dies stabilis, periculum erit sensim recollectionem diutius differendi, subinde etiam negligendi, & tandem penitus omittendi.

*Recollectionis faciendæ  
praxis.*

**D**ie faciendæ recollectioni deputato sumatur aliquod tempus à negotiis magis vacuum, occlusoque cubiculo, ac collocatis supra mensam calamo, chartâ, & atramento, ut mox annotari possit, si quid in recollectionis decursu occurrat (ne postea memoriâ excidat) annotandum.

I. Gratias agat DEO, quòd ipsum mense elapso non solum in vita conservaverit, sed etiam multa animæ corporisque pericula ab eo averterit, & multa beneficia, etiam ei ignota, contulerit; gratiamque petat cognoscendi, quâ ratione iis fuerit usus, & uti debuerit, his, vel similibus verbis:

H 4      *Omni-*

**O**mnipotens sempiterne Deus ! sis in eternum benedictus, quod me ex nihilo creatum, & dilecti Filii tui sanguine ac morte redemptum hucusque dando spatium pœnitentia in hac aita conservaveris, & multa beneficia auxiliâque, etiam mihi ignota, per vitam meam universam, præsertim mense hoc elapso, contuleris. Utinam illis usus fuisset ad gloriam tuam, salutemque meam, ad quam procurandam et illa mihi contulisti. Largire nunc mihi cœlæ lumen, ut videam, in quibus hoc elapso mense Divina Majestati tue displicui, & gratiam exinde tibi usque in finem vitæ meæ perfectiùs serviendi.

Mox sedens vel deambulans secum recognoscat, an præstiterit ea, quæ se præstiturum mense elapso proposuerat. Si quæ neglexit, sequenti mense se ea implendum proponet; vel si res amplius integra non est, aliquod aliud opus bonum sequenti mense peragendum substituet. 3. Recollectionem aggredietur hoc modo :

PUN-



## PUNCTUM I.

## I.

**C**ONSIDERABIT, an probabiliter confidere possit, se esse in gratia Dei, ita, ut si mox moriendum foret, esset in DEI judicio cum spe æternæ salutis compariturus. Quod si excusâ aliquantulum conscientia sentiat se unius, vel etiam plurimorum peccatorum mortalium reatu gravatum, in genua provolutus conetur elicere contritionem cum proposito peccata illa, quàm primum commodè fieri poterit, clavibus Ecclesiæ subjiçendi, & exinde relapsûs pericula vitandi, quantum illa, salvis ejus officiis, & sine gravi incommodo, vitari possunt, hac ferè formulâ:

*Alleget Phariseus sua merita ad captandam apud homines gloriam, ego cum publicano fateor mea scelera ad impetrandam tuam gratiam, super omnia amande, simulque summe metuende DEVS! Detestor proinde incredibilem fatuitatem meam, quâ ausu-*  
H 5 *fus*

*fui mandata tua contemnere , non considerans , quàm terribile sit incidere in manus DEI viventis. Accuso ingratitudinem meam , quàm amorem meum , tot titulis tibi debitum , à Te ad viles & omni amore præ Te indignas creaturas converti. O utinam morte meâ ea , quæ tam flagitiosè egi , reddere possem infecta ! libenter illam subirem , exindeque subibo potius , quàm ut à Tuo amore , servitiôque per lethale ullum peccatum recedam. Tibi soli peccavi , mea maxima culpa.*

2. Si conscientia illum de mortali delicto non arguit , vel postquàm peccata sua dicto modo fuerit detestatus , perget ( sedens vel deambulans ) considerare culpas elapso mense à se tam in Republica , quàm domi commissas.

SE RECOLLIGENDI. 179  
IN PUBLICIS.

*Omissione.*

**P**Erpendet, an ludendo, otando, diutius dormiendo, minus utilibus actionibus ex sensualitate, curiositate, laboris sibi incumbentis tædio se se occupando, distulerit promovere actiones præsertim miserabilium personarum, quibus omnis expeditionis dilatio gravis est. An similibus de causis neglexerit actiones proponendas inspicere, earumque merita eo, quod res quælibet exigit, studio examinare, ut solidè juxta æquitatem posset sententiam suam ferre. An respectu humano, aut aliâ aliquâ passione inordinatâ spei, timoris, odii, amoris præpeditus omiserit in concilio proferre ea, quæ pro justitiâ, innocentia, religione, bono Principis publico utiliter à se dici posse credebat.

*Commissione.*

An ex æmulatione , obstinatione , ambitu impediverit bonorum effectum consiliorum. An seminârit odia , factiones , diffidentias , calumnias. An presserit dignos Reipublicæ officiis viros sibi invidiosos. An ut placeret Principi , vel summo Magistratui , pauperes exactionum pondere affligeret. An justitiam tam distributivam quàm commutativam torserit pro amico , vel ratione sui commodi iniquè illam protraxerit. An aulicis duplicitatibus simplices traduxerit , illisque nocuerit. An publica Principis emolumenta justa suis postposuerit. An servaverit accuratè juramentum Principi præstitum. Expedit autem illud (etiamsi memoriâ recalleat) legi , & benè considerari , unà cum instructione suo officio propriâ.

IN BONIS ET  
DOMI.*Omissione.*

**C**onsiderabit, an omiserit, cum facile potuisset, procurare, ut domestici, aliique ejus gubernationi subiecti DE I mandata, Ecclesiæque præcepta servarent. An eos sine necessitate occupandi causa fuerit, ut diem festum, servilia opera faciendo, aut facrum omittendo, violaverint. An distulerit, aut etiam neglexerit satisfacere obligationibus, quas contraxit ex ære alieno Confessarii, aliûsve potestatem illam habentis mandato, propriis promissis DEO vel homini factis, aut bonis propositis, quæ aliquando religiosè concepit, & fors etiam incepit utiliter praticare. An denique omiserit præstare ea, quæ probabiliter judicabat sibi à Deo inspirari.



*Commissione.*

An in prosecutione objecti privati, si-  
bique utilis, vel delectabilis non præju-  
dicaverit tertio. An non præbuerit vel  
positivè scandalum, vel negativè, non  
dando bonum exemplum, ubi illud da-  
re tenebatur ad mala proximi averten-  
da, vel bona procuranda. An subditos  
nimis operis & tributis vexaverit. An  
horum etiam sibi debitorum nimis rigi-  
dus exactus fuerit. An decimas, vel  
alia spectantia ad Ecclesiam, vel cultum  
divinum ad se traxerit, vel ab officiali-  
bus suis id fieri permiserit. An curam  
habuerit, quantum ad ipsum attinebat,  
Religionis & cultûs divini, bonorumque  
morum in suis bonis, atque inprimis  
justitiam suis administrari, non nimis diu  
carceribus emacerari suos subditos, ma-  
trimonia non impediri, pupillos & vi-  
duas non vexari sed juvari manda-  
verit, & efficaciter pro-  
curaverit.

## PUNCTUM II.

## I.

**I**N rebus, alioquin licitis, potest quis peccare (licet, per se loquendo, non nisi venialiter) excedendo in prosecutione voluptatis seu delectationis, quæ percipitur in usu illarum rerum, puta, cibi, potûs, conjugii, lusûs, aliisve relaxationis, dignitatis, honoris, vestium, opum &c. Considerabit proinde, an in istis permiserit abripi se nimio voluptatis affectu, & cogitabit de praxi sensim se concludendi intra limites decentiæ & rectæ rationis quoad temperantiam, modum, tempus in talium rerum usu; & si quid speciale statuerit, annotabit.

2. Considerabit, an non posset majore cum perfectione obire actiones, quas ex obligatione, aut devotione peragere solet; v. g. cum majori decentia sacrificio Missæ interesse, cum majore perfectione statas suas preces perficere, cum majori circumspectione in audientibus, quas apud Principes habet, vel aliis ipse  
ex-

exhibet, conviviiis, aliisque hominum congressibus sese gerere; & si quid speciale statuendum occurrat, annotabit.

### PUNCTUM III.

**Q**uia actionum humanarum moralitas commensuratur apud Deum juxta qualitatem intentionis, quâ obeuntur, considerabit, quâ intentione peragere sua soleat.

1. Circa actiones corpori debitas, cibum, potum, vestitum, somnum, relaxationes, &c. an illa obeat sistendo in sola sensuum oblectatione, quod est animale; an verò ob honestatem cuilibet tali operi intrinsecam, quod est rationale; an denique quia naturæ nostræ auctor vitæ ac valetudini conservandæ talia à nobis fieri vult, quod est in genere perfectum.

2. Circa actiones, quas domi & foris ex obligatione, vel liberâ suâ designatione obit, v. g. convivia, famulos, fami-


miliam, equos, currus, suppellectilem, activas, passivasque visitationes, externam pompam, in conciliis aliisque publicis officiis adimplendis diligentiam, in operibus misericordiae aut iustitiae exercendis benignitatem, in religionis, aliarumque virtutum exercitiis (praesertim quae in hominum oculos incurrunt) assiduitatem, atque hinc considerabit, an ista obeat ex vanitate, quod est vitiosum, opera etiam optima depravans; an ex consuetudine, naturali inclinatione, sine ulla reflexione aut intentione, quod est otiosum, opera ferè relinquens indifferencia; an ex motivo decentiae, quod est laudabile, opera morali bonitate exornans; an denique, quia DEUS illa mandat, vel in illis sibi complacet, quod est perfectum, opera honesta (in peccatore quidem de congruo, in iusto autem infallibiliter & de condigno) gratiae divinae aeternaeque gloriae meritoria reddens. Id verò vel maximè disquirat, num pallio religionis, seu praetensâ ratione statûs texerit ornâritque privatam suam ambitionem, utilitatem vel com-  
mo-

moditatem , an autem. potius hanc publico Religionis, Principis & statûs bono voluerit ancillari , utrumque autem ad ultimum omnium nostrarum actionum finem , id est , gloriam DEI fideliter direxerit ; adeoque an etiam illatas sibi ut privato injurias publicè vindicârit , aut condonârit amore potius DEI , quàm animo dissimulandi ex sui privati statûs ratione.

His perpensis concipere conabitur desiderium omnia sua exinde quàm optimâ intentione perficiendi, & asscurandi perseverantiam seu gratiam finalem , quàm nemo ita mereri potest , ut infallibiliter illam sit consecuturus , cùm nemo tam justus sit , quin possit adhuc in peccatum cadere , & æternum perire. Unde *beatus homo, qui semper est pavidus, (Proverb. 28.) & qui se existimat stare, videat, ne cadat. (1. Corinth. c. 10.)* Igitur nemo debet sibi ob opera sua bona salutem æternam certò polliceri, vel ob opera mala de illius consecutione desperare ; sed fiduciam suam fundet 1. supra Christi Redemptoris nostri mor-



mortem & merita , quæ nobis copiosè  
 & valdè efficaciter applicantur in rectâ  
 & religiosâ frequentatione Sacramento-  
 rum, præsertim Communionis, in qua  
 nobis datur Christi Corpus & Sanguis  
 in æternæ salutis pignus , Christo ipso  
 promittente: *Qui manducat me, & ipse  
 vivet propter me.* (Joan. c. 6.) 2. supra  
 intercessionem Sanctorum , præsertim  
 Beatæ Virginis Deiparæ, quæ misericor-  
 diæ mater est, & peccatorum refugium,  
 quam proinde affectu filiali prosequi nos  
 oportet , ut ipsâ intercedente fiamus *co-  
 heredes Christi* (ad Rom. c. 8.) Filii  
 ejus naturalis, jubemurque assiduè illam  
 rogare, ut finalem gratiam nobis impe-  
 tret , cùm Angelicam salutationem sic  
 concludimus: *Ora pro nobis miseris pec-  
 catoribus nunc & in hora mortis  
 nostræ, Amen.*



## RECOLLECTIONIS

*Conclusio.*

**H**is absolutis , in Calendario inspicier , qualia festa in mensem sequentem incidant , & proponet mense illo perficienda aliqua opera religionis , mortificationis , misericordiæ , alteriusve virtutis , statui suo temporique accommodata , specificando dies & occasiones , in quibus credit se illa quàm convenientissimè peragere posse , illisque in charta annotatis , gratiam DEI implorabit ad illa omnia quàm perfectissimè adimplenda , idque in hunc ferè modum :

**O**mnipotens sempiterne Deus !  
*sub cuius nutu vitæ , mortis-  
que meæ momenta decurrunt ! ec-*  
*ce*

*ce pauca aliqua, eaque Divino  
 tuo conspectu indigna desideria  
 concepi, mense sequenti Tuae Ma-  
 jestati pro modulo serviendi. Su-  
 scipe illa eâ benignitate, quâ duo  
 minuta, quæ pauper vidua in ga-  
 zophylacium miserat, (Marci 12.)  
 approbâsti, & da gratiam vel il-  
 la, quæ concepi, ad salutem meam  
 gloriâque tuam fideliter adim-  
 plendi, atque cum meritis unige-  
 niti tui Filii ea salubriter uniendi.  
 Inter peccandi pericula, quæ for-  
 tassîs multa hoc instante mense  
 me cingent, me in amore tuo im-  
 mobilem custodi. Et si a te for-  
 tassîs statutum est, ut hoc mense  
 anima mea ex hoc corpore migret,  
 fiat, O Deus, voluntas tua. So-  
 lummodo, quoniam neminem vis  
 perire, sed omnes salvos facere,  
 illam admitte ad gloriam, ad  
 quam*

*quam eam creâsti, ut ibi te amet,  
laudet ac glorificet in aeternum,  
Amen.*

Judicium durissimum his, qui  
præsunt, fiet. (*Sapient. c. 6.*)

•••••

## ACTUS CONTRI- TIONIS

MANE ET VESPERE EXER-  
cendus ad obtinendam remissio-  
nem peccatorum.

**D**omine mi, Jesu Christe, ve-  
rus Deus & homo, Creator  
& Redemptor meus: Quoniam  
tu es qui es, & quia amo te su-  
per omnia:

*Pæni-*

*Pœnitet me ex toto corde, quod te offenderim :*

*Et propono firmiter nunquam amplius peccare , & omnes peccandi occasiones devitare, itemque confiteri, & implere pœnitentiam, quæ mihi injuncta fuerit. Con- dono simul amore tui ex corde omnes offensas, quibus lesus forte sim a quovis proximorum meo- rum. Et si quispiam habeat contra me, unde jure coram te que- ratur, propono ex animo, me proxima occasione ipsi satisfactu- rum.*

*Omnia denique opera mea, & afflictiones, ac totam vitam tibi offero in satisfactionem meorum peccatorum.*


*Et quemadmodum suppliciter à te peto, sic confido in bonitate tua,*



*tua , & misericordia infinita ,  
quod ea merito tuæ pretiosæ pas-  
sionis & mortis mihi remissu-  
rus , & gratiam largiturus sis  
ad me emendandum , & ad per-  
severandum usque ad mortem ,  
Amen.*



SUM-



# SUMMARIUM HUIUS OPUSCULI.

## CAPUT I.

### *Grave Fugum super Seculares.*

1. Quia salus illorum in lubrico.  
pag. 1
  2. Quia laqueos incidunt Diaboli. 2
  3. In medio malorum vivunt. 2
  4. Aliquando pro suis meritis in hac vita recipiunt mercedem. 5
  5. A domesticis habent salutis periculum. 5
  6. Raro habent animæ directorem. 5
  7. Ex vanitate habent noxā &c. 6
  8. Obligantur ad sanctimoniā. 7
  9. Obligantur ad mundum odio habendum. 9
  10. Discrimen habent tam à bono quam à malo successu. 10
- I 11. Mun-

## SUMMARIUM.

11. Mundus decipit. 11  
12. Mundus multis afficit molestiis. 11  
13. In seculo pauci sancti. 21  
14. Pauci salvantur. 13  
15. Et pueri subjacent his periculis. 15  
16. Qui sunt in conjugio, sunt miseri. 16  
17. Divites in assiduis angustiis. 21

## CAPUT II.

### *Grave Jugum super Ecclesiasticos.*

1. Quia redditus habent onerosos. 24  
2. Ad magnam sanctitatem obligantur. 25  
3. Peccata Sacerdotum graviora. 29  
4. Obligantur ad exemplaritatem. 31  
5. Periculum imminet, ne indignè Sacrificium accedant. 32  
6. Stri-

6. Strictius judicabuntur. 37
7. Quia etiam alienorum peccatorum sunt rei. 39
8. Non est qui pro eis oret. 39
9. Quia Sacerdotes malæ vitæ sunt specialiter maledicti à DEO. 40

CAPUT III.

*Grave Jugum super Prælatos in Ecclesia.*

1. Quia difficulter salvantur. 47
2. Magna sollicitudine subditos curare debent. 48
3. Quia hæc cura eget magnâ patientiâ. 49
4. Magnâ charitate. 50
5. Magna sanctitate 51
6. Magnâ scientia. 51
7. Magnâ lenitate. 54
8. Magno labore. 55
9. Magna exemplaritate. 56
10. Etiam pro aliis punientur. 58

## SUMMARIUM.

11. Ratio illis talentorum incumbit. 59
12. Debent esse à DEO vocati ad suum munus. 59
13. Caveant, ne aliquem scandalizent.

## CAPUT IV.

*Grave Jugum super omnes servos DEI.*

1. Ignorantia statûs nostri in supernaturalibus. 65
2. Persecutio virtutem sequitur. 65
3. Ob parvorum neglectum sæpe veniunt ad interitum. 69
4. Et tamen parvis lapsibus sumus obnoxii. 72
5. Sæpe nec puras habent, nec veras virtutes. 73
6. Multa pericula à se ipsis patiuntur. 75
7. Si



## HUJUS OPUSCULA:

7. Si non ferventer DEO serviunt,  
in magno sunt discrimine. 79
8. Debent omnia perfectissimè  
operari. 83
9. In fervore sæpe superantur in  
suo genere à filiis hujus mun-  
di. 84
10. Nec satis est mala cavere, nisi  
bona fecerimus. 86
11. Debent practicè cognoscere  
DEUM. 88
12. Magnam debent quærere hu-  
militatem. 88
13. Vitia excisa repullulant. 89
14. Judicia DEI admiranda & oc-  
cultà. 90
15. Quia nesciunt, an illis sint pec-  
cata dimissa. 92

## CAPUT V.

### *Grave fugum super Peccantes.*

1. Miseria peccantis quoad ani-  
mam. 96
- I 3      2. Quia

## SUMMARIUM.

2. Quia per peccatum homo fit  
mancipium diaboli. 98
3. Si alios scandalizent, gravi sub-  
jacent judicio DEI. 99
4. Per peccatum homo sacrifi-  
cium offert dæmoni. 102
5. Est certa mensura peccatorum,  
etsi ignota nobis. 106
6. Peccatum multa mala affert in  
corpore & temporalibus. 108
7. Hæc ipsa mala etiam peccatum  
veniale ex parte inducit. 111
8. Alii effectus peccatorum ve-  
nialium. 114
9. Venialia præparant ad mor-  
tale. 116
10. Mortale trahit in aliud mor-  
tale. 117
11. Facit, ut DEUS nesciat pec-  
catorem. 119
12. Merita destruit, mortificat,  
mala revocat. 119
13. Unius

## HUJUS OPUSCULI.

13. Unius peccatum tota sæpe  
regna evertit. 120

14. Beneficia promissa avertit  
peccatum. 123

15. Reliquæ peccati immanita-  
tes. 123

### CAPUT VI.

*Grave Jugum super Pœnitentes.*

1. Quia sæpe fit pœnitentia lu-  
dicra. 128

2. Sæpe inefficax propositum.  
129

3. Pœnitentia debet esse digna.  
131

4. Modus pœnitendi durus. 133

5. Ques male pœnitet, augent  
pœnam. 136

6. Raros verè pœnitet. 137

7. Quos pœnitet, debent vitam  
emendare. 137

8. Post pœnitentiam peccare est  
gravius. 138

9. Pœ-

## SUMMARIUM.

9. Poenitentia ad mortem dilata  
dubia. 139  
10. Peccatorum deliberatè ad-  
missorum difficilis venia. 141

## CAPUT VII.

### *Grave Fugum super Omnes.*

1. Quia ad miseras nascimur.  
142  
2. Si non affligimur, male agitur  
nobiscum. 144  
3. Omnibus inimicus insidiatur.  
145  
4. Omnes se debent abnegare.  
146  
6. Prædestinatio DEI occulta. 146  
7. Signa prædestinationis non in  
omnibus reperiuntur. 149  
8. Etsi habuerimus signa præde-  
stinationis, sumus incerti de  
perseverantia. 151  
9. Judicium DEI rigidum. 152  
10. Om-

## HUJUS OPUSCULI.

10. Omnes oportet ante tribunal  
DEI Judicis comparere. 152

11. Pauci salvantur. 160

11. Demum sequitur æternitas.  
165


Methodus se singulis mensibus re-  
colligendi. 172

## FINIS.












1  
 2  
 3  
 4  
 5  
 6  
 7  
 8  
 9  
 10  
 11  
 12  
 13  
 14  
 15  
 16  
 17  
 18  
 19  
 20  
 21  
 22  
 23  
 24  
 25  
 26  
 27  
 28  
 29  
 30  
 31  
 32  
 33  
 34  
 35  
 36  
 37  
 38  
 39  
 40  
 41  
 42  
 43  
 44  
 45  
 46  
 47  
 48  
 49  
 50  
 51  
 52  
 53  
 54  
 55  
 56  
 57  
 58  
 59  
 60  
 61  
 62  
 63  
 64  
 65  
 66  
 67  
 68  
 69  
 70  
 71  
 72  
 73  
 74  
 75  
 76  
 77  
 78  
 79  
 80  
 81  
 82  
 83  
 84  
 85  
 86  
 87  
 88  
 89  
 90  
 91  
 92  
 93  
 94  
 95  
 96  
 97  
 98  
 99  
 100  
 101  
 102  
 103  
 104  
 105  
 106  
 107  
 108  
 109  
 110  
 111  
 112  
 113  
 114  
 115  
 116  
 117  
 118  
 119  
 120  
 121  
 122  
 123  
 124  
 125  
 126  
 127  
 128  
 129  
 130  
 131  
 132  
 133  
 134  
 135  
 136  
 137  
 138  
 139  
 140  
 141  
 142  
 143  
 144  
 145  
 146  
 147  
 148  
 149  
 150  
 151  
 152  
 153  
 154  
 155  
 156  
 157  
 158  
 159  
 160  
 161  
 162  
 163  
 164  
 165  
 166  
 167  
 168  
 169  
 170  
 171  
 172  
 173  
 174  
 175  
 176  
 177  
 178  
 179  
 180  
 181  
 182  
 183  
 184  
 185  
 186  
 187  
 188  
 189  
 190  
 191  
 192  
 193  
 194  
 195  
 196  
 197  
 198  
 199  
 200  
 201  
 202  
 203  
 204  
 205  
 206  
 207  
 208  
 209  
 210  
 211  
 212  
 213  
 214  
 215  
 216  
 217  
 218  
 219  
 220  
 221  
 222  
 223  
 224  
 225  
 226  
 227  
 228  
 229  
 230  
 231  
 232  
 233  
 234  
 235  
 236  
 237  
 238  
 239  
 240  
 241  
 242  
 243  
 244  
 245  
 246  
 247  
 248  
 249  
 250  
 251  
 252  
 253  
 254  
 255  
 256  
 257  
 258  
 259  
 260  
 261  
 262  
 263  
 264  
 265  
 266  
 267  
 268  
 269  
 270  
 271  
 272  
 273  
 274  
 275  
 276  
 277  
 278  
 279  
 280  
 281  
 282  
 283  
 284  
 285  
 286  
 287  
 288  
 289  
 290  
 291  
 292  
 293  
 294  
 295  
 296  
 297  
 298  
 299  
 300  
 301  
 302  
 303  
 304  
 305  
 306  
 307  
 308  
 309  
 310  
 311  
 312  
 313  
 314  
 315  
 316  
 317  
 318  
 319  
 320  
 321  
 322  
 323  
 324  
 325  
 326  
 327  
 328  
 329  
 330  
 331  
 332  
 333  
 334  
 335  
 336  
 337  
 338  
 339  
 340  
 341  
 342  
 343  
 344  
 345  
 346  
 347  
 348  
 349  
 350  
 351  
 352  
 353  
 354  
 355  
 356  
 357  
 358  
 359  
 360  
 361  
 362  
 363  
 364  
 365  
 366  
 367  
 368  
 369  
 370  
 371  
 372  
 373  
 374  
 375  
 376  
 377  
 378  
 379  
 380  
 381  
 382  
 383  
 384  
 385  
 386  
 387  
 388  
 389  
 390  
 391  
 392  
 393  
 394  
 395  
 396  
 397  
 398  
 399  
 400  
 401  
 402  
 403  
 404  
 405  
 406  
 407  
 408  
 409  
 410  
 411  
 412  
 413  
 414  
 415  
 416  
 417  
 418  
 419  
 420  
 421  
 422  
 423  
 424  
 425  
 426  
 427  
 428  
 429  
 430  
 431  
 432  
 433  
 434  
 435  
 436  
 437  
 438  
 439  
 440  
 441  
 442  
 443  
 444  
 445  
 446  
 447  
 448  
 449  
 450  
 451  
 452  
 453  
 454  
 455  
 456  
 457  
 458  
 459  
 460  
 461  
 462  
 463  
 464  
 465  
 466  
 467  
 468  
 469  
 470  
 471  
 472  
 473  
 474  
 475  
 476  
 477  
 478  
 479  
 480  
 481  
 482  
 483  
 484  
 485  
 486  
 487  
 488  
 489  
 490  
 491  
 492  
 493  
 494  
 495  
 496  
 497  
 498  
 499  
 500  
 501  
 502  
 503  
 504  
 505  
 506  
 507  
 508  
 509  
 510  
 511  
 512  
 513  
 514  
 515  
 516  
 517  
 518  
 519  
 520  
 521  
 522  
 523  
 524  
 525



P.1.27



913576

**Bibliotheca**

600,5

**P.P. Camaldulensium in Bielany**

Depozyt w Bibliotece Jagiellońskiej



04864



